

## Tuhun vaha naçahyí Mateo sahá ña naçaja Jesucristo

*Chichi naquixi Jesucristo  
(Lc. 3:23-38)*

<sup>1</sup> Ña yóho cúu quivi na naçacuu tásáñnu jícó Jesucristo, mé a naquixi chichi David xihín chichi Abraham:

<sup>2</sup> Abraham naçacuu tátá Isaac ta Isaac naçacuu tátá Jacob ta Jacob naçacuu tátá Judá xihín java ga ñani da. <sup>3</sup> Judá naçacuu tátá Fares xihín Zara ta náná ndíví da yóho naçanani ña Tamar. Ta Fares naçacuu tátá Esrom ta Esrom naçacuu tátá Aram. <sup>4</sup> Ta Aram naçacuu tátá Aminadab ta Aminadab naçacuu tátá Naasón ta Naasón naçacuu tátá Salmón. <sup>5</sup> Ta Salmón naçacuu tátá Booz, da cúu jahyi ñá naní Rahab. Booz naçacuu tátá Obed ta Obed yóho naçacuu da jahyi ñá naní Rut cán. Ta mé Obed yóho naçacuu tátá Isaí. <sup>6</sup> Ta Isaí naçacuu tátá rey David ta rey David yóho naçacuu tátá Salomón, da cúu jahyi ñá naçacuu ñájíhí Urías nu cuítí cán.

<sup>7</sup> Ta Salomón naçacuu tátá Roboam ta Roboam naçacuu tátá Abías ta Abías yóho naçacuu tátá Asa. <sup>8</sup> Ta Asa naçacuu tátá Josafat ta Josafat naçacuu tátá Joram ta Joram naçacuu tátá Uzías. <sup>9</sup> Ta Uzías naçacuu tátá Jotam ta Jotam naçacuu tátá Acáz ta Acáz naçacuu tátá Ezequías. <sup>10</sup> Ta Ezequías naçacuu tátá Manasés ta Manasés naçacuu tátá Amón ta Amón naçacuu tátá Josías. <sup>11</sup> Ta Josías

naṣacu tátá Jeconías xih̄in java ga ñani da. Ta naṣacu da tiempo tá naṭiin soldado na Israel já naṣandaca ñahá da na cán ñuu Babilonia.

<sup>12</sup> Ta tá naṣanduu na Israel ñuu Babilonia cán já naṣacu Salatiel ta tátá Salatiel naṣacu Jeconías. Ta Salatiel naṣacu tátá Zorobabel. <sup>13</sup> Ta Zorobabel naṣacu tátá Abiud ta Abiud naṣacu tátá Eli-aquim ta Eliaquim naṣacu tátá Azor. <sup>14</sup> Ta Azor naṣacu tátá Sadoc ta Sadoc naṣacu tátá Aquim ta Aquim naṣacu tátá Eliud. <sup>15</sup> Ta Eliud naṣacu tátá Eleazar ta Eleazar naṣacu tátá Matán ta Matán naṣacu tátá Jacob. <sup>16</sup> Ta Jacob naṣacu tátá José, da naṣacu yí María. Ta María cúú ñá naṣacu náná Jesucristo, mé a naṣindahá Ndióxi cacomí a cuéntá sahá ñayivi.

<sup>17</sup> Ñá cán quea janda tá naṣasáhá cácu jahyi Abraham janda quiahva naṣinu coo a quiví naṣasáhá cácu jahyi David já naṣaha uxu comi generación. Ta tá quiahva naṣasáhá cácu jahyi David janda quiahva naṭiin na Babilonia na Israel já ñéhe ñahá na cuahan na naṣaha inga uxu comi generación. Ta naṣaha inga uxu comi generación nani naṣanduu na Israel ñuu Babilonia janda quiahva naṣinu coo quiví naṣacu Jesús, mé a naṣindahá Ndióxi cacomí a cuéntá sahá ñayivi.

### *Tá naṣacu Jesús*

*(Lc. 2:1-7)*

<sup>18</sup> Joho naṣah̄in tá naṣacu Jesucristo: Mé María, ñá cacuu náná Jesús cán sa naṣahan ñá tuhun ñá ña tandaha ñá xih̄in José. Joo tá cámaní coo da xih̄in ñá já naṣandaa ini da ña ñúhu jahyi ñá. Ta ña yóho naṣacu a ña naṣaja ínima yí Ndióxi. <sup>19</sup> Ta

José, da cacuu yí María cán cúú dá da cája ndinuhu ña ndaa. Ta naçahán da ña naçahiin ñá xihín inga dataa joo coó naçeen da çahan núu da saha ñá nuú ñayivi. Saha ña cán quéa nasacu ini da jándacoo jehé da ña. <sup>20</sup> Ta nani cáhvi ini da saha ña caja da anda jáví naquixi in sani nu dá ta nandaca náha in tátō Ndióxi nu dá. Ta tañu mé sani cán naçahan xihín dá. Já naçachi a já:

—José, da naquixi chichi David, a cáyhvi tohún tandahún xihín María jan jáchi naçaja ínima yii Ndióxi ña ñúhu jahyi ñá. <sup>21</sup> Ta tá sa naçacu jahyi María já chicaan ndó quivi á ná cananí a Jesús jáchi jácaçu a ñayivi nuú cuachi tá ná candeé ini na mé á —naçachi a.

<sup>22</sup> Tóco ndihi ña yóho nayaha ña ná xinu coo nuú tuhun Ndióxi ña naçahí in profeta sanahá ndivaha cán ta já naçachi da cán já:

<sup>23</sup> Vaxi quivi cañuhu jahyi in ñá tacú, ñá a ñáha coo ta xihín.

Ta tá sa naçacu jahyi ñá cán já cacu na quivi á cananí a Emanuel.

Ta tuhun yóho cúni cachi a: ín Ndióxi xohō.

<sup>24</sup> Ta tá nandicaxí ini José já naçaja da tá ín naçachi tátō Ndióxi cán xihín dá. Ta já nañandaha dá xihín María. <sup>25</sup> Joo coó naçahiin da xihín ña tá quiahva ín in dataa xihín ñájíhí da janda quiahva cacu jahyi María. Ta tá naçacu a cán já nasacu José quivi á cananí a Jesús.

## 2

### *Tá naçaxito nihni na ndichí Jesús*

<sup>1</sup> Ta naçacu Jesús in ñuu naní Belén ña ndacaan estado Judea. Ta mé tiempo cán nasacomí rey

Herodes cuéntá sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúu ná na jácuaha xihín quimi ta naquixi na chí nu cána candii. <sup>2</sup> Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá ín da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihín rí yóho sa nacandaá ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndáca tuhún na.

<sup>3</sup> Ta tá naxini joho rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini tóco ndihi ñayivi ñuu Jerusalén cán. <sup>4</sup> Sahá ña cán quea nacana rey Herodes cán tóco ndihi na sacuahá nuú jutu xihín na jánaña ley Moisés cán. Ta já nandaca tuhún da na saha ndá ñuu cúu nu cáchí tuhun Ndióxi cacu da nasahan Ndióxi tuhun a chindahá a cacomí a cuéntá sahá ñayivi. <sup>5</sup> Já nacachi na cán já xihín dá:

—Ñuu Belén, ña ndácaan estado Judea cán cúu nuú cáchí tuhun Ndióxi cacu da jáchi quiahva já nacahyí in profeta sanahá tá nacachi da já:

<sup>6</sup> Vati ñuu Belén, ña ndácaan estado Judea, cúu á in ñuu loho ndivaha tañu ñuu náhnu cán joo ín sahá a, jáchi tañu ñayivi ñuu cán ndindita in da cacomí cuéntá sahá na Israel, na cúu cuéntá Ndióxi, já nacahyí in profeta sanahá.

<sup>7</sup> Tá nandihí já nacana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná. <sup>8</sup> Anda já

naçindahá da na ñuu Belén. Já naçachi da já xihín ná:

—Cuáhán ndo ñuu Belén cán ta ndaça tuhún vaha ndó ndaja cáa sahá ta loho naçacu jan. Ta tá sa nandiñehe ndó a já quixi ndó çaxi tuhun ndó xihín i já ná çuhun ri yehe va caja cáhnu i ña —naçachi Herodes xihín na.

<sup>9</sup> Ta xihín ña yóho naçquee na ndichí cuahan tucu na. Ta quimi, rí naçini na nu cuití cán já ndáca tucu rí na cuahan na. Ta tá naçinu rí chí nuú ín mé a loho cán anda já naçandichi rí. <sup>10</sup> Ta cáji ndivaha ini na tá xini na mé quimi cán. <sup>11</sup> Tá nandihi já naçuihvi na ini vehe já naçini na mé a loho cán xihín María, náná a. Ta já naçaxítí na nu á ta já naçaja cáhnu na ña. Ta tá nandihi já nasuná na yuhú sató ñéhe na ta já najoco na jihun cuáan nuú a xihín jusa vaha xihín in ña támi sahan naní mirra nu mé a loho cán. <sup>12</sup> Tá nandihi já naçuxi in sani nu ná ta xihín mé sani cán naçachi Ndióxi xihín ná ña ná a ndícó çoo na chí nu ín rey Herodes. Sahá ña cán quea nandijama na íchi cuánúhu ná ñuu na.

### *Tá ñéhe na Jesús cuahan na Egipto*

<sup>13</sup> Ta tá sa naçquee na ndichí cán cuahan na já naçuxi in sani nuú José ta nandaça náha in táto Ndióxi nu dá. Já cáchi a já xihín dá:

—Cuándacoún ndiquehe ña loho jan xihín María, náná a ta cunún çuhun xihín ná chí ñundáhyi nación Egipto. Ta cán coún xihín ná janda quiahva ná çaxi tuhun i xuhun. Jáchi caca nuu Herodes ndinducú da ña loho jan ña cahní ñahá da —naçachi táto Ndióxi cán xihín José.

<sup>14</sup> Anda já nandacoo José já naquehe da Jesús xihín María, náná a já naqueta ñuu na cuahan na chí Egipto. <sup>15</sup> Ta cán nasanduu na janda quiahva naxihi Herodes. Tóco ndihi ña yóho nayaha já ná xinu coo nuú tuhun nacachi Ndióxi sanahá tá nacahyí in profeta já: “Nasahin jahyi i nación Egipto ta nacana i da ná ndicó coo da”, cáchi tuhun Ndióxi.

*Tá nasahnda Herodes chuun ña ná cahní na na valí*

<sup>16</sup> Ta ndaja coo naxini Herodes cán ña najándahvi na ndichí cán da sahá ña coó naxinu ga na nu dá. Ña cán quéa a juú quiahva naxojo ini da. Ta chí nasahnda da chuun ña ná cahní ndihi na ta valí, na ivi cuia chí ninu, mé na ndúu ñuu Belén xihín ñuu valí catáhan xihin á. Jáchí sa nacaxi tuhun na ndichí cán xihin dá ña naxini na mé quimi anda tátuhun ivi cuia. <sup>17</sup> Ta tá nandihí naxihí na valí yóho já naxinu coo nuú tuhun nacahyí profeta Jeremías sanahá ndivaha tá nacahyí da já:

<sup>18</sup> Ñuu Ramá jandá joho ndáhvi tácu

cáyuhú cóhó ñañáha sácu ñá.

Ta ñá sácu yóho cúu ñá Raquel. Sácu ñá sahá jahyi ñá.

Ta co cúní ñá ndico ini ñá jáchí naxihí jahyi ñá, cáchi tuhun Ndióxi.

<sup>19</sup> Joo tá sa naxihí Herodes já naquixi tucu sani nuú José nu in da nación Egipto cán. Ta nandaca náha in tátó Ndióxi nu dá já cáchí a já xihin dá:

<sup>20</sup> —Cuándacoún ta ndiquehe Jesús xihin María, náná a ta cuahán ndicó coo xihin ná chí ñundahyi Israel. Jáchí sa naxihí va na ndúcú cahní ña loho jan —cáchi tátó Ndióxi.

21 Anda já nandicoo José ta ñéhe da Jesús xihin María, náná a cuahan na ndicó coo na chí ñundáhyi Israel. 22 Joo tá ñañehe da tuhun ña nandicojo Arquelao chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa naçaxi tuhun táto Ndióxi tañu sani nu dá sahá ña cán quea nandijama da íchi ta cuahan da chí estado Galilea. 23 Ta naxinu coo na in ñuu naní Nazaret nuú nasanduu na. Ta xihín ña yóho naxinu coo nuú tuhun naçahyí na profeta sanahá ña cacuu Jesús da ñuu Nazaret.

### 3

*Tá naçasáhá Juan, da jácandúta ñayivi cáhan ndojó da yucú íchí cán*

*(Mr. 1:1-8; Lc. 3:1-9, 15-17; Jn. 1:19-28)*

1 Mé tiempo cán Juan, da jácandúta ñayivi naxinu da yucú íchí cuéntá estado Judea cán. Ta naçasáhá jánaħa da ñayivi. 2 Já cáchí da já xihín ná:

—Xíní ñúhú jándacoo ndó ña núu cája ndó ta ndicó coo ini ndó nu Ndióxi jáchí sa naçayati quivi cacomí Ndióxi cuéntá sahá ñayivi —cáchí da xihín ná.

3 Mé Juan yóho cúu dá da naçahan profeta Isaías saħa tá naçahyí da já:

Vaxi quivi tá caħan cóhó in da tañu yucú íchí ta cachi da já xihín ñayivi:

“Caja tiaħva ndó íchí nuú quixi xitoho í, ta cuná ndó in íchí ndacú nu mé á ña ná ndihvi a ínima ndo”, cáchí tuhun Ndióxi.

4 Ta jáhma nasandixi Juan yóho naçacuu a ña naçavaħa na xihín íji camello ta nasandico in ní jáhnda tóco da. Ta naxixi da tica xihín ñuñu yucú.

<sup>5</sup> Ta ñaqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán ñasaá na nu Juan taa johó na nu cáhan da. <sup>6</sup> Ta tá ñañahma na cuachi na nu Ndióxi já najácandúta Juan na ini yuta Jordán.

<sup>7</sup> Joo tá ñaxini Juan ña janda johó xínu coo cuahá na fariseo xihín na saduceo nu dá ña ná jácandúta da na já ñacasáhá xójo ndivaha ini da ta já ñacachi da já xihín ná:

—Mé ndó cúú ndó tátuhun coo jáchi cúú ndó ña quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. <sup>8</sup> Xíni ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu ñasacaja ndó jihna. <sup>9</sup> Ta a cáhán ndo ña jácacu Ndióxi ndohó sahá ña cúú ndó na ñaquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cáhan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>10</sup> Mé ndó cúú ndó tátuhun in yító, dó sa ñatiin na hacha cuahan na cahnda na. Ta tóco ndihí yító, dó co sahan cuihi vaha nu, tahnda do ta quee dó nu ñúhu cayi do. Quiahva já caja ri Ndióxi xihín ndó tá co cúni ndó ndicó coo ini ndó nu mé á. <sup>11</sup> Mé a ndaa cája ndúta i ndohó xihín ticuii ta xihín ña yóho náha ña ñandicó coo ini ndó nu Ndióxi. Joo vaxi inga da ta da cán cúú da jándicutú ínimá ndo xihín ínimá yii Ndióxi ta ña cán cacuu a tátuhun ñúhu cayi. Ta da cán ín cuaha chága ndée dá a juú ga yehe. Ta chí coo sahá i ndica xití i nu dá ña ndaxí i correa ndusa da. <sup>12</sup> Mé da vaxi cán caxi da ñayivi vaha tañu ñayivi quini. Cúú á tátuhun in dataa tá



jáxixi da trigo xihin pala já ná quee xehe á já cacu vaha da ña. Ta xehe nacana cán cuhun a cayi a xihin ñúhu ita ña a ndáhva toho —cáchi Juan xihín na cán.

### *Tá nacandúta Jesús*

*(Mr. 1:9-11; Lc. 3:21-22)*

<sup>13</sup> Naquee Jesús chí estado Galilea cuahan yuta Jordán nu ndacaan Juan jácandúta dá ñayivi ña ná jácandúta da mé á. <sup>14</sup> Joo nu cuítí coo naxeen toho Juan jácandúta dá Jesús. Ña cán quéa nacachi da já xihín Jesús:

—Yóhó cúu da ndítahan jácandúta yehe. Ta cáa johó vasún yóho ña ná jácandúta i yohó —nacachi Juan cán xihín Jesús.

<sup>15</sup> Já nanducú nehe Jesús tuhun nu dá já nacachi a já xihin dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —nacachi a.

Xihín ña yóho nacandúsa Juan ta chí najácandúta dá Jesús. <sup>16</sup> Ta tá nandihí nacandúta Jesús já naqueta ini ticuúí cán. Anda já nanuna indivi ta naxini Jesús nanuu ínimá yii Ndióxi jatá ta nasacaa tá quiahva cáa in ndijata. <sup>17</sup> Tá nandihí já naxini johó a cáhan in a indivi ta já cáchi a cán já:

—Yóhó cúún jahyi maní i ta cájii ndivaha ini i xuhun —nacachi a.

## 4

### *Xíto ndojó tiñáhá sacuaqa Jesús*

*(Mr. 1:12-13; Lc. 4:1-13)*

<sup>1</sup> Tá nandihí já ndáca ínima yíi Ndióxi Jesús cuahān chí yucú íchí nuú cō ndúu ñayivi já ná coto ndojó tiñáhá sacuaḥa mé á.

<sup>2</sup> Ta cán naṣahīin a tixi ivi jícó quivi. Ñuú ta ndiví cōó naḡixi a ta tá nandihí já naḡinu joco nu á. <sup>3</sup> Já naḡayati tiñáhá sacuaḥa nuú Jesús ña coto ndojó ñahá ri já naḡachi rí já xihín á:

—Tá ta jivi ndusa jahyi Ndióxi cúun cahnda chuun ña ná nduu yuu yóho pan —naḡachi rí cán xihín Jesús.

<sup>4</sup> Anda já naḡachi Jesús já xihín rí:

—Já cáchí tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú ri a caja na ña sáhndá tuhun Ndióxi nu ná já quéa cuu catacu na nu Ndióxi” —naḡachi Jesús xihín rí.

<sup>5</sup> Tá nandihí já ndáca tiñáhá sacuaḥa cán Jesús cuahān xihín rí ñuu Jerusalén, ña yíi cán ta já najándaá rí a nu jícó jiní veñuhu cáhnu ndácaan cán. <sup>6</sup> Ta já naḡachi rí já xihín á:

—Tá ta jivi ndusa jahyi Ndióxi cúun jácana mún chí ninu jáchi já cáchí tuhun Ndióxi:  
Cahnda Ndióxi chuun nu tátō mé á ña ná candaa na yohó.

Ta ndinehe ndáḥa na yohó,  
já quéa ná a ndicuehe saḥun tá ná cachihin saḥun  
xihín yuu, já cáchí tuhun Ndióxi —naḡachi rí  
xihín Jesús.

<sup>7</sup> Ta já nanducú nehe Jesús tuhun nu rí já naḡachi a já xihín rí:

—Cáchí tucu tuhun Ndióxi já: “A cóto ndojó tohún Ndióxi, xitohún” —naḡachi Jesús xihín ri.

<sup>8</sup> Ta tá nandihí já ndáca tucu tiñáhá sacuaḥa cán Jesús našaḥan xihín rí in jini yúcu jícó ndivaha. Ta já nanaha rí ndaja táhan ñuu ndúu ñuyíví nu á ta najánaḥa rí tóco ndihí ña náhnu ndúu cán nu á. <sup>9</sup> Ta já naçachi tucu rí já xihín Jesús:

—Tóco ndihí ña yóho quiahva i nuun tá ná caxítún nuú i caja cáhnún yeḥe —naçachi rí quini cán xihín Jesús.

<sup>10</sup> Anda já naçachi Jesús já xihín rí:

—Satanás, cuáhán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —naçachi Jesús xihín rí cán.

<sup>11</sup> Tá nandihí já naçaxoo tiñáhá sacuaḥa cán cuahaḥan rí. Ta já naxinu java táto Ndióxi chindeé na Jesús.

*Tá naçasáhá cáxi tuhun Jesús tuhun Ndióxi nuú na estado Galilea*

*(Mr. 1:14-15; Lc. 4:14-15)*

<sup>12</sup> Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuahaḥan chí estado Galilea. <sup>13</sup> Joo coó naçandoo a ñuu Nazaret chí naquee a cuahaḥan coo a chí ñuu Capernaum ña ndácaan yuhú tañuhú, dó ndácaan ñundáhyi cuéntá na naquixi chichi Zabulón xihín na naquixi chichi Neftalí. <sup>14</sup> Tóco ndihí ña yóho nayaha ña ná xinu coo nuú tuhun naçahyí profeta Isaías sanahá tá naçahyí da já:

<sup>15</sup> Ñayivi ndúu ñundáhyi Zabulón xihín na ndúu ñundáhyi Neftalí, ña ñúhu inga xoo yuta Jordán yati yuhú tañuhú,

ta jári nā ndúu Galilea, mé estado nu ndúu ñayivi,  
nā cō cúu chichi Israel,

<sup>16</sup> mé nā cán nasanduu na nuú naá ndivaha ta viti  
naxini na in ñaha yehe ndivaha.

Jándiyehē á nu ná ña ná a quívi na,  
joo catacu na anda ama cáa quívi nu íin Ndióxi,  
naçahyí Isaías sanahá.

<sup>17</sup> Ta chí mé tiempo já naçasahá Jesús cáhan  
ndojó a nuú ñayivi ta já cáchí a já xihin ná:

—Xíní ñúhú jándacoo ndó cuachi cája ndó ta  
ndicó cōo ini ndó nu Ndióxi jáchi sa naçayati quívi  
cacomí a cuéntá sahá ñayivi —naçachi Jesús.

*Tá cána Jesús comí da tává tiyacá ña ná caca tuun  
da xihin á*

*(Mr. 1:16-20; Lc. 5:1-11)*

<sup>18</sup> Tá xíca Jesús cuahan yuhú tañuhú Galilea,  
nandinehé a ivi taa, da cúu ñani. In da naní Simón  
ta cáhan nā Pedro xihin dá. Ta da inga cán naní  
da Andrés. Ndívi da yóho cúu dá da tává tiyacá  
ta ñúhu na jácana na ñúnu ná ini tañuhú cán. <sup>19</sup> Já  
naçachi a já xihin ndívi da:

—Naha quíi ndó candico ndó yehe caca tuun ndó  
xihini. Táva ndó tiyacá viti joo caja i ña ná cuu tavá  
ndo ñayivi tañu cuachi —cáchí a.

<sup>20</sup> Ta chí ivi laá najandacoo da ñúnu da ta nandico  
da Jesús.

<sup>21</sup> Ta nani xíca Jesús cuahan chága chí nuu já  
naxini a inga ivi tucu taa, da cúu ñani. In da naní  
Jacobo ta inga da naní Juan, da cúu jahyi Zebedeo.  
Ta ndívi mé da yóho ñúhu da ini barco da xihin tátá  
da ndája vaha da ñúnu dá. Ta naçana Jesús ndívi da

yóho. <sup>22</sup> Ta chí iví laá najándacoo da barco da xihín tátá da ta naçasáhá xíca tuun da xihín Jesús.

*Jánaḥa Jesús nuú cuḥá ndivaha ñayivi*  
(Lc. 6:17-19)

<sup>23</sup> Níí cúú estado Galilea na<sub>x</sub>ica nuu Jesús cáḥan tuhun vaḥa nuú ñayivi ini veñuhu in in ñuu cán. Cáxi tuhun a nu ná ña sa nandindaa quiví cacomí Ndióxi cuéntá saḥá ñayivi ñuyiví. Ta nandaja vaḥa Jesús na quíhví tá nuú cueḥe ndóho na. <sup>24</sup> Ta níí cúú ñundáhyi cuéntá Siria nandicuḥta nuu tuhun saḥá ña cája Jesús. Saḥá ña cán queá néhe na na quíhví, na ndóho tá nuú cueḥe vaxi na nu á ña ná ndaja vaḥa mé á na ta néhe na na ñúhu ínima quini ini xínu na nu á ta ndijáá na xíhi yihí xihín na quíhví saḥa néhe na vaxi na nuú Jesús. Ta nandaja vaḥa mé á na.

<sup>25</sup> Ta cuḥá ndivaha ñayivi ndíco na Jesús. Cúú ná na naquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácaan yuta Jordán cán.

## 5

*Tá cáḥan ndojó Jesús jiní yúcu*  
(Lc. 6:20-23)

<sup>1</sup> Tá na<sub>x</sub>ini Jesús ña ndíco cuḥá ndivaha ñayivi mé á já nandaa jiní yúcu ta já naçacoo a cán. Ta naçayati na xíca tuun xihín á nu á. <sup>2</sup> Ta já naçasáhá jánaḥa nu tóco ndihi na ndúu cán já naçachi a já xihín ná:

3 —Tahví n̄acuu ñ̄ayivi tá ndícuni na xíní ñ̄úhú n̄a ñ̄a chindeé Ndióxi n̄a jáchi n̄a cán cúu n̄a cacomí Ndióxi cuéntá saha.

4 'Tahví n̄acuu n̄a ndúu cuéha jáchi n̄a cán cúu n̄a quiahva Ndióxi tuhun ndéé ini.

5 'Tahví n̄acuu n̄a cō ndíñehe jícó mé jáchi n̄a cán cúu n̄a ñ̄ehe táhvi ndiquehe na ñ̄a nasahan Ndióxi tuhun a quiahva n̄u ná.

6 'Tahví n̄acuu n̄a xíca ini caja ñ̄a cúní Ndióxi. Na cán cúu n̄a caja Ndióxi ñ̄a ná x̄in̄u nuú ñ̄a cúu ini na.

7 'Tahví n̄acuu n̄a cándáhví ini sahá ñ̄ayivi jáchi n̄a cán cacuu na candáhví ri ini Ndióxi saha.

8 'Tahví n̄acuu n̄a cō ndácaan quini ínima jáchi n̄a cán cúu n̄a cuni Ndióxi.

9 'Tahví n̄acuu n̄a ndíhi ini ñ̄a ná coo vaha na xihín ñ̄ayivi jáchi n̄a cán cúu n̄a cáchí Ndióxi cúu ná jahyi mé á.

10 'Tahví n̄acuu n̄a ndóho ini sahá ñ̄a cája na ñ̄a sáhndá Ndióxi n̄u ná caja na jáchi n̄a cán cúu n̄a cacomí Ndióxi cuéntá saha.

11 'Tahví n̄acuu ndó tá cánahá ñ̄ayivi xihín ndó ta cája xíxi na xihín ndó sahá ñ̄a cándeé ini ndó yehe. Ta tahví n̄acuu ndó tá jácojo na cuachi jíquí jata ndó sahá ñ̄a cándeé ini ndó yehe.

12 'Xíní ñ̄úhú cajji ndivaha ini ndó ta coo vaha ini ndó jáchi ndiquehe ndó in ñ̄a vaha ndivaha caja Ndióxi indiví. Xíní ñ̄úhú ndicuhun ini ndó ñ̄a quiahva já nacaja xíxi na xihín n̄a profeta, n̄a nasanduu sanahá.

*Cúu yó tátuhun ñ̄úhu jándiyehē nuú ñ̄ayivi ñ̄uyíví  
(Mr. 9:50; Lc. 14:34-35)*

13 'Mé ndó cúú ndó tátuhun ñijí yívi na. Sa xíní ndó ña cája ñijí ña ná ndihaji ñaha xíxi ndó. Ta quiahva já cája ndó xihín ñayivi ñuyíví. Joo tá ná ndihi ña ohva ñijí cán a cúu ga ndicó coo a cahohva tucu a sahá ña cán quea jandá cuíta va íchi cuani nihni ñayivi ña jáchi coo chuun toho a.

14 'Jári mé ndó cúú ndó tátuhun ñuhu jándiyehē nuú ñayivi ndúu ñuyíví. Ta mé ñuhu cán cúú á tátuhun in ñuu cánúu jata in yucú jícó ta a cúu toho ndacaan jehé a. 15 Jáchi co chíñuhu ná in lámpara ta tá nu ndíhí já chíjehé na ña tixi in sato. Ña cája na xihín á quea chinúu jícó na ña já ná jándiyehē a nu tóco ndihi na ndúu vehe. 16 Quiahva já xíní ñíhú ndihi ini ndó caja vaha ndó ña ná cacuu ndó tátuhun in ñuhu cáyi nuú ñayivi. Jáchi tá ná cuni na ña vaha cája ndó já quea cuu caja cáhnu na Ndióxi, tátá yo, ña ín indiví.

### *Jánaħa Jesús saħa ley Moisés*

17 'A juú cahán ndó ña naquixi i ñuyíví yóho ña cacu xóo i ña nasahnda ley Moisés xihín ña najánaħa na profeta, vaha. Co váxi toho i cacu xóo i ña. Vaxi i nu ndó jáxinu coo i tóco ndihi ña cáchi mé ley já ná naħa i nu ndó ndía cúú ndusa ña. 18 Mé a ndaa ná caħan i xihín ndó ña a ndíhi saħa mé ley nani ín indiví xihín ñuyíví yóho. Ni in túhún toho tuhun, a ndíhi saħa janda quiahva ná vaha tóco ndihi ña ndítahan vaha. 19 Sahá ña cán quea ndá na co cúni caja ña sáhdá ley Moisés vatí cúú á ña loho ndivaha ta ni co cúni na jánaħa na ñayivi ña ná caja na ña cáchi a já quea cacuu na in na coo cuaha saħa tañu na cacomí Ndióxi cuéntá saħa. Joo na cája ña cáchi mé ley ta jánaħa na ñayivi ña ná

caja na ña, mé na cán cacuu na na cáhnu ndivaha tañu na cacomí Ndióxi cuénta saha. <sup>20</sup> Mé a ndaa ná cahan i xihin ndo ña tá ná caja cuití va ndó tá quiahva cája na jánaha ley Moisés xihin na fariseo já quea a cuú ndihvi ndó nuú cacomí Ndióxi cuénta sahá ñayivi.

*Jánaha Jesús ña co ndítahan cojo ini ñayivi  
(Lc. 12:57-59)*

<sup>21</sup> 'Mé ndó sa xini ndo ña nacachi Moisés xihin tásahnu jícó ndo sanahá tá nacachi da já: "A cáhni ndó ndii jáchi ndá na ná cahni ndii tandaa quivi caja vii jutixia saha ná." <sup>22</sup> Joo yehe cáchi i xihin ndó viti ña ndá na ná caja cuehe xihin ñani táhan na tandaa quivi caja vii jutixia saha ná. Ta jári na cáhahá xihin ñani táhan na, á cáchi na cuú ná ñayivi tachi já vaxi quivi tá candichi na nu juéxe cáhnu ta cuu cuhun na indayá sahá.

<sup>23</sup> 'Sahá ña cán quea tá ta ñéhe ndó in ñaha cuahan ndó joco ndó nu náa Ndióxi ta nani cuahan ndo cán ndicuhun ini ndó ña iin in ñani táhan ndó ta co cúní táhan vaha na xihin ndo <sup>24</sup> já quea mé jan yati nu náa ndítahan jándacoo too ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihin ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

<sup>25</sup> 'Tá sácú in na saha ndó cuhun ndó vecaa ta cúní na candaca na ndohó cuhun ndó nu juéxe, xini ñúhú nducú ndó ndá quiahva ndique táhan máni ndó xihin ná nani núná nu ndó caja ndó ña. Já quea ná a ndiquiahva na cán ndohó ndáha juéxe jáchi cuu ndiquiahva juéxe cán ndohó ndáha na



policia ta chicao na ndohó vecaa. <sup>26</sup> Mé a ndaa cáchí i xihín ndó ña cañuhu ndó cán janda quiahva ná chahvi ndó tóco ndihi jjuhún yíca ndo.

*Jánaħa Jesús sahá cuachi cája in dataa tá cúní da coo da xihín in ñá co cúú ñájíhí da*

<sup>27</sup> 'Mé ndó sa xíní ndó ña nasahnda ley Moisés chuun sanahá ta já nacachi a já: "Coto a cóo ndó xihín ñájíhí á yí ñani táhan ndó." <sup>28</sup> Joo yehe cáchí i xihín ndó viti ña ndá da sándehe in ñáñaha ta cáhvi núu ini da xihín ña já quea cómí tá cómí da cuachi nu Ndióxi jáchi cúú á tátuhun sa ín da xihín ñá.

<sup>29</sup> 'Ña cán quea cáchí i xihín ndó ña tá nduchú núu cuáha ndó quea jándacava ndohó nuú cuachi, tavá ndó ña jácana xíca ndó ña ná cuhun a jáchi vaha chága ña ná ndihi sahá in nduchú núu ndó a juú ga ña ná cuhun in ní yiquí cuñu ndó ini indayá. <sup>30</sup> Ta tá ndahá cuáha ndó quea caja ña ná ndacava ndó nuú cuachi, chituhun ndó ña ta jácana xíca ndó ña ná cuhun a jáchi vaha chága ná ndihi saħa ndáħa ndo a juú ga ña ná cuhun ní yiquí cuñu ndó ini indayá.

*Jánaħa Jesús ña co ndítahan nuú dataa jándacoo da ñájíhí da*

*(Mt. 19:9; Mr. 10:11-12; Lc. 16:18)*

<sup>31</sup> 'Ta mé ndó sa xíní ndó ña nasahnda ley Moisés chuun sanahá já cáchí a já: "Ndá da cúní jándacoo ñájíhí da ndítahan cavaha da in tutu quiahva da nu ña ta sa ín vaha va cuu jándacoo da ña." <sup>32</sup> Joo yehe cáchí i xihín ndó viti ña ni in túhún toho taa co ndítahan jándacoo da ñájíhí da. Jáchi ndá da jándacoo ñájíhí da cája da ña ná caja ña cuachi tá ná tandaha tucu ñá. Jári da tandaha xihín ña cómí

ri da cuachi nu Ndióxi. Joo tá ná candaa ini da ña íin ñájíhí da xihín inga dataa já quéa cuu ndusa jándacoo da ña.

*Jánaḥa Jesús ña ndítahan caja na tá sáhan na tuhun na nuú ñayivi*

<sup>33</sup> Mé ndó sa xíni ndó ña nasahnda ley Moisés chuun sanahá já cáchí a já: “Xíni ñúhú jáxinu coo ndó tóco ndihi ña nasahan ndó tuhun ndó caja ndó tá tává ndo quivi Ndióxi.” <sup>34</sup> Joo yehe cáchí i xihín ndó viti ña ná quiahva ndó tuhun ndó nuú ñayivi joo a tává ndó quivi ni in ñaha. A tává ndó quivi indivi jáchi indivi cúu nu íin coo Ndióxi. <sup>35</sup> Ta ni a tává ndo quivi ñundáhyi jáchi ñundáhyi cúu nu sáni mé á ta ni a tává ndo quivi ñuu Jerusalén jáchi cúu á ñuu naçaxi Ndióxi, mé á cúu á rey cáhnu ndivaha. <sup>36</sup> Ta ni a tává ndó quivi yiquí jíní ndó tá sáhan ndó tuhun ndó nuú ñayivi jáchi co ndéé ndó ndaja yaa ndó á ndaja tuún ndó ni in túhún ijí jini ndo. <sup>37</sup> Tá sáhan ndó tuhun ndó nuú ñayivi xíni ñúhú cachi ndó: “Ajan, caja i ña.” Á tá coo xíni ñúhú cachi ndó: “Uhun, a cuú caja i ña.” Jáchi tá cachi ndó inga tuhun já caja ndó ña cúni ña quini.

*Jánaḥa Jesús ña ndítahan caja cáhnu ini saḥa táhan ñayivi*

*(Lc. 6:29-30)*

<sup>38</sup> Mé ndó sa xíni ndó ña nasahnda ley Moisés chuun sanahá já cáchí a já: “Tá quiahva cája ñayivi xuhun quiahva já caja ri yóhó va xihín ná. Ta tá ná cani in da nduchú núún já quéa ndítahan cani mún nduchú núú da. Tá ná tavá da nuhún já ndítahan nuun tavá ri yóhó va nuhú da”, cáchí ley Moisés. <sup>39</sup> Joo yehe cáchí i xihín ndo viti: A cája ihvi ndó

xihín ñayivi, na cája núu xihín ndo. Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na a. <sup>40</sup> Ta tá cúní in na candaca na ndohó cuhun ndó nu juéxe sahá ña cúní na candaa na cotó ndo já quea quiahva ndó ña nu ná ta janda cotó ndéé ndo quiahva ndó nu ná. <sup>41</sup> Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xíní ñúhú cojo ndó ña anda ivi kilometro cuhun ndo. <sup>42</sup> Ta ndá na ná caça in ñaha nu ndó quiahva ndó ña nu ná. Ta ndá na xíca too ñaha nu ndó, quiahva too ndó ña nu ná.

*Xíní ñúhú quihvi ini na co cúní mí  
(Lc. 6:27-28, 32-36)*

<sup>43</sup> Mé ndó sa xíní ndo ña nasahnda ley Moisés chuun sanahá já cáchí a já: “Quihvi ini ndó na xíní táhan vaha xihín ndó ta candají ndó na co cúní táhan xihín ndo”, cáchí ley Moisés. <sup>44</sup> Joo yehe cáchí i xihín ndo viti: Ndítahan quihvi ini ndó na co cúní táhan xihín ndó. Ta cahan vaha ndó xihín na canahá xihín ndó. Ta caja vaha ndó xihín na candají ndohó. Ta caça tahví ndó nu Ndióxi sahá na cája xíxi xihín ndo. <sup>45</sup> Jáchi xihín ña yóho náha ña cúu ndó jahyi Ndióxi, tátá yo, mé á in indiví. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha. <sup>46</sup> A cáhán ndo ña caja Ndióxi cuahá ñamaní xihín ndo tá quihvi ini cuití ndó na quihvi ini ndohó va jáchi janda ñayivi quini, na jataca jjuhún cuéntá impuesto cája na já. <sup>47</sup> Ta a cáhán ndo ña naja ndó cuahá ña vaha tá ná cahan Ndióxi cuití ndó xihín ñani táhan ndó jáchi

jaṇḁa ñayivi co xini Ndióxi cája na já. <sup>48</sup> Xini ñúhú caja ndaa ndó xihin tóco ndihi ñayivi tá quiahva cája ndaa Ndióxi, tátá yo, mé a íin indiví –ñacachi Jesús.

## 6

### *Jánaḁa Jesús ña ndítahan chindeé yo na ndahví*

<sup>1</sup> Já ñacachi tucu Jesús já:

—A ndúcu ndó caja vaḁa ndó nuú ñayivi saḁá ña ná cuni táhyí na ña cája ndó já candoo vaḁa ndó nu ná. Jáchi tá ná caja ndó já coó toho ñaha ñehé táhvi ndó nu Ndióxi, tátá ndo íin indiví. <sup>2</sup> Saḁá ña cán quéa tá chindeé ndó ñayivi, na ndímaní ñaha nuu, a cáca nuu ndó caḁan lánda ndó ña nuú ñayivi tá quiahva cája na co cúú ná tá quiahva ndaa na. Jáchi na cán saḁan na ñaha nuú na ndahví ini veñuhu xihin nu táca ñayivi íchi já ná cuu cuni táhyí tóco ndihi ñayivi ña vaḁa cája na. Jáchi na cán cúni na ña ná caja cáhnu ñayivi na. Mé a ndaa cáchi i xihin ndó ña sa yahvi na cúú mé ña cája cáhnu ñayivi na. <sup>3</sup> Ña ndítahan caja ndó tá chindeé ndó na ndímaní ñaha nuu quéa caja ndó ña ná a cándaḁa ini ni in ñayivi ña cája ndó <sup>4</sup> ta xini ñúhú caja jehé ndó ña. Ta Ndióxi, tátá ndo sándeḁé a ña vaḁa cája ndó xihin ñayivi ta mé á quéa chaḁvi a saḁá ña cája ndó jan.

### *Jánaḁa Jesús ñayivi ndaja caḁa taḁví na nu Ndióxi (Lc. 11:2-4)*

<sup>5</sup> Tá xica taḁví ndo nu Ndióxi a cája ndó tá quiahva cája na co cúú ná tá quiahva ndaa na jáchi cátoó na candita na veñuhu xihin cáyé ña caḁa taḁví na nu Ndióxi ña ná cuni táhyí ñayivi na. Mé

a ndaa ná cahan̄ i xih̄in ndo sa yahvi na cúu mé ña xíní ñayivi na. <sup>6</sup> Joo ndóhó, tá xíca tahví ndó nu Ndióxi, tátá ndo ín̄ indiví ndítahan quih̄vi ndó ini vehe ndó ta chicaji tuun ndó yéhé a ta jan̄ cuu caca tahví jehé ndo nu Ndióxi. Jách̄i jan̄ ín̄ Ndióxi, tátá ndo xih̄in ndo taa joho a nu cáhan̄ ndo ta caja mé á ñaman̄i xih̄in ndó.

<sup>7</sup> Ta tá xíca tahví ndó nu Ndióxi, a cahan̄ tucu tucu ndó mé tuhun̄ ña coo saha jách̄i ñayivi, na co xín̄i Ndióxi cán cája na já. Ta cáhan̄ na táa joho Ndióxi na sahá ña cuaha cahan̄ na joo a juú ña ndaa. <sup>8</sup> Joo a cája ndó tá quiahva cája na cán jách̄i Ndióxi, tátá ndo sa xín̄i va mé á ndá quea xín̄i ñúhú ndo janda tá caman̄i caca ndó ña nu á. <sup>9</sup> Ña yóho quea ndítahan̄ cachi ndó tá xíca tahví ndó nu Ndióxi:

Tátá Ndióxi, ña ín̄ indiví,  
cáhn̄u ná cacuu quiv̄i ndó.

<sup>10</sup> Ná tandaa quíi quiv̄i cacomí ndó cuéntá sahá nde.

Ta ná coo tá ín̄ cún̄i mé ndó coo ñuyiví yóho tá quiahva ín̄ indiví cája ndó.

<sup>11</sup> Quiahva ndó nuú nde ña ndíman̄i nuú nde cuxu nde in in quiv̄i.

<sup>12</sup> Caja cáhn̄u ini ndó sahá cuachi nde tá quiahva cája cáhn̄u ini mé nde sahá ña núu cája ñayivi xih̄in nde.

<sup>13</sup> Ta a quiahva ndó ñaman̄i ña ná coto ndojó tiñáhá sacuaha ndehe já ná a cája nde cuachi nu ndó.

Jách̄i cómí ndó cuéntá saha tóco ndihi ñayivi,  
ta cúu cája ndó tóco ndihi ñaha,  
ta cáhn̄u cúu mé ndó anda ama cáa quiv̄i.

Já ná coo, quiahva já cachi ndó tá xíca tahví ndó nu Ndióxi.

14 Jáchí tá cája cáhnu ini ndó sahá ña núu cája inga na xihín ndo já queá caja cáhnu ri ini Ndióxi, tátá ndo, mé a íin indiví sahá ndo. 15 Ta tá co cúni ndo caja cáhnu ini ndó sahá ña núu nacaja inga na xihín ndo já queá a cája cáhnu ini Ndióxi sahá cuachi cája ndó.

*Jánaḡa Jesús ndaja ndítahan caja na tá cajuhun na*

16 Tá cajuhun ndó a cája ndó tá quiahva cája na co cúu ná tá quiahva ndáa na. Na cán cúni na ña ná cuni táhyí tóco ndihi ñayivi ña xijuhun na sahá ña cán queá cája cueḡa nuu na já ná ndiñehe jíco ñahá na. Mé a ndaa cáchí i xihín ndo ña sa yahvi na cúu ña xíní ñayivi na. 17 Joo ndóhó, tá ná cajuhun ndó ndítahan cuchú nuú ndo ta ndaja vií ndó mé ndó. 18 Já queá ná a cúni ñayivi ña xijuhun ndó ta in túhún Ndióxi, tátá ndo, mé a íin tuun xihín ndó cándaḡa ini ña mé a ndaa xijuhun ndó ta mé á queá chahvi a sahá ña cája ndó jan.

*Indiví cúu nu ndítahan ndaja tútú ñayivi ña vaḡa (Lc. 12:33-34)*

19 'A ndúcú ndó játaca cuḡhá ndivaha ndó ña cuíca canduu nu ndo ñuyíví yóho jáchí yóho cúu nu quíhvi tíquijí ñaha ndó jándihi rí sahá ta já tíví ndihi ñaha ndó. Ta jári cuu quíhvi ta cuíhná caja cuíhná da ña. 20 Vaḡa cháḡa ná játaca ndó ña vaḡa indiví jáchí cán coo quíhvi toho tíquijí jándihi rí sahá ñaha ndó. Ta mé cán ni in ñaha co tíví ta ni ta cuíhná a cúu ndíhvi caja cuíhná. 21 Jáchí nuú nandaja tútú ndo ña ndáyahvi nu ndó, cán coo ri ínima ndo.

*Nduchú núú yọ cúú á tátuhun lámpara ña jándiyehé nu xíca í  
(Lc. 11:34-36)*

<sup>22</sup> 'Nduchú núú yọ cúú á tátuhun in lámpara jándiyehé nu yó já xíní yọ nu xíca í. Ta tá tívi vaha nduchú núú yọ já cuu candehé vaha í nu xíca í.  
<sup>23</sup> Joo tá cọ tívi nduchú núú yó já quéa xíca yó nu naá ndivaha. Ta tá cáhán yọ ña cúú yó na xíca nu yéhe ndivaha ta cáa ví yó cája í cuachi já quéa cúú yó tátuhun na xíca nu naá ndivaha.

*In ñaha cúú Ndióxi ta inga ñaha cúú jiuhún  
(Lc. 16:13)*

<sup>24</sup> 'Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quihvi ini chága na. Á tá cọó ta caja ndíví vaha na chuun nuú in xitoho na ta inga na cán a cája chúun vaha na nuu. Ta quiahva já íin ri xihin ndóhó va jáchi a cúu caja cáhnu ndó Ndióxi tá chínúu ndó ínimá ndó jatá jiuhún ndo.

*Ndáa Ndióxi na cúú cuéntá mé á  
(Lc. 12:22-31)*

<sup>25</sup> 'Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó saha jáhma candixi ndó. Jáchi tá tácu ndo, ña jan cúú ña cáhnu chága a juú ga ña cuxu ndó. Ta íin chága saha yiquí cuñu ndó a juú ga jáhma ndíxi ndó jan. <sup>26</sup> Candehé ndó laa ndáchí nu táchi jan: rí jan ní cọ xútu rí ta ni a vája sáhan rí jáquee rí ta ni cọ yáca rí nu táán vaha rí nuní rí. Ta Ndióxi, tátá ndo, mé a íin indiví sáhan ña xíxi rí jan nu rí. Á cọ xíní ndó ña íin chága saha mé ndó a juú ga laa cán.

Sahá ña cán quíahva mé á ña xíní ñúhú ndó catacu ndó. <sup>27</sup> Ta coó saha toho ña ndícani nahá ini ndó jáchi a cuú ndaja jícó ndó mé ndó java metro chága sahá ña ndicani ini ndó.

<sup>28</sup> Ta ni co ndítahan ndicani ini ndó saha jáhma candixi ndó. Candehé ndo ndá quíahva ndató sáhnú itá yúcu. Mé ita jan ni co cája chúun a ta ni co cávaha jáhma á. <sup>29</sup> Joo mé a ndaa ná cahan i xihín ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuíca. <sup>30</sup> Candehé ndó ndaja ndaa vaha Ndióxi yucu ita vatí ín tóo a viti ta itaan cáyi a jándihi sahá. Ndaja ga ví caja Ndióxi xihín ndóhó ña quíahva mé á tóco ndihi ña xíní ñúhú ndó catacu ndó. Joo mé ndó co cándúsa ndó ña candaa mé á ndohó. <sup>31</sup> Ña cán quíahva a ndícani ini ndó saha ndá ña cuxu ndó á sahá ña coho ndó á sahá ña candixi ndó. <sup>32</sup> Jáchi na co xíní íchi cuéntá Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuéntá Ndióxi, tátá ndo ín indiví ta xíní vaha mé á ña ndímaní nu ndó catacu ndó. <sup>33</sup> Joo ndítahan nu ndó ndiquíahva ndó mé ndó ndáha Ndióxi ña ná cacomí mé á cuéntá saha ndó ta já quíahva mé á ña ndímaní nu ndo catacu ndó. <sup>34</sup> A ndícani ini ndó sahá ña quixi nu ndó inga quiví itaan jáchi Ndióxi cuití va xíní a ndía vaxi nu ndó quiví itaan ta coó sahá ndicani ini ndó sahá ña ndoho ndó itaan.

## 7

*Co ndítahan candehé ndaa yó ñayivi  
(Lc. 6:37-38, 41-42)*



1 'A cándehé ndaa ndó ñayivi já ná a cándehé ndaa Ndióxi ndohó. 2 Jáchí tá quiahva cája ndó xihín inga ñayivi quiahva já caja ri Ndióxi xihín ndohó va. Sahá ña cán quéa tá quiahva sándehé ndaa ndó ñayivi quiahva já caja ri Ndióxi xihín mé ndó. 3 Jáchí ndá cuéntá quéa sándehé ndó ña núu cája ñani táhan ndó ta cō sándehé ndo ndá quiahva náhnu chága ña núu cája mé ndó. Cúú á tátuhun ndácaan in xehe loho nduchú núú ñani táhan ndó nani ndácaan in yító ndúhu cáhnu ini nduchú núú ndo. 4 Ta tá a cuú cuni ndó yitó cáhnu ndácaan ini nduchú núú mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” 5 Jándahvi ndó mé ndó xihín ña cája ndó. Xíní ñúhú tavá ndó yitó cáhnu ndácaan nduchú núú mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó.

6 'A quiahva ndó ña yii cuéntá Ndióxi nuú ñayivi quini. Jáchí tá cája ndó já cúú á tátuhun tá ná quiahva ndó ñaha yii nuú tina ta tiahva náá ndicó cōo rí tiin rí ndohó. Ta jári cúú á tátuhun tá ná quiahva ndó ñaha yahvi ndivaha tátuhun perla nu cóchí jáchí cuu cuani nihni rí ña.

*Ndaja caja í cacá í ñamaní nu Ndióxi  
(Lc. 11:9-13; 6:31)*

7 'Ndá ñaha ndímani nu ndó xíní ñúhú cacá ndó ña nu Ndióxi ta já quiahva mé á ña nu ndo. Ndin-ducú ndó ña cúní ndo ta ñehé ndó ña caja Ndióxi. Cúú á tátuhun catí ndáha ndo yéhé ta já nuna yéhé nu ndo. 8 Jáchí na xíca in ñaha, na cán cúú na ñéhe va. Ta na ndúcú ñaha, na cán cúú na ndíñehé ña.

Ta n̄a cáti ndáha yéhé, n̄a cán cúu n̄a ndínuna yéhé nuu.

<sup>9</sup> Ta ndá ndó, n̄a ndúu jahyi ta tá xíca jahyi ndó pan cuxu a nu ndó, ama cuéhé ri ndó quiahva ndó yuu nu á ña ná caxí a. <sup>10</sup> Ta ama ná quiahva ri ndó in coo nu á caxi tá xíca tiyacá nu ndó cuxu a. Co cája ndó já. <sup>11</sup> Candehé ndó. Vatí mé ndó cúu ndó ñayivi cája cuachi joo xíni vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndó, mé a ín indivi xihin ndó. Quiahva mé á ña vaha nu ndó tá ná cacá ndó ña nu mé á.

<sup>12</sup> Candehé ndó. Tá quiahva cúni ndó caja ñayivi xihin ndó quiahva já ndítahan caja ri ndóhó va xihin ná jáchi ña yóho quéa sáhdá ley Moisés xihin ña n̄acahyí n̄a profeta caja ndó.

*Yéhé táhán cúu nuú quihvi n̄a cuhun indivi  
(Lc. 13:24)*

<sup>13</sup> Cúu á tátuhun ín ivi yéhé. In yéhé cúu á ña táhán ndivaha ta xíni ñúhú ndinducú ndó ndihvi ndó cán. Jáchi inga yéhé cúu á ña ndíca ndivaha nuú ndihvi na cuhun indayá. Ta cuahá ndivaha ñayivi cúu n̄a xíca íchi ndíca cuahan n̄a indayá nuú ndihi saha ná. <sup>14</sup> Joo ña cúu íchi ña ndáca ñayivi yéhé táhán nu ndihvi na indivi cúu á ichi táhán ndivaha ta yáncá ndivaha caca nuu í nu á. Ta chá ndivaha cúu n̄a ndihvi cán.

*Xihin cuhi cúun nuú in yító cuu ndicuní ndá yító  
cúu dó  
(Lc. 6:43-44)*

<sup>15</sup> Cuéntá coo ndó xihin n̄a tuhún, n̄a cáchi cáhan n̄a cuéntá Ndióxi jan. Jáchi uun ndivaha cásaá n̄a nu ndó. Joo cúu ná tátuhun ndivahyí

quini ndivaha vatí náha na tátuhun ndicachi loho. <sup>16</sup> Cúú ndicuni ndó na xihín ña cája na. Jáchi ñayivi quini cō cája vaha toho na. Cúú á tátuhun tá a cuú cuun uva nuú tohíñú ta ni a cuú jáquee ndó titó ñuhú nuú tohíñú. <sup>17</sup> Ña cán quea tóco ndihi yitó vaha ndinuhu cuihi vaha cuití cúun nu do. Joo yitó quini ndinuhu cuihi quini cuití cúun nu do. <sup>18</sup> Dó cúú yitó vaha cán a cúu toho cana cuihi quini nu do ta ni yitó quini cán a cúu cuun cuihi vaha nu do. <sup>19</sup> Ta tóco ndihi yitó, dó cō cána cuihi vaha nuu, tahnda do ta quee dó nu cándaha ñúhu ña cayi do. <sup>20</sup> Sahá ña cán quea xihín ña cája ñayivi já cuu ndicuni ndó á cúú ná ñayivi vaha á cúú ná na quini.

*A juú ndihi toho ñayivi ndihvi na nuú cacomí Ndióxi cuéntá saha ná (Lc. 13:25-27)*

<sup>21</sup> 'A juú ndihi toho na cáchi cúú yehe xitoho na cuhun na nuú cacomí Ndióxi cuéntá saha ná. Na cája ña sáhdá Ndióxi, tátá i, mé a iin indivi na cán cuití cúú na cacomí mé á cuéntá saha. <sup>22</sup> Jáchi tá ná xinu cōo quivi caja vii Ndióxi sahá ñayivi já quea casahá cahan cuahá ndivaha ñayivi xihín i ta já cachi na já: “Jesús, mé ndó cúú xitoho nde ta xihín quivi mé ndó naxica nuu nde cahan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínima ñayivi ta xihín quivi mé ndó nacaja cuahá ndivaha nde ña xitúhún”, cachi na xihín i. <sup>23</sup> Ta anda já nducú ñehe e tuhun nu ná já cachi i já xihin ná: “Cō xini toho i yo cúú ndóhó. Caxoo ndó nuú i jáchi ndinuhu ña quini cája ndó”, cachi i xihin ná.

*Sácú Jesús quiahva sahá ivi da nacavaḥa vehe  
(Mr. 1:22; Lc. 6:47-49)*

<sup>24</sup> Ndá na xíní joho ña cáhan i ta cája na ña, na cán cúú ná tátuhun in dataa, da íin xíní túni ta nacavaḥa da vehe da jaṭa in tóto. <sup>25</sup> Ta tá naxinu javi já nasahnu yuta ta naxinu tachí quíni jatá vehe cán joo coó nandicava vehe da jáchi tóyíí cándichi vehe da jaṭa tóto cán. <sup>26</sup> Joo na xíní joho nu cáhan i ta co cája na ña, na cán cúú ná tátuhun in dataa, da co xíní túni ta nacavaḥa da vehe da nuú ñutí. <sup>27</sup> Tá nandihi já naxinu javi já nasahnu yuta ta naxinu tachí quíni jatá vehe cán. Anda já nandicava vehe da ta chí nandihi saḥa chí uun — nacachi Jesús jánaḥa ñayivi.

<sup>28</sup> Ta tá nandihi nacahan Jesús ña yóho já tóco ndihi ñayivi nacatontó na xíní joho na ndá quiahva jánaḥa mé á <sup>29</sup> jáchi tá jánaḥa mé á nu ná cáhan tá quiahva cáhan in da íin saḥa cahnda chuun ta co cáhan toho a tá quiahva cája na jánaḥa ley Moisés.

## 8

*Tá nandaja vaḥa Jesús in da ndóho cueḥe táhyi  
(Mr. 1:40-45; Lc. 5:12-16)*

<sup>1</sup> Tá nanuu Jesús jaṭa yúcu nuú nasanúu a cán já ndíco cuahá ndivaḥa ñayivi jatá cuahan. <sup>2</sup> Ta ndaja coo já nacayati in dataa, da ndóho cueḥe táhyi nu á. Ta já nacaxítí da nu á já nacachi da já xihin á:

—Cuu ndaja vaḥa ndó yeḥe, xitoho i tá cúni ndó —nacachi da xihin Jesús.

<sup>3</sup> Tá nandihi já nacani ndaa ndáḥa Jesús da já nacachi a já xihin dá:

—Cúni ña ná ndivahún ña cán quéa nandivahún viti —cáchi a xihín dá.

Tá ñacachi Jesús já chí ivi laá nandindaa cuehe táhyi nandoho da cán. <sup>4</sup> Anda já ñacachi Jesús já xihín dá:

—Candehé. A cáxi tuhun tohún ña yóho xihín ni in túhún ñayivi. Cuáhán ndacún nahun mún nuú jutú. Ta ndítahan jocún ñaha nu Ndióxi tátuhun sáhdá ley Moisés sanahá caja na sa nandivaha. Já ná candaá ini tóco ndihi ñayivi ña sa nandindaa va cuehe nasandohún —ñacachi Jesús xihín da cán.

*Tá nandaja vaha Jesús in da caja chuun nuú in jefe soldado*

*(Lc. 7:1-10)*

<sup>5</sup> Tá nandihvi Jesús ñuu Capernaum já ñacayati in da sáhdá chuun nuú soldado ñaquixi ñuu Roma nu Jesús jáchi cúni da caça da in ñamaní nu á.

<sup>6</sup> Já ñacachi da já xihín á:

—Á co cúni ndó caja ndó ñamaní ndaja vaha ndó mozo i, datacú jáchi cándúhu da vehe quíhvi da ñaxihí tuchu yiquí cuñu da ta a juú quiahva cáhíhvi yiquí cuñu da —ñacachi da cán xihín Jesús.

<sup>7</sup> Já ñacachi Jesús já xihín dá:

—Vaha va, cuhun i ndaja vaha i da —ñacachi Jesús.

<sup>8</sup> Anda já ñacachi tucu da sáhdá chuun nuú soldado cán já xihín Jesús:

—Candehé ndó. Coó saha toho yehe ña ná ndihvi ndó vehe e. Joo cahnda cuití ndó chuun janda nu in ndó yóho ta já ndivaha va mozo i. <sup>9</sup> Jáchi ndúu java na náhnu chága sáhdá chuun nuú i. Ta ndúu

ri soldado sáhndá ri yehe va chuun nuu. Ta tá chíndahá i in da ña ná cuhun da nu cuni mí i cuhun da ta cuahan da. Ta tá sáhndá i chuun nuú inga da ña ná quixi da nuú i ta vaxi da nuú i. Ta tá sáhndá i chuun nu mozo i ña ná caja da ña sáhndá i ta cája da ña —nacachi da cán.

<sup>10</sup> Tá naxini johó Jesús ña yóho já nacatontó a já nacachi a já xihín na ndíco cuahan cán:

—Mé a ndaa ná cahan i xihín ndo ña a ñaha cuni i tañu na Israel in da cándéé cáhnu nahá ini Ndióxi tá quiahva cándéé cáhnu ini da yóho Ndióxi.

<sup>11</sup> Candehé ndo ná cahan i xihín ndo ña quixi ñayivi ndijáá ní cúu saha ñuyívi ta cacoo na cuxu na xihín Abraham ta xihín Isaac ta xihín Jacob indivi nu iin Ndióxi cómi a cuénta saha ñayivi.

<sup>12</sup> Joo cuahá na Israel, na nanditahan nuu coo cán a cóo toho na cán. Ña caja Ndióxi xihín na cán quea cuita na jata véhe cuhun na nuú naá ndivaha. Ta cán cuacu ndivaha na janda quiahva chicáhñá mé nuhu ná —cáchi Jesús.

<sup>13</sup> Tá nandihí já nacahan tucu Jesús xihín da sáhndá chuun nuú soldado cán já nacachi a já xihín dá:

—Cuanúhu vehún. Nandivaha mosún tá quiahva cúnun jáchi nacandúsún yehe —nacachi Jesús xihín dá.

Chí mé hora já nandivaha mozo da cán.

*Tá nandaja vaha Jesús ña cúu xojo Pedro  
(Mr. 1:29-31; Lc. 4:38-39)*

<sup>14</sup> Nasahan Jesús vehe Pedro ta tá naxinu a cán cándúhu ña cúu xojo Pedro quíhvi ña jáchi chícaan cáhni ndeé ña. <sup>15</sup> Anda já natiin Jesús ndáha

ñá quíhvi cán ta chí nandindaa cáhni ña. Ta já nandac̄o ñá cán cája ndívi ñá nu ná.

*Tá nandaja vaha Jesús cuahá ndivaha na quíhvi  
(Mr. 1:32-34; Lc. 4:40-41)*

<sup>16</sup> Ta tá nacuaá já ñéhe cuahá ndivaha na na quíhvi xihín na ñúhu ínimā quini ini nuú Jesús. Ta xihín in túhún tuhun načahan mé á natavá ínimā quini ñúhu ínimā ñayivi ta jári nandaja vaha mé á tóco ndihi na quíhvi. <sup>17</sup> Ta tóco ndihi ña yóho nayaha já ná xinū coo nuú tuhun ña načahí profeta Isaías tá načachi da já: “Mé á nandiquehe ndihi a ña cávitá iní ta naxojo ndihi a cuehe yo”, cáhí tuhun Ndióxi.

*Na cúnj candico Jesús  
(Lc. 9:57-62)*

<sup>18</sup> Tá naxini Jesús ña a juú quiahva cándíhi táhan ñayivi ndúu na xihín á já našahnda chuun ña ná cojo cava na inga xoo tañuhú cán. <sup>19</sup> Joo načayati in da jánaḥa ley Moisés nu á já načachi da já xihín á:

—Maestro, cúnj candico i ndohó ndá nacuu nuú cuhun ndo —naçachi da xihín á.

<sup>20</sup> Já nanducú ñehe Jesús tuhun nu dá já načachi a já xihín dá:

—Ndicuii cúu rí ta vaṭi íin cáva ñúhu rí. Ta laa cúu rí ta vaṭi íin táca ñúhu rí. Joo yehe, da načindahá Ndióxi nduu ñayivi, chí ni nuú cuju mí i coó va —naçachi Jesús xihín dá.

<sup>21</sup> Ta inga da sa xíca xihín á načachi da já xihín á:

—Maestro, quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —nacachi da xihin á.

<sup>22</sup> Já nacachi Jesús já xihin dá:

—Xíní ñuhú candicún yehe viti jáchi ná cuhun mé ñayivi, na a ñáha cacu ndaa ínima jánduxu na ndii jan —nacachi Jesús xihin dá.

*Tá najacátáji Jesús tachí xihín tañuhú tá ndícojo do*

*(Mr. 4:35-41; Lc. 8:22-25)*

<sup>23</sup> Ta ndaja coo naquihvi Jesús ini in barco ta cátahan na xíca tuun xihin á cán cuahan na. <sup>24</sup> Ta nani xíca na nuú tañuhú cán cuahan na ta in náá cuití naxinu in tachí quíni ndivaha nuú tañuhú cán. Ta a juú quiahva ndeé nacasáhá ndícojo ticuúí cán janda quiahva nandichutú ticuúí ini barco cán. Joo cándúhu Jesús ini barco quíji va. <sup>25</sup> Anda já ndáva na xíca tuun xihin á cán nasahan na ndíñehe na ña. Já nacayuhú na já cáchí na xihin á:

—Chindeé ndó ndehe, xitoho nde. Jáchi cácoo barco cahá tañuhú cuahan do —nacachi na xihin á.

<sup>26</sup> Anda já nanducú ñehe Jesús tuhun nu ná já nacachi a já xihin ná:

—Ndá cuénta quéa yíhvi nahá ndo. Ndá cuénta quéa co cándeé ini ndó yehe —nacachi a.

Já nandacoo a ta jánani a tachí quíni cán xihín tañuhú cán ta já nacatáji uun tóco ndihi a cán. <sup>27</sup> Tá naxini na xíca tuun xihin á cán ña yóho já nacatontó na ta nacasáhá ndáca tuhún táhan na já cáchí xihin táhan na já:



—Ta ndá da cúu dataa yóho ña janda tachi xihín tañuhú cándúsa nu cáhan da —cáchi xihín táhan na cán.

*Tá naqueta ivi da ñúhu ínimá quini ini nuú Jesús  
(Mr. 5:1-20; Lc. 8:26-39)*

<sup>28</sup> Tá naxinu coo Jesús inga xoo tañuhú cán nu íin ñundáhyi cuéntá Gadara já naqueta ivi da ñúhu ínimá quini ini tañu nu ndúxu ndii. Ta nacayati da nuú Jesús. Ndívi mé da ñúhu ínimá quini ini yóho cúu dá tátuhun quítj, rí cuehe ndivaha. Sahá ña cán queá ni in túhún ñayivi a cuú yaha chí íchi cán. <sup>29</sup> Tá naxini da Jesús já nacasáhá da cáyuhú da nu já cáchi da já xihín á:

—Ndá cuéntá queá vasún quihvi nuún xihín nde, Jesús, da cúu in túhún jini já jahyi Ndióxi. Á vasún jándoho yachún ini nde tá cámaní yí ndinda daa tiempo ndoho ini nde —nacachi rí quini cán xihín Jesús.

<sup>30</sup> Ta ndaja coo yati cán nasanduu cuahá ndivaha cóchi xixáhan rí. <sup>31</sup> Ta mé rí quini ñúhu ini ndívi dataa cán naxica tahví rí nu Jesús já cáchi rí já xihín á:

—Tá ta ná tavún ndehe ini da yóho, quiahva ñamani nuú nde ña ná cuhun nde ndihvi nde ini cóchi nduu cáa —nacachi rí xihín Jesús.

<sup>32</sup> Anda já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndívi dataa cán já nasahan rí nandihvi rí ini cóchi cán. Ta chí ivi laá xínu tóco ndihi cóchi cán cuahan rí núu rí nu ndáyi yuhú tañuhú cán. Ta najáqueta nuu rí mé rí ini tañuhú chí nacandaa rí ticuí já naxihí rí.

<sup>33</sup> Ta chí a juú quiahva nayihví da ndáá cóchí chí naxinu ndivaha da cuahan da. Ta tá naxinu da ñuu já ñacasáhá da ndícani da ndaja cáa ña nayaha xihin ndíví da ñasañuhu ínima quini ini cán. <sup>34</sup> Andá já ñaqueta tóco ndihi ñayivi ñuu cán cuahan na candehe na Jesús. Ta tá naxini na mé á já naxica tahví na nu á ña ná quee a cuhun a.

## 9

### *Tá nandaja vaha Jesús in da naxihi tuchu saha (Mr. 2:1-12; Lc. 5:17-26)*

<sup>1</sup> Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á. <sup>2</sup> Ta cán ñéhe na in da quíhvi, da naxihi tuchu saha ta cándúhu da nu yívi loho ñéhe na ñacasaá na nu á. Ta tá naxini Jesús ndá quiahva cándeé ini da cán mé á já ñacachi a já xihin da quíhvi cán:

—Candehe, jahyi a. A ndícani toho inún jáchi cája cáhnu ini i sahá cuachún viti —ñacachi Jesús xihin dá.

<sup>3</sup> Java táhan da jánaha ley Moisés ñacasáhá da cáhán da já: “Mé da yóho ndája núu da Ndióxi xihin tuhun cáhan da jáchi ni in túhún toho ñayivi a cuú caja cáhnu ini sahá cuachi.” <sup>4</sup> Joo sa ñacandaa ini Jesús ña cáhvi ini da cán sahá ña cán quea nandaca tuhún a da já ñacachi a já xihin dá:

—Ndá cuénta quea cáhvi núu ini ndó sahá yehe.

<sup>5</sup> Á cáhán ndo ña ihvi chága cachi i xihin da yóho: “Ñacaja cáhnu ini i sahá cuachún viti.” Á tá coo ta cachi i xihin dá: “Cuándaco ta cuahán.” <sup>6</sup> Candehe vaha ndo ná ñaha i nu ndo ña ín sahá i, da

nachindahá Ndióxi nduu ñayivi caja cáhnu ini i sahá cuachi cája ñayivi ñuyíví yóho —nacachi Jesús xihín dá.

Tá nandihí já nandicahan tucu a xihín da naxihí tuchu saha cán:

—Ta viti cáhan i xuhun cuandacoo ndiquehe xito lohún ta cuanúhu vehún —nacachi Jesús xihín dá.

<sup>7</sup> Chí ivi laá nandacoo da quíhvi cán ta já naquee da cuanúhu dá. <sup>8</sup> Tá naxini ñayivi ndúu cán ña nacaja Jesús yóho já nayihví na ta nacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

*Tá nacana Jesús Mateo ña caca tuun da xihín á  
(Mr. 2:13-17; Lc. 5:27-32)*

<sup>9</sup> Tá nandihí já naquee Jesús cuahan ta nani xíca cuahan já naxini a in dataa naní Mateo, da ín coo nu sácoo da játaca jiuhún cuéntá impuesto. Ta nacana Jesús da já nacachi a já xihín dá:

—Naha quí candicún yehe.

Anda já nandaca ndichi Mateo ta nacasáhá ndíco da Jesús.

<sup>10</sup> Tá nandihí já ín coo Jesús xíxi a vehe da cán ta cán naxinu coo cuahá táhan na játaca jiuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xíca tuun xihín a cán. <sup>11</sup> Ta tá naxini na fariseo ña ndúu na cán xíxi na xihín Jesús já nacasáhá na ndáca tuhún na na xíca tuun xihín Jesús cán já:

—Ndá cuéntá quéa xíxi xitoho ndó xihín na játaca jiuhún cuéntá impuesto ta xihín java ga na cája cuachi —nacachi na fariseo cán.

12 Joo tá naxini joho Jesús ña yóho já ñacachi a já xihín na fariseo cán:

—Ñayivi ín vaḥa co xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. <sup>13</sup> Ta yeḥe coo vaxi toho i cana i na sa ín vaḥa. Vaxi i cana i ñayivi, na cája cuachi ña ná jándacoo na cuachi cája na. Xíní ñúhú cuḥun ndo jácuaha vaḥa ndó ña cúní cachi tuḥun Ndióxi tá cáchí a já: “Ña cúní quéa ná candáhví ini ndó ñayivi jáchí vaḥa chága ña yóho a juú ga ña ná joco ndó quítí nuú i”, cáchí tuḥun Ndióxi —cáchí Jesús xihín ná.

*Cáḥan Jesús ndá saḥa quéa cajuhun na  
(Mr. 2:18-22; Lc. 5:33-39)*

14 Tá nandihí na xíca xihín Juan, da jácandúta ñayivi cán naxinu coo na nu Jesús. Já ñacasáhá ndáca tuḥun na mé á já ñacachi na já xihín á:

—Ndávaḥa co xíjuhun toho na xíca xihín yóhó nani cuahá ndivaḥa xíjuhun mé nde xihín na fariseo —ñacachi na cán xihín Jesús.

15 Anda já nanducú ñeḥe Jesús tuḥun nu ná já ñacachi a já xihín ná:

—Á cáhán ndo canduu cuéḥa na ndúu in vicó tándaḥa nani ín mé da tándaḥa cán xihín ná. Uḥun. Jáchí cájii ini na. Joo xinu coo quívi candaa na da tándaḥa cán anda jáví casáhá cajuhun na. Ta cáchí i xihín ndo ña vaxi quívi candaa na yeḥe nuú na yóho ta anda jáví casáhá na xíca tuun xihín i cajuhun na —ñacachi Jesús.

16 Ta nasacu Jesús inga quiaḥva nu ná já cáchí a já:

—Ama ná jándaha ñayivi jahmá yatá xihín in túhun jáhma saá jáchi tá nandihí ndíndí a, sáhdá chága ví a jahmá yatá cán ta jándacáhnú chága ví a yávi ña nandicahmá na cán. <sup>17</sup> Ta ni cō táán na vino saá ini vósó níi yatá jáchi jácahndi mé vino cán níi ta cuita mé vino cán ta tívi vósó níi cája dó. Sahá ña cán quéa ndítahan taán yō vino saá ini vósó níi saá ná a ndíhi saha vino xihín vósó —cáchi Jesús.

*Tá nandaja vaha Jesús jahyi jhí Jairo xihín in ña nacani ndaa ndáha jáhma á*  
(Mr. 5:21-43; Lc. 8:40-56)

<sup>18</sup> Ta nani cáhan Jesús cándichi a naxinu cōo in da sáhdá chuun nuú na Israel. Já nacaxítí da nu á ta já nacachi da já xihín á:

—Jacá naxihí uun ña loho cúu jahyi jhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ña —nacachi da cán xihín Jesús.

<sup>19</sup> Anda já naquee Jesús cuahan xihín da cán ta ndáca na xíca tuun xihín á cán cuahan na. <sup>20</sup> Ta ndaja coo cán ín in ñañáha, ña ndítahví níi ña tíxi uxu ivi cuja. Ta nacayati ña chí jata Jesús já nacani ndaa ndáha ña yuhú jáhma á. <sup>21</sup> Jáchi nacaán ña: “Tá ná cani ndaa cuití ndáha í jáhma Jesús já ndivaha í”, nacaán ña. <sup>22</sup> Joo nandicoto nihni jata Jesús nu ña ta tá naxini a ña já nacachi a já xihín ña:

—A cáyhívi tohún, jahyi a. Nandivahún jáchi nacandúsún yehe —nacachi Jesús xihín ña.

Ta chí mé hora já ndivaha ña.

<sup>23</sup> Ta tá naxinu cōo Jesús vehe da sáhdá chuun nuú na Israel cán já naxini a ña sa ndúu música cán

ñá ná cūhūn nā jánduxu nā jahyi dā cán. Ta naxini a jándá johó sácu cóhó ñayivi ndúu na. <sup>24</sup> Ta chí já nācachi a já xihín tóco ndihi nā cán:

—Cuáhán queta ndó jatā véhe. Jáchi coó naxihí toho ñá loho yóho. Quíji cuití va ñá —nācachi Jesús xihín ñayivi ndúu cán.

Joo nācasáhá nā cán sácu ndaa ñahá nā. <sup>25</sup> Ta chí natavá Jesús nā jatā véhe. Ta tá nācayati a nu ñá cán já natiin a ndáha ñá chí ivi laá nandacoo ñá. <sup>26</sup> Ta ní cúu ñundáhyi cán nandicuita nuu tūhun sahá ñá nācaja Jesús cán.

### *Tá nandaja vaha Jesús ivi dā cuaá*

<sup>27</sup> Tá naquee Jesús cuāhan já ndíco ivi dā cuaá jatā cuāhan dā já nācasáhá cáyuhú cóhó dā já cáchí dā já xihín á:

—Jesús, dā naquixi chichi David caja ndó ñamani candáhví loho ini ndó ndehe —cáchí dā cáyuhú dā jatā Jesús.

<sup>28</sup> Ta ndaja coo naquihvi Jesús ini in vehe ta já nācayati ndíví dā cuaá cán nu á. Já nācasáhá ndáca tūhún a dā cán já nācachi a já xihín dá:

—Á cáhán ndo ñá cuu caja i jándiyehē nuu ndo —nācachi Jesús xihín dā cán.

—Ajan, xitoho nde. Cándúsa nde ñá cuu caja ndó ñá —nācachi ndíví dā cuaá cán xihín Jesús.

<sup>29</sup> Tá nandihí já nācani ndaa ndáha Jesús nduchú núu dā cán ta já nācachi a já xihín ndíví dā cán:

—Ná coo tá quiahva cúni ndo jáchi cāndeé ini ndó yehē —cáchí a.

<sup>30</sup> Tá nandihí já nācasáhá sándeheé ndíví dā cuaá cán. Ta nāhnda Jesús chuun nu dá ñá ná a cáxi tūhun da nuú ñayivi sahá ñá nācaja mé á xihín dá.

<sup>31</sup> Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña naja Jesús xihín dá.

*Tá nandaja vaha Jesús in da níhi*

<sup>32</sup> Nani naquee da cuaá cán cuahan da já nasaa java ñayivi nu Jesús ñéhe na in da níhi, da ndacaan ínimá quini ini. <sup>33</sup> Ta tá natavá Jesús ínimá quini ini da cán chí ivi laá nacasáhá cáhan da. Ta a juú quiahva nacatóntó ñayivi ta já cáchi na já:

—Ni in túhún tañu coó naxini nde in ñaha tátuhun ña yóho ñundáhyi Israel —nacachi na cán.

<sup>34</sup> Joo na fariseo cán nacasáhá cáchi na já:

—Rí cúú tiñáhá sacuahá nu rí quini sahan rí ndée rí nuú Jesús yóho ña ná tavá a ínimá quini ini ñayivi —nacachi na fariseo cán.

*Táhnda ini Jesús sahá ñayivi*

<sup>35</sup> Ndijáá ñuu náhnu xihín ñuu válí naxica nuu Jesús jánaḥa tuhun Ndióxi ini veñuhu na cán. Ta nacaxi tuhun a tuhun vaha xihín ñayivi ña sa nacayati quivi cacomí Ndióxi cuéntá saḥa ná. Ta nandaja vaha mé á tá nuú cueḥe ndóho ñayivi.

<sup>36</sup> Ta tá naxini Jesús ñayivi cuahá cán já natahvi ini a saḥa ná jáchi ndóho ini na ta cávitá ini na tátuhun ndicachi, rí coó da candaa ñahá. <sup>37</sup> Anda já nacachi Jesús já xihín na xica tuun xihín a cán:

—Mé á ndaa ndúu cuahá ndivaha ñayivi, na cúní cuni johó tuhun Ndióxi joo chá cuití na cúní cuhun na cahan na ña xihín ñayivi. Cúú á tátuhun ín cuahá ndivaha ní ña xíní ñúhú jáquee joo ndímaní ñayivi jáquee na ña. <sup>38</sup> Sahá ña cán queá xíní ñúhú caça tahví ndó nu Ndióxi ña ná chindahá mé á

chága nā cája chúun cuéntá mé á —cáchi Jesús xih̄in ná.

## 10

*Chíndahá Jesús nā xíca tuun xih̄in á ña ná cūhun nā cahan nā tuhun Ndióxi xih̄in ñayivi*

*(Mr. 3:13-19; Lc. 6:12-16)*

<sup>1</sup> Tá nandih̄i já nacana Jesús ndíhuxu ivi nā xíca tuun xih̄in á cán. Ta já nasahan ndée nu ná ña ná cuu tavá nā ínima quini ini ñayivi. Ta nasahan ndée nu ná ña ná ndaja vaha na tá nuú cuehe ndóho ñayivi. <sup>2</sup> Ña yóho cúu quivi ndíhuxu ivi nā cúu apóstol xíca tuun xih̄in á cán: Da nu cuítí cán naní da Simón ta cahan ri na Pedro xih̄in dá. Ta inga da cán cúu Andrés ñani da. Ta inga da cúu Jacobo xih̄in ñani da, Juan. Ndívi da yóho cúu dá jahyi Zebedeo. <sup>3</sup> Tañu nā cán ndácaan ri Felipe xih̄in Bartolomé xih̄in Tomás xih̄in Mateo, da najátaca jjuhún cuéntá impuesto. Ta cán ndácaan ri Jacobo, da cúu jahyi Alfeo xih̄in Lebeo, da cahan ri na Tadeo xih̄in. <sup>4</sup> Ta cán ndácaan ri Simón, da naxica cuéntá nā cananista xih̄in Judas Iscariote, mé da najicó túhún Jesús tá nu ndíhí cán.

<sup>5</sup> Tá nachindahá Jesús ndíhuxu ivi nā cán já nacachi a já xih̄in ná:

—Coto a cūhun ndó chí ñuu ñayivi tóho, nā cō cúu nā Israel. Ta ni a quíhvi ndó ñuu ñúhu chí estado Samaria. <sup>6</sup> Vaha chága ná cūhun ndó cahan ndó tuhun Ndióxi xih̄in nā Israel jáchi cúu ná tátuhun ndicachi, rí nandiñúhú. <sup>7</sup> Cuáhán ndó caxi tuhun ndó xih̄in ná ña sa nacayati quivi cacomí Ndióxi cuéntá sahá ñayivi. <sup>8</sup> Ta ndaja vaha ndó nā quíhvi ta jánditacu ndó ndii ta ndaja vaha ndó nā ndóho



cuehe táhyi. Ta tava ndó rí quini ñúhu ínima ñayivi. Ta a quehe ndó yahvi sahá ña caja ndó jáchi cóo naxeen ndó ndée ñehe ndó jan. <sup>9</sup> A cáñehe toho ndó ni jiuhun cuáan ni jiuhun cúxú ni jiuhún caa cuáhá caca nuu ndó. <sup>10</sup> Ta ni a cáñehe ndó yátí cūhun ndó íchi. Ta ni a cáñehe ndó inga naha jáhma ndó cūhun xihín ndó. Ta ni a cáñehe ndó inga ndusa ndó cūhun ndó. Ta ni garróté a cáñehe ndó cūhun ndó. Jáchi nditahan nuú ñayivi quiahva na ña nu ndó.

<sup>11</sup> Tá ná xinū cóo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinū quiví quee ndó cūhun ndó. <sup>12</sup> Ta tá ná xinū cóo ndó vehe jan cahan Ndióxi ndó xihín ná. <sup>13</sup> Ta tá ná ndiquehe vaha ñayivi vehe jan ndohó já quea cachi ndó xihín ná ña ná coo vaha ini na. Joo tá có cúní na ndiquehe vaha na ndohó já quea a cahan ndó xihín ná ña ná coo vaha ini na. <sup>14</sup> Ta tá có cúní na ndiquehe vaha na ndohó ta ni có cúní na cuni johó na nu cahan ndó já quea cuáhán queta ndó vehe jan á ñuu jan ta catí ndó ña yácá saha ndó já ná nahá ña cuahan cuachí na cán jata mé va na. <sup>15</sup> Jáchi mé a ndaa ná cahan i xihín ndó ña tá ná xinū cóo quiví caja vií Ndióxi sahá ñayivi ndúu ñuyiví já quea jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihín ñuu Gomorra sanahá sahá ña cóo nandiquehe na ndohó.

*Vaxi quiví caja xíxi ñayivi xihín na xíca cahan tuhun Ndióxi*

16 'Candehé ndo. Yehe chindahá i ndohó cūhun ndó tañu ñayivi quini. Cúu ndó tátuhun ndicachi válí tañu ndivahyí ña cán quéa xíní ñúhú cuéntá vaha coo ndó tá quiahva cája coo. Ta xíní ñúhú coo mánsó ndo tá quiahva cája ndijata. 17 Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta caní na ndohó ini veñuhu. 18 Ta saha mí i cañehe na ndohó cūhun ndó nuú na cúu gobernador á nuú na cómí cuéntá sahá in nación. Ta já ná cuu ndicani ndó sahá i nuú na cán ta xihín nuú na tóho, na coo cúu na Israel. 19 Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihín ná já quéa quiahva mé va Ndióxi tuhun nu ndó ña ná cuu cahan ndó sahá i nuú na cán. 20 Jáchi a juú jini mé ndó quixi ña cahan ndo. Ínima yii Ndióxi cacuu ña quiahva tóco ndihi ña cahan ndo.

21 'Ta java ta jicó túhún da ñani da ta java da jicó túhún da jahyi da ña ná cahní ñahá na. Ta java na ndicuíta na caní táhan na xihín tátá na ña ná cahní ñahá na. 22 Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. 23 Tá ná ndicuíta na caja xíxi na xihín ndó in ñuu já cunu ndó cūhun ndó inga ñuu. Jáchi mé a ndaa ná cahan i xihín ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáa ñuu ndácaan ñundáhyi Israel.

24 'Candehé ndo. Ni in túhún toho da xíca jácuaha tiyahva chága da nu mé dá janaña ñahá cán. Ta ni in túhún mozo coo cúu dá da cáhnu chága nuú

xitoho da. <sup>25</sup> In da jácuaha ndítahan cajii íní da tá sa xíni ndihi da ña xíni maestro da. Ta da cúu mozo ndítahan cajii ini da tá ná xinu da cacuu da cáhnu tátuhun xitoho da. Candehé ndo. Tá ná cachi ñayivi xihín da cúu xitoho ndó ña cúu da Beelzebú, rí cúu tiñáhá sacuahá ndaja ga ví cachi na xihín ndóhó.

*Yo já ndítahan cayihví yo  
(Lc. 12:2-7)*

<sup>26</sup> Candehé ndo. A cáyhví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá. <sup>27</sup> Ña cáhan yehe xihín ndó nuú naá xíni ñúhú cáhan ndó ña ndiví táhyí nani yehe candii. Ta ña cáhan jehé e xihín ndo xíni ñúhú ndaa ndó jini véhe cayuhú ndó ña. <sup>28</sup> A cáyhví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihín ínimá ndo. Ndióxi queá xíni ñúhú cayihví ndo jáchi mé a cuu jándihi a saha yiquí cuñu ndó ta cuu jácana mé a ínimá ndo ini indayá anda ama cáa quivi.

<sup>29</sup> Candehé ndo. Laa válí ndáchí ri nu táchi ta núu ndivaha jícó na ri. Joo ni in rí cán co cýu nu ñúhu ña quivi rí tá co sahan Ndióxi, tátá ndó ñamaní. <sup>30</sup> Ta viti caja ndó cuéntá xihín mé ndó. Janda ijí jini ndó jan ndáhvi tá in tá in a nu Ndióxi. <sup>31</sup> Ña cán queá a cáyhví toho ndó jáchi ndiyahvi chága ndo nu Ndióxi a juú ga cuahá ndivaha laa válí.

*Tá cáhan cáxi ñayivi ña cúu ná cuéntá Jesús  
(Lc. 12:8-9)*

<sup>32</sup> 'Ndá na cáxi tuhun nuú ñayivi ña cuahan na cuénta mí i já quea cachi mí i sahá na nu Ndióxi, tátá i, mé a lin indivi, ña mé a ndaa cúu ndusa na cán cuénta mí i. <sup>33</sup> Joo ndá na ná cachi xihín ñayivi ña co xini toho na yehe já quea ni yehe a ndícuni toho i na ña cúu ná cuénta mí i nu Ndióxi, tátá i, mé a lin indivi.

*Cája Jesús ña sáhdá java táhan ñayivi  
(Lc. 12:51-53; 14:26-27)*

<sup>34</sup> A cáhan toho ndó ña naxinu i ñuyivi yóho caja i ña ná coo vaha ini ñayivi. Co cája i já. Jáchi ña vaxi yehe caja i quea ná cahnda java táhan na. <sup>35</sup> Vaxi i jácani táhan i dataa xihín tátá da sahá yehe. Ta vaxi i jácani táhan i in ñañaha xihín náná ña sahá yehe. Ta vaxi i jácani táhan i ña cúu sanu xihín xojo ña sahá yehe. <sup>36</sup> Ta ndaja vehe mé ñayivi ndicuita na cani táhan na sahá yehe.

<sup>37</sup> 'Ta ndá na cúni chága tátá na á náná na a juú ga yehe já quea coo saha toho na cacuu na cuénta mí i. Ta ndá na quihvi ini chága jahyi yií na á jahyi jíhí na a juú ga yehe já quea coo saha toho na cacuu na cuénta mí i. <sup>38</sup> Ndá na co cúni ndoho ini sahá ña candico na yehe ta co lin tiahva na quivi na sahá i já quea coo saha toho na cacuu na cuénta mí i. <sup>39</sup> Jáchi ndá na cátóo coo chága na ñuyivi yóho, na cán cúu na ndihi saha. Joo na sahan ndeé ini quivi sahá i, na cán cúu na ñehe táhvi na catacu na anda ama cáa quivi.

*Ña quiahva Ndióxi nuú ñayivi  
(Mr. 9:41)*

<sup>40</sup> 'Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe,

ndíquehe vaha ri na Ndióxi, mé a nāchindahá yehe vaxi i ñuyívi yóho. <sup>41</sup> Ndá nā ndíquehe vaha in profeta vaxi cuéntá Ndióxi já queá tá quiahva coo yahvi ndiquehe profeta cán quiahva já coo ri yahvi ndiquehe nā cán. Ta ndá nā ndíquehe in taa vaha sahá ña cúu dá ñayivi vaha já queá ndiquehe nā cán yahvi na tá quiahva cáa yahvi ndiquehe taa vaha cán. <sup>42</sup> Ta ndá nā ná quiahva ñaha vatí in yáxi ticuí nuú in nā cúu jahyi i yóho sahá ña ndíco nā íchi cuéntá mí i, mé a ndaa ná cahan i xihin ndó ña chahvi Ndióxi sahá ñamani cája na xihin ná —cáchi Jesús.

## 11

*Juan, da jácandúta ñayivi nāchindahá da java da xica xihin dá nuú Jesús*

*(Lc. 7:18-35)*

<sup>1</sup> Tá nāndihi nanaha Jesús nuú nā xica tuun xihin á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

<sup>2</sup> Mé tiempo já nasandacaan Juan vecaa, mé dá cúu dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nāchindahá da java nā xica xihin dá nu á <sup>3</sup> ña ná ndaca tuhún nā Jesús á jivi ndusa cúu á Cristo, mé a chindahá Ndióxi cacomí a cuéntá sahá ñayivi, á ndítahan candati na inga ga quixi. <sup>4</sup> Tá nāndihi nandaca tuhún da cán Jesús sahá ña yóho já nācachi Jesús já xihin ná:

—Cuáhán ndó ndicani ndó nu Juan tóco ndihi ña naxini ndó cája i xihin tóco ndihi ña naxini joho

ndó cáhan i. <sup>5</sup> Ta ndicani ndó nu dá ña ndínuna nuú na cuaá ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndji. Ta cáxi tuhun i tuhun Ndióxi nuú na ndahví já ná cuu çacu ndaa ínimá ná. <sup>6</sup> Tahví naçuu na ço jándacoo ña cándéé ini na yehe —naçachi Jesús.

<sup>7</sup> Tá naçuee na naçindahá Juan cán cuañan na já naçasáhá Jesús cáhan xihín ñayivi já cáchí a já xihin ná:

—Ndía naçahán ndo cuni ndó tá naçqueta ndó naçahan ndó sándehé ndo Juan yucú íchí cán. A juú da cán cúu ãa láhá já quíji nuu da tátuhun quíji nuu in tóyoó cája tachi. <sup>8</sup> Ndía naçqueta ndó candehé ndó. A juú da cán cúu ãa ndíxi jahmá lándá ndivaha. Sa xini vaha ndó ña ço ndúu toho da ndíxi jahmá lándá yucú íchí. Ndá da ndíxi jahmá lándá cúu da ndúu vehe rey cuití va. <sup>9</sup> Ndía naçahan ndó candehé ndó cán. Á çoó naçahan ndó cuni johó ndó nu cáhan in da cúu profeta nu ndo. Mé a ndaa da cán cúu dá in profeta ta íin chága saha dá a juú ga inga profeta naçanduu sanahá. <sup>10</sup> Jáchi mé Juan cúu dá da cáhan tuhun Ndióxi saha tá cáchí a já:

Chindahá i in da cánúu cuhun nu mún, já ná çaja tiahvá da íchí nuú quisún, já naçahyi a sanahá.

<sup>11</sup> Candehé ndo ná çahan i xihin ndo. Tañu tóçó ndihi ñayivi çoó ga inga profeta çahnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúu ná na çoó saha, na cán cúu na çahnu chága a juú ga Juan.

12 'Janda quiví naxinu Juan, da jácandúta ñayivi ta janda viti ñuhú ndíhi ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúu na ñehe táhvi cacomí Ndióxi cuéntá saha. 13 Janda tá cámani xinu Juan tóco ndihi ña nacahyí na profeta xihín ña nacahyí Moisés cáhan ña vaxi quiví cacomí Ndióxi cuéntá sahá ñayivi. 14 Ta tá cuni ndo candúsa ndó ña nacahyí na cán sanahá já cuu candaa ini ndó ña Juan cúu dá da nacahan na cán saha tá nacachi na ña ndítahan quixi tucu profeta Elías ñuyiví yóho. 15 Na ín johó, ná cuni johó na.

16 'Ná cahan i xihin ndó ndaja ín ñayivi ndúu tiempo viti. Cúu ná tátuhun na valí sácoo sájiquí na nuú yahvi ta cáyuhú na nuú java ga na valí ndúu cán ta já cáhí na já: 17 "Nativí nde tótiví nu ndo joo coo naxeen ndó cata sahá ndo. Ta naxita cuéha ndivaha nde nu ndo ta ni coo nasacu ndó." 18 Quiahva já ín ñayivi ndúu tiempo viti jáchi tá naquixi Juan, da jácandúta ñayivi ta naxijuhun da ta ni coo naxihi da vino joo nacachi ndó saha dá ña ndácaan ínima quini ini da. 19 Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasahá cáhí ndó sahá i ña cúu u in taa ndehé ndivaha ta xíhi ndivaha i. Ta cáhí ndó ña cátoó ndivaha i cacuu amigo na cája cuachi xihín na játaca jiuhún cuéntá impuesto. Joo na cuni cándaa ini ña ndaa, na cán cúu na cándaa ini ña cája Juan ta cája ri yehe ña ndaa —nacachi Jesús xihin ná.

*Ñayivi sáa ini co cuni na caja na ña cuni Ndióxi  
(Lc. 10:13-15)*

20 Tá nandihí já nacasáhá Jesús jánani a ñayivi ndúu ndíjáá ñuu nuú nacaaja cuaha chága mé á ña xitúhún. Jáchi vatí nacaaja cuaha mé á ña xitúhún nu ná coó nandicó coo ini na nu Ndióxi. Ña cán quea nacachi Jesús já xihin ná:

21 —Ndáhví nahá nacuú ndó, na ñuu Corazín. Ta ndáhví nahá nacuú ndó, na ñuu Betsaida. Cuahá ndivaha ña náhnu nacaaja i nu ndo joo coó naxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva nacaaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndii ta jácuuyu na yaa yiquí jíní na, nduu. Jáchi xihín ña yóho jánaha na ña nandicó coo ini na sahá cuachi na. 22 Mé a ndaa ná cahan i xihin ndo tá ná xinú quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Tiro xihín ñuu Sidón sanahá. 23 Ta viti cahan i xihin ndó, na ndúu ñuu Capernaum. Janda indiví cúni ndó cuhun ndó joo sahá ña sáá ini ndó cuhun ndó janda indayá, caja Ndióxi. Jáchi tá ná caja i ña xitúhún nuú ñayivi ñuu Sodoma tá quiahva nacaaja i nu ndóhó ta ni a ndíhi sahá ñuu cán, nduu. 24 Mé a ndaa ná cahan i xihin ndo ña tá ná xinú quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Sodoma sanahá —nacachi Jesús.

*Tá nacajii ndivaha ini Jesús  
(Lc. 10:21-22)*

25 Mé tiempo cán nacahan Jesús já nacachi a já:



—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyivi. Jáchí najánaña ndó ña ndichí ndivaña nuú ñayivi, na coó cuahá saha nuú java ga na. Ta nacaja ndó ña ná a cúu candaá ini na ndichí xihín na tácu ini ñaha mé ndó. <sup>26</sup> Já nacaja ndó jáchí já nasacu ini ndó caja ndó —nacachi Jesús.

<sup>27</sup> Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuénta sahá. Ta ni in túhún toho ñayivi co xini vaña na yehe, da cúu in túhún jiní já jahyi Ndióxi. Mé Ndióxi, tátá i cuití va xini vaña yehe. Ta ni in túhún toho na co xini vaña na yo cúu tátá i. In túhún yehe, da cúu jahyi a xini vaña i yo cúu mé á. Ta yehe cúu da caxi ndá ñayivi jánaña i nuu sahá Ndióxi, tátá i já ná candaá vaña ini na yo cúu mé á. <sup>28</sup> Naha ndihi ndó nuú i, na sa nacanaá cája chúun. Taxi ndó ña ndójo ndó jan nuú i ta já yehe caja i ña ná ndiquehe ndée ndo. <sup>29</sup> Yehe cúni ña ná ndiquiahva ndó mé ndó ndahá i. Ta ña yóho cúu á tátuhun in yúcu chínúu na sahá jiqui tindi qui. Ta xini ñuhú catiahva ndó caja ndó tá quiahva cája yehe. Jáchí coó cama jiní i xihín ñayivi ta cúu u ta manso ndivaña. Quiahva já caja ndó já ñehe íní ndo ndiquehe ndée ndo. <sup>30</sup> Jáchí yúcu chínúu i jata ndo xihín ñaha jácojo i jata ndo cúu á ña cama ñuhú laá —nacachi Jesús.

## 12

*Ña nacaja na xica tuun xihín Jesús in quivi ndiquehe ndée ñayivi  
(Mr. 2:23-28; Lc. 6:1-5)*

<sup>1</sup> Ta ndaja coo in quiv̄i ndíquehe ndée ñayivi xíca Jesús cuah̄an tañu nuú naxutu na trigo. Ta sahá ña cuico na xíca tuun xih̄in Jesús sahá ña cán quéa ñacasáhá na túhún na java yucu jin̄i trigo cán ta tává na trigo sáxí na. <sup>2</sup> Tá naxini na fariseo ña yóho já ñacasáhá na cáh̄an cuachí na nuú Jesús. Já cáchí na já:

—Candehé. Na xíca tuun xuhun jan cája na chuun ña co ndítahan caja ñayivi quiv̄i ndíquehe ndée yó —ñacachi na xih̄in Jesús.

<sup>3</sup> Já nanducú ñehe Jesús tuhun nu ná já ñacachi a já xih̄in ná:

—Á a ñáha toho cahvi ndó nuú tuhun Ndióxi nu cáh̄an sahá ña ñacaja David sanahá tá ñacuico da xih̄in na xíca xih̄in dá. <sup>4</sup> Ña ñacaja da quéa ñaquih̄vi da ini veñuhu Ndióxi ta naxixi da pan ña yii. Ta ni nu mé dá ta ni nuú na xíca xih̄in dá cán co cáni a nuu cuxu na pan cán. In túhún jut̄u cuití va cáni a nuu cuxu na pan cán. <sup>5</sup> Ta á a ñáha toho cahvi ndó ña ñacah̄yí Moisés nu ley tá ñacah̄yí da ña co cája toho jut̄u cuachi nu Ndióxi vatí cája chúun da veñuhu quiv̄i ndíquehe ndée ñayivi. <sup>6</sup> Mé a ndaa ná cah̄an i xih̄in ndo ña ín chága sahá i, da cándichi yóho a juú ga sahá veñuhu nu cája cáhnu na Ndióxi jan. <sup>7</sup> Mé ndó co cándaa toho ini ndó ña cúni cach̄i tuhun Ndióxi tá cáchí a já: “Yehe cúni ña ná candáhvi ini ndó ñayivi jách̄i vaha chága ña yóho a juú ga ña ná joco ndó quít̄i nuú i”, cáchí tuhun Ndióxi. Jách̄i tá ná cándaa ini ndó tuhun yóho, nduu ta a chícaan toho ndó cuachi jatá ñayivi, na cóo cuachi. <sup>8</sup> Candehé ndó. Yehe, da ñachindahá

Ndióxi nduu ñayivi, íin sahá i cahnda i chuun sahá quivi ndiquehe ndée ñayivi —nacachi Jesús.

*Tá nandaja vaha Jesús in da nahichi ndáha*  
(Mr. 3:1-6; Lc. 6:6-11)

<sup>9</sup> Tá nandihí já naquee Jesús cuahan já nandihvi a veñuhu mé ñuu cán. <sup>10</sup> Ta cán nasandacaan in dataa, da nahichi ndáha. Ta sahá ña ndúcú na fariseo nduu cán ndá quiahva caja na já ná cuu chicaan na cuachi jatá Jesús sahá ña cán quea nandaca tuhún na mé á já nacachi na já:

—Á sahan Ndióxi ñamaní ndaja vahún na quihvi quivi ndiquehe ndée yo —nacachi na cán xihin á.

<sup>11</sup> Anda já nacachi Jesús já xihin ná:

—Candehé ndó. Tá íin in ndicachi loho jana ndo ta tá ná ndicava rí ini in táhvi quivi ndiquehe ndée yo, ama ná a cühun ndó tavá ndó rí. <sup>12</sup> Ta ndiyahvi chága ñayivi a juú ga ndicachi. Ña cán quea sahan Ndióxi ñamaní cája í ña vaha quivi ndiquehe ndée yo —nacachi Jesús xihin ná.

<sup>13</sup> Tá nandihí nacachi a já xihin dataa, da nahichi ndáha cán já:

—Jándacaa ndáhun —nacachi a xihin dá.

Tá najándacaa da ndáha dá já nandivaha ndáha dá. Ta cáa tá quiahva cáa inga ndáha da cán. <sup>14</sup> Joo tá naqueta na fariseo cán já nacasáhá na jándique táhan na tuhun na ña cahní na Jesús.

*Ña cahan Isaiás sahá Jesús*

<sup>15</sup> Tá nañehé Jesús tuhun ña ndúcú na cán cahní ñahá na já naquee a cuahan va ta cuahá ndivaha ñayivi ndíco jatá cuahan. Ta ndaja táhan na quihvi nandaja vaha Jesús. <sup>16</sup> Ta nasahnda Jesús chuun

nuú na sa nandivaha cán ña ná a cáxi tuhun na nuú ñayivi yo cúú mé á. <sup>17</sup> Tóco ndihi ña yóho nayaha já ná xinu coo nuú tuhun nacahyí profeta Isaías tá nacahyí da já:

<sup>18</sup> Yóho íin da cája chúun cuéntá mí i, mé dá nacaxi i.

Quíhvi ndivaha ini i da ta cájii íní i xihín ña cája da. Ta jáchutu ndaa i ínimá dá xihin ínimá yii mí i, ña ná jánahá da nuú ñayivi ndúu ñuyiví ndá quiahva cája vii i saha ná.

<sup>19</sup> Ta ni a cáhan cuachi toho da ta ni a cáyuhú cóhó da,

já queá a cúni johó ñayivi xíca cállé nu cáhan da.

<sup>20</sup> Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúni ndahva janda quiahva ná quee vaha ña ndaa xihín ña ihvi.

<sup>21</sup> Ta ndaja táhan ñayivi ndúu ní cúú ñuyiví tandaa candeé ini na mé dá, nacahyí Isaías sanahá.

*Jácojo na cuachi jatá Jesús ña cája chúun a xihin ndé tiñáhá sacuahá*

*(Mr. 3:20-30; Lc. 11:14-23; 12:10)*

<sup>22</sup> Java ñayivi ñéhe na in da cuaá ta cúú dá da níhi jáchi ndacaan rí quini ini da. Ta tá nandaja vaha Jesús da já nasandehé da ta nandicahan da.

<sup>23</sup> Tá naxini ñayivi ndúu cán ña yóho já nacatontó ndivaha na já nacasáhá ndaca tuhún táhan na já cáhí na já:

—Á a juú da yóho cúú da naquixi chichi rey David —cáhi xihin táhan na.

24 Tá naxini j<sub>o</sub>ho n<sub>a</sub> fariseo ñ<sub>a</sub> cáhan ñ<sub>a</sub>yivi cán já nacasáhá cáchí mé n<sub>a</sub> fariseo cán já:

—Taa yóho cúú tává d<sub>a</sub> rí quini ñúhu ini ñ<sub>a</sub>yivi jáchi mé Beelzebú, rí cúú tiñáhá sacua<sub>h</sub>a n<sub>u</sub> rí quini cán sáhan rí ndée rí n<sub>u</sub> dá cája da ñ<sub>a</sub> —nacachi ñ<sub>a</sub>.

25 Ta s<sub>a</sub> xíni va Jesús ñ<sub>a</sub> cáhvi ini n<sub>a</sub> cán sahá ñ<sub>a</sub> cán qué<sub>a</sub> nacachi a já xih<sub>i</sub>n ná:

—Tá sáhndá java táhan ñ<sub>a</sub>yivi ndúu in nación ta ndúu na cua<sub>h</sub>a táhndá já cásáhá cáni táhan ndaja táhan mé va na já cama chá ndihi sahá n<sub>u</sub> ndúu n<sub>a</sub> cán. Ta quia<sub>h</sub>va já yáha ri xih<sub>i</sub>n in ñ<sub>u</sub> á in vehe tá sáhndá java táhan ndaja táhan mé ná já qué<sub>a</sub> jándihi na sa<sub>h</sub>a ná. 26 Ta quia<sub>h</sub>va já yáha xih<sub>i</sub>n Satanás, rí cúú tiñáhá sacua<sub>h</sub>a. Ta tá ná tavá rí inga rí quini ini ñ<sub>a</sub>yivi á tá ná cani táhan ndaja táhan mé rí já qué<sub>a</sub> ndihi sa<sub>h</sub>a ndée ñ<sub>a</sub> cómi rí. 27 Mé ndó cáchí ndó ñ<sub>a</sub> tává i rí quini ini ñ<sub>a</sub>yivi xih<sub>i</sub>n ndée Beelzebú, rí cúú tiñáhá sacua<sub>h</sub>a. Joo tá mé a ndaa cúú ndusa ñ<sub>a</sub> cáchí ndó sahá i jan, ndáchí quéhe n<sub>a</sub> cúú cuéntá mé ndó jan ndée tavá n<sub>a</sub> rí quini ini ñ<sub>a</sub>yivi. Ama ná cachi ndó ñ<sub>a</sub> tává ndó rí quini xih<sub>i</sub>n ndée tiñáhá sacua<sub>h</sub>a. Ñ<sub>a</sub> yóho náha ñ<sub>a</sub> c<sub>o</sub> cáhvi ndaa ini ndó. 28 Candehé ndó. Yehe tává i ínima quini ini ñ<sub>a</sub>yivi xih<sub>i</sub>n ndée ínima y<sub>i</sub>i Ndióxi. Ta xih<sub>i</sub>n ñ<sub>a</sub> yóho náha cáxi a ñ<sub>a</sub> s<sub>a</sub> naxinu c<sub>o</sub> quivi cacomí Ndióxi cuéntá sa<sub>h</sub>a ndó.

29 'Candehé ndó. Sácú u in quia<sub>h</sub>va n<sub>u</sub> ndó. Ni in d<sub>a</sub>taa a cúu ndihvi da caja cuíhná d<sub>a</sub> ñ<sub>a</sub>ha vehe in d<sub>a</sub> ndacú joo tá ná cató d<sub>a</sub> d<sub>a</sub> ndacú cán já cuu quehe da ñ<sub>a</sub>ha d<sub>a</sub> cán.

30 'Ndá n<sub>a</sub> c<sub>o</sub>o cua<sub>h</sub>a xoo i, cúú ná n<sub>a</sub> c<sub>o</sub> cúní yehe. Jáchi ndá n<sub>a</sub> c<sub>o</sub> chindeé yehe xih<sub>i</sub>n ñ<sub>a</sub> cája i,

cúú ná na sájí nuu nuú i.

<sup>31</sup> Ña cán quéa cáchí i xihín ndo ña caja cáhnu ini Ndióxi saha tá nuú cuachi cája ñayivi xihín saha tá nuú tuhun quini cáhan na. Joo tá ná cahan núu na saha ínimá yii Ndióxi já quéa a cája cáhnu toho ini Ndióxi sahá ña nacaja na. <sup>32</sup> Caja cáhnu ini Ndióxi jandá saha ndá na ná canahá xihín yehe, da nachindahá Ndióxi nduu ñayivi joo tá ná canahá na xihín ínimá yii Ndióxi já quéa a cája cáhnu toho ini Ndióxi saha ná ni nani tácu na ndúu na ñuyívi yóho ta ni tá cuhun na cavií saha ná nu Ndióxi.

*Xihín cuíhi cúun nuú in yító cuu ndicuní ndá yító cúú dó*

*(Lc. 6:43-45)*

<sup>33</sup> Xíní ñúhu jándee ndó yító vaha ña ná cuun cuíhi vaha nu do. Jáchi tá ná jándee ndó yító núu já quéa cuíhi núu cuun nu do. Jáchi xihín cuíhi cúun nuú in yító cuu ndicuní ndá yító cúú dó. <sup>34</sup> Mé ndó cúú ndó tátuhun coo jáchi cúú ndó na quini sahá ña cán quéa cáhan ndó tuhun quini ta a cuú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínimá ná. <sup>35</sup> In ta vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in ta quini cáhan da ndinuhu ña núu jáchi ña núu quéa ndácaan ínimá dá. <sup>36</sup> Mé a ndaa ná cahan i xihín ndo ña tá ná ndindaa quívi caja víi Ndióxi sahá ñayivi ndúu ñuyívi anda jávi ndiquiahva ñayivi cuéntá nu Ndióxi sahá ndaja táhan tuhun núu nacahan na ñuyívi yóho. <sup>37</sup> Jáchi saha mé tuhun nacahan ndó jan caja víi Ndióxi saha ndo. Ta xihín ña jan cachi Ndióxi ña á in cuachi ndó á coó cuachi ndó —cáchi Jesús.

*Xíca ñayivi quini ña ná caja Jesús ña xitúhún nu ná  
(Mr. 8:12; Lc. 11:29-32)*

<sup>38</sup> Java na fariseo xihín na jánaha ley Moisés naçahan na xihín Jesús já naçachi na já xihin á:

—Maestro, cuni nde ña ná caja ndó in ñaha xitúhún nuú nde já ná cuni nde —naçachi na xihín Jesús.

<sup>39</sup> Já nanducú ñehe Jesús tuhun nuú na cán já naçachi a já xihin ná:

—Ñayivi quini, na co cuni cándusa Ndióxi, na yóho cúu na cuni cuni ña xitúhún. Joo a cuni toho na ña. Ña cuni ndusa na quéa ña ndoho i tá quiahva nandoho Jonás, da nasacuu profeta sanahá. <sup>40</sup> Jáchí tá quiahva nasandacaan Jonás uni quivi xihín uni ñuú tixi tiyacá cáhnu tá naçocó rí da quiahva já ndacaan ri yehe, da nachindahá Ndióxi nduu ñayivi tixi ñundáhyi uni quivi xihín uni ñuú.

<sup>41</sup> Ta ñayivi nasanduu Nínive sanahá cán ndacuíta na chicaan na cuachi jata ndó tá ná xinu quivi caja víi Ndióxi sahá cuachi ñayivi ndúu viti. Jáchí mé na nasanduu ñuu Nínive cán najándacoo na cuachi cája na tá naçahan Jonás xihin ná ña naçachi Ndióxi coo. Ta yehe ín chága sahá i a juú ga Jonás joo co cándusa ndó yehe. <sup>42</sup> Jári tá ná xinu quivi caja víi Ndióxi sahá cuachi ñayivi ndúu tiempo viti anda já ndacuíta in ñá nasacomí cuénta sahá ñayivi ndúu chí xoo sur sanahá ta chicaan ña cuachi jata ñayivi ndúu tiempo viti. Jáchí mé ña cán vatí nasahin xicá ndivaha ña nu rey Salomón sanahá naçahan ña cuni johó ña tuhun ndíchí cáhan da. Ta yehe ín chága sahá i a juú ga Salomón joo co cándusa ndó yehe.

*Jánaha Jesús ña cuahá tañu ndicó cōo tucu ínima  
quini ini ñayivi vatí sa naquee rí  
(Lc. 11:24-26)*

<sup>43</sup> Tá quéta in ínima quini ini in dataa já quée rí cuahan rí xíca nuu rí ndijáa yucú íchí ndínducú rí nuú candōo rí. Ta tá cō ndíñehē rí ña já cásahá cáhvi ini rí já: <sup>44</sup> “Coho ndicó cōo tucú ini da nuú nasandacaan í cán jáchí cúú á tátuhun vehé”, cáhán rí. Ta tá xínu cōo rí ini da cán já sándehe rí ña íin víi va ini da cán tá quiahva víi ini vehe tá natihvi á ta nandaca ndójó vaha tóco ndihi ñaha ini a. <sup>45</sup> Anda já quée tucu mé rí quini cán cuahan rí quehe rí usa ga rí quini chága a juú ga mé rí já xínu ndihi rí ndihvi rí ini dataa cán. Ta mé da cán ndiquini chága da a juú ga tá nasandacaan in talaá rí ini da. Quiahva já ndoho rí ñayivi quini ndúu tiempo viti —cáchí Jesús.

*Náná Jesús xihín ñani a cúní na cuni na a  
(Mr. 3:31-35; Lc. 8:19-21)*

<sup>46</sup> Nani cáhan yíi va Jesús xihín ñayivi já naxínu cōo náná Jesús xihín ñani a ña ná cahan na xihín á cúní na. Joo nacandōo na ndíta na jata véhe. <sup>47</sup> Já nasahan in na cáxi tuhun na nuú Jesús já cáchí na já xihín á:

—Jata véhe cáa íin nánún xihín ñanún ta cahan na xuhun cúní na —nacachi na xihín Jesús.

<sup>48</sup> Joo nanducú ñehē Jesús tuhun nuú na cán já nacachi a já xihín ná:

—Cáhan í xihín ndó ndá na cúú ndusa náná í xihín ñani í —nacachi Jesús xihín ná.

<sup>49</sup> Anda já nanaha ndáha mé á na xíca tuun xihín á cán já nacachi a já:



—Na yóho cúú ná tátuhun náná i xihín ñani i.  
 50 Jáchí ndá na cája ña cúní Ndióxi, tátá i, mé a ín  
 indiví, na cán cúú ná tátuhun ñani i xihín quiahva  
 i xihín náná i —naçachi Jesús xihín na cán.

## 13

*Sácú Jesús quiahva sahá in da sátá tata*  
 (Mr. 4:1-9; Lc. 8:4-8)

<sup>1</sup> Sa mé quivi já naqueta Jesús vehe cán já  
 nasahan nasaco a yati yuhú tañuhú cán. <sup>2</sup> Ta sahá  
 ña nataca cuahá ndivaha ñayivi nu á sahá ña cán  
 quéa nandaa mé á jatá in barco loho ta nasaco  
 a jatá do cán nani ndúu ñayivi ñutí yuhú tañuhú  
 cán. <sup>3</sup> Anda já naçasahá jánaha cuahá ñaha nu ná  
 ta nasacu a quiahva nu ná já naçachi a já xihín ná:

—In da sátá tata naquee da cuahan da cata da  
 ña. <sup>4</sup> Ta tá sátá da ña cuahan da já naçuyyu java  
 ña íchi ta cán naçinu laa ta nasaxí rí ña. <sup>5</sup> Ta java  
 ña naçuyyu a tañu yuu nuú coó cuaha ñúhu. Ta  
 cama chá nanduta mé tata jáchi co cúná ñúhu nuú  
 naçuyyu a. <sup>6</sup> Joo tá naqueta candii já najahichi ñahá  
 sahá ña coó cuaha yóho a chí nandihí sahá. <sup>7</sup> Ta  
 java tata naçuyyu tañu tohíñú ta tá nasahnu tohíñú  
 cán já nanditáha ndihí a naçaja tohíñú. <sup>8</sup> Ta java  
 tata naçuyyu a nu ñuhú vaha ta já nasahan cuahá  
 ñaha ña jáquee na nu á. Java ña nasahan in ciento  
 a nuú in in tata ta java ña nasahan uní jícó uxu a ta  
 java ña nasahan oco uxu a nuú in in tata. <sup>9</sup> Na ín  
 johó, ná cuni johó na —naçachi Jesús.

*Ndicani Jesús ndá saha quéa nasacu a quiahva nu*  
 ná  
 (Mr. 4:10-12; Lc. 8:9-10)

10 Na xíca tuun xihín Jesús cán nacayati na nu á já nacasáhá ndáca tuhún na mé á ndá cuéntá quéa jánahá mé á xihín quiahva cuití va nuú ñayivi.

11 Anda já nacachi Jesús já xihín ná:

—Ñá coó nacandaa ini ndó jihna ña cán cándaa ini ndó viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúú na sácú u quiahva nuu. 12 Jáchi ndá na sa íin ñaha nuu, ñehé táhvi na coo chága ñaha nu ná. Joo na co á ñaha nuu, janda ña chá íin nu ná ndindaa. 13 Sahá ña cán quéa cáhan i xihín ndinuhu quiahva xihín mé ndó jáchi vatí sándehé na joo cúú ná tátuhun na co tívi nuu. Ta vatí xíní johó na joo cúú ná tátuhun na johó jáchi co cándaa ini na ña cáhan i xihín ná. 14 Ta xihín ña yóho xínu coo nuú tuhun nacachi profeta Isaías sanahá ndivaha tá nacachi da já:

Vatí xíní johó na joo cúú ná tátuhun na johó jáchi co cándaa ini na ña cáhan i xihín ná.  
Ta vatí sándehé na joo cúú ná tátuhun na co tívi nuu.

15 Jáchi nandaji xíní túní tóco ndihi ñayivi ñuu yóho. Ta ndájí tuun johó na ta ndájí tuun nduchú núú na. Ña cán quéa a cuú cuni johó na, ta ni a cuú candehé na, ta ni a cuú cándaa ini na ña xíní johó na.

Ta xihín ña yóho co ndícó coo na nuú i ña ná ndaja vaha i na, nacahyí Isaías sanahá.

16 Joo tahví nacuu ndó jáchi cándaa ini ndó ña sándehé ndó xihín ña xíní johó ndó. 17 Mé a ndaa ná cáhan i xihín ndo ña cuahá ndivaha na profeta xihín cuahá ndivaha ñayivi vaha naxica ini na

cuni na ña xíní ndó yóho viti joo coó naxini na ña ta naxica ini na cuni johoh na ña xíní johoh ndó yóho joo coó naxini johoh na ña.

*Ndicani Jesús ña cúní cachi quiahva nasacu a nu ná*

*(Mr. 4:13-20; Lc. 8:11-15)*

<sup>18</sup> Cuni johoh ndó ña cúní cachi quiahva nasacu u sahá da sátá tata cán. <sup>19</sup> Ñayivi, na xíní johoh tuhun vaha sahá ña sa nacayati quivi cacomí Ndióxi cuéntá sahá ñayivi joo co cándaá ini na ña, na cán cúu ná tátuhun tata ña nacuyu íchi cán. Jáchí xínu tiñáhá sacuahá ta tává rí tuhun Ndióxi cán ínima ná. <sup>20</sup> Ta tata ña nacuyu tañu yuu cán náha ndá quiahva ín ñayivi, na cájii ndivaha ini ndiquehe tuhun Ndióxi. <sup>21</sup> Joo sahá ña co ñéhe íní yóho a cuhun cúná a sahá ña cán queá chá tiempo cuití va cándusa na tuhun Ndióxi. Jáchí tá casáhá ndóho ini na sahá tuhun Ndióxi chí jándacoo va na ña. <sup>22</sup> Ta tata ña nacuyu tañu tohíñú cán náha ndá quiahva ín ñayivi, na xíní johoh tuhun Ndióxi joo co jándacoo na íchi naxica na jihna. Ta casáhá ndicani ini na sahá ñaha ñuyiví yóho ta casáhá na catóo na canduu cuahá ñaha cuicá nu ná ta casáhá ndicají ini na caja na ña núu. Sahá ña cán queá cúu á tátuhun tata ña co cána ñaha jáquee na nuu jáchí coó nasahnu na xihín tuhun Ndióxi. <sup>23</sup> Joo tata ña nacuyu nuú ñuhú vaha cán náha ndá quiahva ín ñayivi, na xíní johoh tuhun Ndióxi ta cándaá ini na ña ta cája na ña cájii ini Ndióxi xihín. Java na cúu ná tátuhun yucu trigo ña nasahan in ciento a nuú in in tata. Ta java na cúu ná tátuhun tata ña nasahan uní jico uxu a nuú in in tata. Ta java na cúu ná

tátuhun tata ña ñasahan oco uxu a nuú in in a —  
 ñacachi Jesús xihin ná.

*Sácú Jesús quiahva sahá yucu quini nána tañu trigo*

<sup>24</sup> Anda já ñasacu Jesús inga quiahva nuú ñayivi ndúu cán já ñacachi a já xihin ná:

—Tá ná casahá cacomí Ndióxi cuéntá sahá ñayivi já cacuu a tátuhun tá ñaxutu in dataa trigo ña vaha nu ñúhu dá. <sup>25</sup> Joo tá sa ndúu ndihi na quíji ña já ñaxinu coo in da co cúní táhan xihin dá ta ñachihin da tata yucu quini tañu trigo cán já ñaquee da cuahan da. <sup>26</sup> Ta tá ñasahnu trigo cán ta ñacasahá cána yóco a já ñanduta ri yucu quini cán. <sup>27</sup> Anda já ñasahan ña cája chúun cán cáhan ña xihin xitoho na já ñacachi na já: “Candehé ndo. Tata vaha quea ñachihin ndó nu ñúhu ndo joo co cándaa ini nde ndáchí ñaquixi yucu quini ñanana xihin á yóho”, ñacachi ña cán xihin xitoho na. <sup>28</sup> Anda já ñanducú ñehe da cán tuhun nu ná já ñacachi da já xihin ná: “Ndá da co cúní yehe, da cán cúu da ñacaja ña yóho”, ñacachi da. Anda já ñacachi ña cája chúun nu dá cán já xihin dá: “Á co cúní ndó ña ná quihvi nde tuhun ndihi nde yucu quini cáa tañu trigo”, ñacachi na xihin dá. <sup>29</sup> Anda já ñacachi da já xihin ná: “Ná coo mé á jáchi tiahva náá nani tuhun ndó yucu quini ñan cuu tuhun ndó yucu trigo xihin á. <sup>30</sup> Vaha chá ná quiahva í ñamaní cuahnu a xihin trigo ñanda quiahva ná ndindaa tiempo jáqueé trigo. Ta tá sa jáqueé já cahnda i chuun nuú ña jáquee ña ná tavá xóo na yucu quini jihna ñúhú ta ná cató ña ña tá nuhni tá nuhni ña ná chican ñúhu ná ña. Ta anda jáví ná játaca na trigo taán

vaḥa na ini yáca ñaha i”, naçachi da —cáchi Jesús sácú a quiahva nu ná.

*Sácú Jesús inga quiahva saḥa ndíqui mostaza  
(Mr. 4:30-32; Lc. 13:18-19)*

<sup>31</sup> Ta naçacu Jesús inga quiahva nu ná já naçachi a já xihin ná:

—Tá ná xinu çoo quivi cacomí Ndióxi cuéntá saḥá ñayivi já cúu á tátuhun in ndíqui mostaza ña chíhin in dataa nu ñuhu da. <sup>32</sup> Cúu á ndíqui loho chága nu tóco ndihi ndíqui válí ín ñuyívi. Joo sáhnú a janda quiahva ndúu a in yító, dó cáhnú nu ndíhi yító nu xinu çoo laa cávaha rí choḥo ri nu ndáha do —cáchi Jesús.

*Sácú Jesús quiahva saḥá yusá naçaa  
(Lc. 13:20-21)*

<sup>33</sup> Ta naçacu Jesús inga quiahva nu ná já naçachi a já xihin ná:

—Tá ná cacomí Ndióxi cuéntá saḥá ñayivi já cacuu a tátuhun tá cává táhan in ñáñáha uní táhnda náhnú harina xihin loho yusá naçaa ña ná jánañu a tóco ndihi mé yúsa cán —naçachi Jesús.

*Sácú Jesús quiahva cuití va nuú ñayivi  
(Mr. 4:33-34)*

<sup>34</sup> Xihin ndinuhu quiahva cuití najánaḥa Jesús tóco ndihi ña yóho nuú ñayivi. <sup>35</sup> Já naçaja Jesús ña ná xinú çoo nuú ña naçachi in da profeta sanahá tá naçachi da já:

Xihin ndinuhu quiahva cuití va çahan i xihin ñayivi,  
ta çahan i saḥá ñaha naçahin jehé nu ná janda mé saḥa tá cámaní çava sáha saḥá ñuyívi —cáchi tuhun Ndióxi.

*Ndicani Jesús ña cún̄i cachi quiahva nasacu a sahá yucu quini nanana tañu trigo cán*

<sup>36</sup> Tá nandih̄i nandindayí Jesús ñayivi cuah̄a ndúu cán̄ já naquih̄vi a ini vehe. And̄a já nacativi na xíca tuun xih̄ín̄ a cán̄ nu á já nacachi na já xih̄ín̄ á:

—Ná ndicani ndó nuú nde ndía cún̄i cachi quiahva nasacu ndó sahá yucu quini nanana tañu trigo cán̄ —nacachi na.

<sup>37</sup> And̄a já nacachi Jesús já xih̄ín̄ ná:

—Da xútu tata vaha cúu yehe, da nachindahá Ndióxi nduu ñayivi. <sup>38</sup> Ta ñúhu nu xútu u tata cúu á ñayivi ñuyíví. Ta tata vaha cán̄ cúu á yuhú nuú na cómí Ndióxi cuéntá saha. Ta yucu quini cán̄ cúu á yuhú nuú ñayivi quini, na cúu cuéntá rí quini. <sup>39</sup> Ta da co cún̄i táhan xih̄ín̄ i nasahan da naxutu da yucu quini nu ñúhu cán̄ ta cúu dá yuhú nuú tiñhá sacuah̄a. Ta tiempo jáquee na cán̄ cúu á tá ná xinu coo quiví caja víi Ndióxi sahá ñayivi ndúu ñuyíví. Ta na xíca jáquee cán̄ cúu ná tát̄o Ndióxi. <sup>40</sup> Ta tá quiahva nacaja na cán̄ xih̄ín̄ yucu quini tá najátaca na ña ta nachicaañ ñúhu na ña quiahva já yaha ri xih̄ín̄ ñayivi ñuyíví yóho tá ná tandaa quiví ndih̄i sahá ñuyíví. <sup>41</sup> Ta yehe, da nachindahá Ndióxi nduu ñayivi chindahá i tát̄o mí i ña ná cahnda java táhan na na cómí i cuéntá saha xih̄ín̄ na co cúu cuéntá mí i. Jáchi na cán̄ jácahan na inga na caja na cuachi xih̄ín̄ java ga na cája ña núu. <sup>42</sup> Ta jáqueta nuu i na ini indayá ta cán̄ cuacu na and̄a quiahva chicáhn̄a nuhu na jáchi ndóho ndivaha ini na. <sup>43</sup> Ta and̄a já na cája ña cún̄i Ndióxi ndiyih̄vi ndaa na tá quiahva yéhe candii nuú cacomí Ndióxi cuéntá

sahá ná, mé á cúú á tátá na. Ndá na in johó, ná cuni johó na.

*Sácú Jesús quiahva sahá sató jiuhún ndacaan jehé*

<sup>44</sup> Tá ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndíñehé dá in sató jiuhún ña ndacaan jehé in ñundáhyi. Ta tá nandihí já chíjahvi tucu da ña xihin ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jiuhún cán.

*Sácú Jesús quiahva sahá in jíqui sándacu na ña yahvi ndivaha*

<sup>45</sup> Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha. <sup>46</sup> Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

*Sácú Jesús quiahva sahá in ñunu tává tiyacá*

<sup>47</sup> Ta tá ná cacomí Ndióxi cuéntá sahá ñayivi cacuu a tátuhun in ñunu jácana na nuú tañuhú ta já tíin na tá nuú tiyacá. <sup>48</sup> Ta tá sa nachutú ñunu cán já tává na tiyacá cán yuhú tañuhú ta cán sácoo na ndacahnda java na ri. Ta rí vaha cán táan vaha na ini toyicá na joo rí núu cán xíta ri cája na. <sup>49</sup> Quiahva já yaha ri xihín ñayivi tá ná ndihí sahá ñuyíví. Jáchi queta tátó Ndióxi ndacahnda java na vaha tañu na quini. <sup>50</sup> Ta ñayivi quini cán chicaoan na ini indayá ta cán cuacu na janda

quiahva chicáhñá nuhu na jáchi ndóho ndivaha ini na —cáchi Jesús.

*Tá jánaḥa Jesús sahá ña saá xihín ña yatá*

<sup>51</sup> Tá nandihí já nandaça tuhún Jesús na já nacachi a já:

—Á cándaḥa ini ndó tóco ndihí ña cáhan i yóho —cáchi a.

—Ajan, cándaḥa ini nde ña —nacachi na cán xihín á.

<sup>52</sup> Anda já nacachi Jesús já xihín ná:

—Tá jácuaha in da jánaḥa ley Moisés sahá ndaja ndiquiahva da mé dá ndáḥa Ndióxi cacomí a cuénta saḥa dá já cúu dá tátuhun in dataa, da ín ñaha ini vehe. Ta xini vaha da tavá da ñaha da á cúu á ña saá á ña yatá —cáchi a.

*Tá cuḥan Jesús ñuu Nazaret*

*(Mr. 6:1-6; Lc. 4:16-30)*

<sup>53</sup> Tá nandihí najánaḥa Jesús xihín quiahva yóho já naquee a cuanúhu a. <sup>54</sup> Tá naxinu a ñuu mé á já nacasáhá jánaḥa ini veñuhu cán. Ta jandá joho cátontó ñayivi ñuu cán já cáchi na já:

—Ta ndájá nacatiahva nahá ri da yóho ña xini da. Ta ndaja cája da ñaha xituhún yóho. <sup>55</sup> Á a juú da yóho cúu jahyi da cája chúun xihín yito. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. <sup>56</sup> Ta sa mé ñuu yóho ndúu ri quiahva da jan. Ndájá nacatiahva nahá da ña jánaḥa da nu yo, dá já —nacachi xihín táhan na cán.

<sup>57</sup> Ta chí coó naxeen na candúsa ñahá na. Sahá ña cán quea nacachi a já xihín ná:



—Vatí tóco ndihi ñayivi cája cáhnu na in profeta joo na vehe da xihín na ñuu da co cándusa na da — cáchí Jesús.

<sup>58</sup> Ta coo ñacaja cuahá Jesús ña xitúhún ñuu cán jáchi coo ñacandúsa toho ñayivi cán mé á.

## 14

*Tá naxihi Juan, da ñacaja ndúta ñayivi*

*(Mr. 6:14-29; Lc. 9:7-9)*

<sup>1</sup> Mé tiempo cán naxini johó Herodes, da cúu gobernador cán ña ndítúhún na sahá Jesús. <sup>2</sup> Anda já ñacachi da já xihín mozo da:

—Á a juú Jesús cúu á Juan, da najácandúta ñayivi ta viti ñanditacu tucu da. Sahá ña cán quéa ín ndée da cája da tóco ndihi ña cája da yóho —cáchí Herodes.

<sup>3</sup> Jáchi janda mé saha natiin Herodes Juan ñacató ñahá da ta ñachicaan da da vecaa. Ta ñacaja da ña yóho sahá Herodías, ña ñasacuu ñájíhí Felipe, ñani da. <sup>4</sup> Jáchi mé Juan najánani ñahá da sahá ña ín Herodes xihín ña ta já ñacachi da:

—Co ndítahan coún xihín ñájíhí ñanún —ñacachi Juan xihín dá.

<sup>5</sup> Ta janda já ñanducú Herodes cahní da Juan joo a cúu caja da ña jáchi yíhví da ñayivi sahá ña cándusa na ña cúu Juan in profeta ñachindahá Ndióxi. <sup>6</sup> Joo in tañu nani ndácaan Juan vecaa já ñacavaha Herodes víco sahá quivi ñacacu da. Ta ñandaca ndíchí ña cúu jahyi Herodías cán ñaxita sahá ña nu ndíhi na ndúu víco cán. Ta a juú quiahva ñacajii ini Herodes xihín ña yóho. <sup>7</sup> Sahá ña cán quéa quivi Ndióxi tává da tá sáhan da tuhun da nu

ñá cán ña quiahva da nu ña ndá ña cúni mé ñá caca ñá nu dá. <sup>8</sup> Tá nandihí nandaca tuhún jihna ñá náná ña já ndáva ña nasahan ñá nu Herodes já cáchí ña já xihín dá:

—Viti ñúhú cúni ña ná quiahva ndó yiquí jíní Juan, da jácandúta ñayivi nuú i ini in cohó cáhnu —nacachi ñá xihín dá.

<sup>9</sup> Tá nacachi ñá já xihín Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ñá cán ta sahá ña cúni da candoo vaha da nuú na ndúu víco xihín da cán sahá ña cán quéa nasahnda da chuun ña ná quiahva na ña nu ñá. <sup>10</sup> Chí nasahnda da chuun ña ná chituhun ná yiquí jíní Juan ini vecaa cán. <sup>11</sup> Ta já nachicaan na yiquí jíní da ini in cohó cáhnu já nasahan na ña nu ñá cán. Anda já nandiquiahva ñá cán ña ndáha náná ña.

<sup>12</sup> Anda jáví naxinu na naxica xihín Juan cán já nasahan na nandiquehe na yiquí cuñu da ta najánduxu na da. Ta já nasahan na nacaxi tuhun na ña yóho nuú Jesús.

*Tá nasahan Jesús ña cuxu uhun mil taa  
(Mr. 6:30-44; Lc. 9:10-17; Jn. 6:1-14)*

<sup>13</sup> Tá naxini johó Jesús saha Juan já naquee xóo a ini in barco loho cuahan nuú co ndúu ñayivi. Joo tá naxini johó ñayivi ña cuahan Jesús já naquee na ñuu na ndíco na cuahan sahá na nu ín a. <sup>14</sup> Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja vaha mé á na quihvi naquixi tañu na cán. <sup>15</sup> Ta tá sa cáhini cuahan já nacayati na xíca tuun xihín a cán nu á. Já cáchí na já xihín á:

—Sa nahini va ta a juú xoo nu ndúu ñayivi quéa yóho. Ndindayí ndó ñayivi ná cuhun na ñuu válí yati jan já ná cueen na ña cuxu na —ñacachi na cán xihín á.

<sup>16</sup> Anda já ñacachi a já xihín ná:

—Cò xíní ñúhú toho quee na cuhun na. Mé ndó quiahva ndó ná cuxu na —ñacachi Jesús.

<sup>17</sup> Anda já ñacachi tucu na cán já xihín á:

—Cò mé ñaha va cuxu na yóho. Uñun víxí pan xihín ivi laá tiyacá cuití va ín yóho —ñacachi na xihín Jesús.

<sup>18</sup> —Taxi ndó a chóho —ñacachi Jesús xihín ná.

<sup>19</sup> Anda já ñasahnda Jesús chuun ña ná ndaca nduu ndihi na cán nuú yucu. Anda já natiin a ndíhuhun pan xihín ndíví tiyacá cán já ñasandehé a chí indiví já ñandiquiahva ndixahvi nu Ndióxi. Tá ñandihí já ñasahnda java pan ta ñasahan ña nuú na xíca tuun xihín á cán ta na cán ñandicahnda na ña nuú ñayivi cuaha cán. <sup>20</sup> Ta tóco ndihi na ñaxixi na janda quiahva ñachutú na. Ta tá ñandihí ñaxixi na já najátaca na ña ñacandoo cán ta najáchutú na uxu ivi toyicá xihín ña ñacandoo cán. <sup>21</sup> Ta tóco ndihi na ñaxixi cán ñasacuu na tátuhun uhun mil ñaa. Cò cáhan sahá najihí xihín na valí.

*Tá ñaxica sáhá Jesús nuú tañuhú*

*(Mr. 6:45-52; Jn. 6:16-21)*

<sup>22</sup> Ta tá ñandihí já ñacaja Jesús ña ná ndihvi na xíca tuun xihín á cán ini in barco ña ná cuhun cuéé na inga xoo tañuhú cán nani candoo tóo mé á jándindayí a ñayivi cuaha cán. <sup>23</sup> Ta tá sa najánduta tóco ndihi ñayivi já ñandaa mé á yucu cuahan caca

taḥví a nu Ndióxi. Tá nandihi já naꠘuaá ta in túhún mé á ndácaan xíca taḥví a nu Ndióxi cán. <sup>24</sup> Ta ndaja coo barco loho, dó cándojo ná xíca tuun xihín á cán sa naxinu coo dó janda maññú tañuhú cuahan do. Ta ndícojo ndivaḥa tañuhú jáchi xoo cuahan na vaxi tachí. <sup>25</sup> Joo tátuhun sa cuahan tívi já xíca sáhá Jesús cuahan nuú tañuhú naxinu a nu ná. <sup>26</sup> Ta tá naxini na xíca sáhá Jesús vaxi a nuú tañuhú cán já naꠘatóntó na. Ta naꠘasáhá na cáyuhú cóhó na saḥá ña yíhví na já cáchí na já:

—Ínima quéa vaxi yóho —cáchí na.

<sup>27</sup> Joo ivi laá nandicaḥan Jesús xihín ná já cáchí a já:

—Ndacú coo ini ndó jáchi yeḥe va cúu u. A yíhví toho ndó —naꠘachi a xihín ná.

<sup>28</sup> Anda já naꠘachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —naꠘachi da xihín Jesús.

<sup>29</sup> Ta já cáchí Jesús já:

—Naha quíi —cáchí a xihín dá.

Anda já nanuu Pedro barco cán ta naꠘasáhá xíca sáhá da nuú tañuhú cuahan da nuú Jesús. <sup>30</sup> Joo tá naxini da tachí ndeé xíco nuú tañuhú cán já nayíhví da. Chí ivi laá naꠘasáhá quéta nuu da cuahan da ini tañuhú. Já naꠘayuhú cóhó da já cáchí da já xihín Jesús:

—Chindeé ndó yeḥe, xitoho i —naꠘachi da xihín á.

<sup>31</sup> Ta cama chá naṭiin Jesús ndáḥa da ta já naꠘachi a já xihín dá:

—Ndá cuéntá quéa cō cāndeé chága inún yehe ta ñacasáhá cáhvi ivi joho inún —ñacachi Jesús xihín dá.

<sup>32</sup> Ta tá ñandaa ndíví ña jata barco já ñacatáji tachí cán. <sup>33</sup> Anda já ñacaja cáhnu ña ñúhu ini barco cán Jesús já cáhí ña já xihín á:

—Mé a ndaa táhyí cúu jivi ndusa ndó in túhún jini já jahyi Ndióxi —ñacachi na xihín á.

*Tá ñandaja vaha Jesús ña quíhvi ndúu ñundáhyi Genesaret*  
(Mr. 6:53-56)

<sup>34</sup> Ta já ñaxica loho ga ña nuú tañuhú cán já ñaxinu cōo ña ñundáhyi Genesaret. <sup>35</sup> Ta tá ñandicuni ñayivi ndúu cán mé á já ñachindahá ña chuun ñasahan nuú ndaja táhan ñayivi ndúu ndijáá ñundáhyi cán. Já ñéhe ndihi na ña quíhvi ñacasaa ña nu á. <sup>36</sup> Ta ña quíhvi cán ñaxica tahví ña nu á ña ná quiahva ñamaní cani ndaa ndáha ná yuhú jahmá níhnu a ta tóco ndihi ña ñacani ndaa ndáha jahmá a ñandivaha na.

## 15

*Ña cája quini ínimá ñayivi*  
(Mr. 7:1-23)

<sup>1</sup> Ndaja coo java ña fariseo xihín java ña jánaña ley Moisés ndúu ñuu Jerusalén cán ñacayati na nuú Jesús já ñacasáhá cáhí ña já xihín á:

<sup>2</sup> —Ndávaha cō cája ña xica tuun xuhun ña ñacachi tásáhnu jíco yo caja na. Ndávaha xíxi na tá cámaní ndahá ña tá quiahva sáhdá ley caja na —ñacachi ña cán xihín Jesús.

<sup>3</sup> Anda ja nanducú ñehe Jesús tuhun nu na ja ñacachi a ja:

—Ta járí ndóhó va, ndá cuéntá quéa jándacoo ndó ña sáhdá Ndióxi nu ndó caja ndó. Ta ña cája ndó quéa ndíco ndó costumbre mé va ndó. <sup>4</sup> Jáchí sáhdá Ndióxi chuun ja cáchí a ja: “Caja cáhnún tátún xihín nánún.” Ta járí cáchí a: “Ndá na na chícaan cháhan jata tátá na á náná na, ndítahan quivi na”, cáchí a. <sup>5</sup> Joo ndóhó, jána ha ndó nuú ñayivi ña cuu cahan na ja xihín tátá na á náná na: “A cuú chindeé e ndohó jáchí sa nasacu xoo i ñaha i quiahva i ña nu Ndióxi”, cáchí na. <sup>6</sup> Tá na cachi na ña yóho ja quéa co ndúsa ga chindeé na tátá náná na. Quiahva joho cája ndó ta sácu xoo ndó ña nasahnda Ndióxi chuun nu ndo ta ndája ndó a tátuhun in ñaha ña coó saha. Jáchí ndíco cáhnú ndó ña najándacoo tásáhnú jícó ndo nu ndo. <sup>7</sup> Co cúú ndó tá quiahva ndáa ndó. Mé a nda a ñacahan profeta Isaías saha ndo sanahá tá ñacahyí da ña ñacachi Ndióxi:

<sup>8</sup> Yuhú ninu uun na cája cáhnú na yehe.

Ta co cája cáhnú na yehe xihín ndinuhu ínima na.

<sup>9</sup> Ta mé a uun quéa cája cáhnú na yehe,

jáchí ña jána ha na nuú ñayivi cuití va cúú á ña quíxi jini mé va na, ñacachi profeta Isaías sanahá ndivaha —ñacachi Jesús xihín na cán.

<sup>10</sup> Tá nandihi ja ñacana Jesús tócó ndihi ñayivi ndúu cán ja ñacachi a ja xihín na:

—Cuni joho vaha ndó ña cáhan i xihín ndó ta na canda a ini ndó ña. <sup>11</sup> A juú ñaha xíxi ñayivi ndája quini ínima na. Tuhun quini quéta yúhu na ña jan quéa cája quini ñahá —ñacachi Jesús.

12 Tá nandihí já nacyati na xíca tuun xihín Jesús cán nu á já nacachi na já xihín á:

—Chí a váha mé nacuu ini na fariseo tá naxini johu na ña nacachi ndó jan —nacachi na cán.

13 Anda já nacachi Jesús já xihín ná:

—Ñayivi, na co ndíquehe vaha tuhun Ndióxi cúu ná tátuhun in yíto, dó coó najánde Ndióxi, tátá i ña in indiví. Sahá ña co cúu dó cuéntá mé á já tandaa quívi ña tuhun mé á do anda yóho do. 14 Sahá ña cán quéa co ndítahan ndicani ini ndó sahá na jan jáchi na cuáa va cúu ná. Ta a cúu toho caja in da cuáa candaca da inga da cuáa cuhun da jáchi ndívi já da ndacava da yávi —nacachi Jesús.

15 Tá nandihí já nacachi Pedro já xihín Jesús:

—Ndicani loho ndó nuú nde ndaja cáa ña cáchi ndo ña co caja quini toho ña xíxi ñayivi mé ná jáchi co cánda in nde ña —nacachi Pedro xihín Jesús.

16 Já nacachi Jesús já xihín ná:

—Á coó toho xíní túní ri ndóhó va, vaha. 17 Jáchi co cánda in ndó ña tóco ndihí ñaha xíxi ñayivi a cúu caja quini a na. Jáchi ña xíxi ñayivi co xínu a ini ínima ná joo xínu coo ña tixi va na já queta tucu a yiquí cuñu na. 18 Ña cuu ndaja quini ñayivi cúu ña quíxi ínima ná tátuhun tuhun cáhan na xihín ña caja na. 19 Jáchi chí ínima ñayivi quíxi ña cáhvi núu ini na tátuhun ña cáhvi ini na cahní na ndi. Ta sa mé cán quíxi ña cáhvi ini in dataa coo da xihín ñájíhí ñani táhan da á xihín in ña co cúu ñájíhí da. Ta sa mé cán quíxi ña ndiáva íní da caja cuíhná da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cánahá da xihín Ndióxi. 20 Tóco ndihí ña cáhvi núu ini ñayivi caja na, ña yóho quéa

ndája quini a na. Joo co cáquini toho ñayivi sahá ña co ndáhá na tá cámaní cuxu na tá quiahva ín costumbre na —ñacachi Jesús xihín na xíca tuun xihín á cán.

*Tá ñacandeeé ini in ñá tóho Jesús*

*(Mr. 7:24-30)*

<sup>21</sup> Tá nandihí já ñaquee Jesús cuahan chí ñundáhyi cuéntá Tiro xihín cuéntá Sidón cán. <sup>22</sup> Ta nu xíca cuahan cán ñaqueta in ñáñáha ñundáhyi Canaán nu á já cáyuhú ña já cáchí ña já xihín á:

—Xitoho i, da ñaquixi chichi David caja ndó ñamaní candáhví loho ini ndó yehe. Chindeé ndó jahyí jíhí i jáchí rí quini ndácaan ini ñá —ñacachi ñáñáha cán xihín Jesús.

<sup>23</sup> Joo ni in túhún tuhun coó nanducú ñehe Jesús nu ña. Anda já ñacatívi na xíca tuun xihín a cán nu á já ñacachi na já xihín á:

—Taxi ndó ñá jan ná quee ña cuhun ña jáchí cáyuhú ña ndácaa ña jata yó vaxi ña —ñacachi na cán xihín Jesús.

<sup>24</sup> Anda já ñacachi Jesús xihín ñáñáha cán já:

—Nachindahá Ndióxi yehe vaxi i nuú ñayivi Israel cuití va, mé na cúu tátuhun ndicachi, rí nandiñúhú —ñacachi Jesús.

<sup>25</sup> Anda já ndáva ña cán ñaxinu coo ña ñacaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

<sup>26</sup> Anda já ñacachi Jesús já xihín ñá:

—A váha toho candaa i pan ndahá na valí ta já cana i ña nuú tina —ñacachi Jesús xihín ña cán.

<sup>27</sup> Anda já ñacachi ña cán já xihín Jesús:



—Mé a ndaa cáhan ndo joo anda tina, rí ndúu tixi mesa xíxi rí ña jácuyu jahyi xitoho rí —ñacachi ñá cán xihín Jesús.

<sup>28</sup> Anda já ñacachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiahva cúní mún —ñacachi Jesús xihín ñá.

Chí mé hora já nandivaha jahyi jíhí ña.

### *Ndaja vaha Jesús cuahá na quihvi*

<sup>29</sup> Tá nandihi já ñaquee Jesús cuahán já ñaxinu coo a yati yuhú tañuhú Galilea. Já nandaa in jini yúcu ta cán ñasacoo a. <sup>30</sup> Ta já ñacasáhá natata cuahá ndivaha ñayivi já ñéhe na ña quihvi saha xihín na cuaá xihín na níhi xihín na réncó ndáha. Ta cuahá gā nuú ña quihvi ñéhe na ñacasaa ña ñachinduu na ña nu Jesús. Ta nandaja vaha mé á ña. <sup>31</sup> Ta xihín ña yóho a juú quiahva ñacatóntó ña tá ñaxini na ña ñacasáhá ndícahan ña níhi. Ta ñacatóntó ña tá ñaxini na ña nandivaha ndahá ña réncó ta ndícaca vaha ña quihvi saha ta quiahva já nandivaha ri ña cuaá. Ta ñacasáhá ña cája cáhnu na Ndióxi, mé a cómí cuéntá sahá ña Israel.

### *Tá ñasahan Jesús ña cuxu comi mil nataa (Mr. 8:1-10)*

<sup>32</sup> Anda já ñacana Jesús ña xíca tuun xihín á já ñacachi a já xihín ná:

—Táhnda ndivaha ini i sahá ñayivi yóho jáchi sa ñaxinu uní quiví ndúu na xihín i ta chí coó gā ña cuxu na. Ta co cúní chindahá i ña nuhu ña vehe na jáchi cámaní cuxu na ta tiaha náá cuitá ña ta cuyu na íchi —ñacachi Jesús.

<sup>33</sup> Anda já ñacachi ña xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —ñacachi na cán xihín Jesús.

<sup>34</sup> Já ñacachi Jesús já:

—Ndaja pan cómi ndo.

Já ñacachi na cán já:

—Usa pan xihín java tiyaca válí.

<sup>35</sup> Anda já ñasahnda Jesús chuun ña ná cacoo ndihi ñayivi nu ñúhu cán. <sup>36</sup> Ta já ñatiin a ndíhusa pan cán xihín java tiyaca válí cán já ñandiquiahva ndixahvi nu Ndióxi. Ta já ñasahnda java ña ta ñasahan ña nuú na xica tuun xihin á cán ña ná ndicahnda na ña nuú ñayivi cuaha cán. <sup>37</sup> Ta ñaxixi tóco ndihi na janda quiahva ñachutú tixi na. Ta tá ñajánditaca na ña ñacandoo cán já ñachutú usa toyicá xihin ña. <sup>38</sup> Ta na ñaxixi cán cúu ná comi mil taa ta co cáhan sahá ñajihí xihin na valí. <sup>39</sup> Ta tá ñandihí ñandindayí Jesús ñayivi já ñandihvi a ini barco já ñaxinu coo a ñundáhyi cuénta Magdala.

## 16

*Cúni na fariseo xihín na saduceo cuni na in ña xituhún caja Jesús*

*(Mr. 8:11-13; Lc. 12:54-56)*

<sup>1</sup> Ta ndaja coo ñaxinu coo na fariseo xihín na saduceo nu Jesús. Ta sahá ña cúni na coto ndojó cuití ñahá na sahá ña cán quéa ñaxica na nu á ña ná caja in ña xituhún cuénta indivi já ná candaa ini na á mé a ndaa cúu á ña ñachindahá Ndióxi. <sup>2</sup> Anda já ñanducú ñehe Jesús tuhun nu ná já ñacachi a já xihin ná:

—Tá nahini já cáhí ndo já: “Tiempo vaha ndivaha cacuu a jáchi ndíyehé cuáhá indiví”, cáhí ndo. <sup>3</sup> Ta naha cáhí ndo já: “Viti ndusa quéa cuun ndeé ndivaha javi jáchi íin vícò ndivaha ta íin vico cuáhá indiví”, cáhí ndo. Co cúú ndó tá quiahva ndáa ndó. Ndá cuéntá quéa tiahva ndó ndicuni ndó ndá quéa coo tá sándehe ndó indiví joo co tiahva ndó ndicuni ndó ndá tiempo cúú á viti. <sup>4</sup> Ñayivi quini, na co cúní candúsa Ndióxi, na cán cúú na xíca ña ná caja i ña xitúhún nu ná. Joo ni in túhún toho ñaha xitúhún a cája ga i nu ná. In túhún ña candehe na cacuu a ña tandaa quivi ndoho i tá quiahva nandoho profeta Jonás sanahá ndivaha —nacachi Jesús xihin ná.

Já naquee a cuahan.

*Tá sácú Jesús quiahva sahá na fariseo  
(Mr. 8:14-21)*

<sup>5</sup> Ta ndaja coo naxinu coo a inga xoo tañuhú xihin na xíca tuun xihin á cán ta nandindójó na cán cañehe na pan cuxu na. <sup>6</sup> Tá nandihí já nacachi Jesús já xihin ná:

—Candehe ndo. Cuéntá coo ndó xihin na fariseo ta xihin na saduceo jan jáchi ña jánahá na cúú á tátuhun yúsa naxaa ña cává táhan na xihin harina cávaha na pan —nacachi Jesús.

<sup>7</sup> Joo na xíca tuun xihin á cán ndítuhún xihin táhan na ña nacachi Jesús já sahá ña coo pan ñehe na cuahan xihin ná.

<sup>8</sup> Ta tá nacandaa ini Jesús ña cáhan na já nacachi a já xihin ná:

—Ndá cuéntá quéa co cándéé cáhnu ini ndó yehe ta cáhan ndo ña cáhí i ña yóho xihin ndo sahá ña

co ñéhe ndó pan vaxi ndó. <sup>9</sup> A ñáha cánda*a* ini ndó. Ndítahan ndicuhun ini ndó ña nandaja cuahá i uhun víxí pan tá naxixi uhun mil taa. Ta sa xini ndó ndaja toyicá najáchutú ndo xihín ña nacandoo cán. <sup>10</sup> Ta ndítahan ndicuhun ini ndó ña nacaja i xihín usa pan tá nandicahnda i ña naxixi comi mil taa ta sa xini ndó ndaja toyicá najáchutú ndo xihín ña nacandoo cán. <sup>11</sup> Ndá cuéntá quéa co cánda*a* toho ini ndó ña coo nacachi i ña yóho xihin ndó sahá ña coo pan ñéhe ndó vaxi ndó. Joo nacachi i ña cuéntá coo ndó xihín na fariseo ta xihin na saduceo jáchi ña jána*ha* na cúu á tátuhun yusa naxaa ña cáva táhan na xihín harina cáva*ha* na pan —nacachi Jesús.

<sup>12</sup> Tá nacachi Jesús ña yóho já nacanda*a* ini na xica tuun xihin á cán ña a juú toho sahá yusa naxaa cáhan Jesús sa*ha*. Ña cúni Jesús cachi a xihin ná quéa cuéntá va*ha* ná coo na xihin ña jána*ha* na fariseo xihin na saduceo.

*Tá cáxi tuhun ndaa Pedro ña cúu Jesús mé á naxindahá Ndióxi cacomí a cuéntá sahá ñayivi (Mr. 8:27-30; Lc. 9:18-21)*

<sup>13</sup> Tá naxinu coo Jesús ñundáhyi Cesarea cuéntá Filipo já nandaca tuhún a na xica tuun xihin á cán já nacachi a já xihin ná:

—Ndá da cáchi ñayivi cúu ye*he*, da naxindahá Ndióxi nduu ñayivi —nacachi Jesús.

<sup>14</sup> Já nacachi na cán já:

—Java na cáchi na ña cúu ndó Juan, da nacaja ndúta ñayivi. Ta java na cáchi na ña cúu ndó profeta Elías. Ta java na cáchi na ña cúu ndó

profeta Jeremías. Ta java na cáchí ña ña cúú ndó in táhan profeta ñasanduu sanahá —ñacachi na.

<sup>15</sup> Anda já ñacachi Jesús já xihin ná:

—Ta ndóhó ri, ndá da cáchí ndó cúú u —ñacachi a.

<sup>16</sup> Anda já ñanducú ñehe Simón Pedro tuhun nu Jesús já ñacachi da já xihin á:

—Mé ndó cúú Cristo, ña ñachindahá Ndióxi cacomí cuéntá sahá ñayivi. Ta cúú ndó in túhún jiní já jahyi Ndióxi, mé a tácu íin indiví —ñacachi da.

<sup>17</sup> Anda já ñanducú ñehe Jesús tuhun nu dá já ñacachi a já xihin dá:

—Tahví nahá cúún, Simón, jahyi Jonás jáchi ni in túhún ñayivi coó ñacaxi tuhun ña yóho xuhun. In túhún tátá i, mé a íin indiví ñanaha ña yóho nuun.

<sup>18</sup> Ta quiahva johó cáchí ri yehe saha yóhó: Yohó cúún Pedro ta quivun cúni cachi a tóto. Ta cúún tátuhun yuu ndúhu sahá in vehe nuú cavaha i veñuhu mí i jáchi yóhó caca nuún cahun sahá i nuú ñayivi já ná quee vaha na xihin tiñahá sacuaña já ná a cuhun na indayá. <sup>19</sup> Ta caja i xuhun ña ná cuu ndicanún nuú ñayivi ndaja ndiquiahva na mé ná ndáha i cacomí i cuéntá saha ná. Cacu a tátuhun quiahva i yaví nuun ña ná cunún íchi nuú ndihvi ñayivi cacomí i cuéntá saha ná. Tá co sáhun ñamaní ná ndihvi ñayivi cán já quea a quiahva toho i ñamaní nu ná. Joo tá sáhun ñamaní nu ná ndihvi na cán já quea quiahva ri yehe ñamaní nu ná — cáchí a xihin Pedro.

<sup>20</sup> Anda já ñasahnda Jesús chuun nuú na xica tuun xihin á cán ña ná a cáxi tuhun na xihin ni in túhún ñayivi ña cúú mé á Cristo, mé á ñachindahá Ndióxi cacomí cuéntá sahá ñayivi.

*Tá cáxi tuhun Jesús ña quivi a  
(Mr. 8:31-9:1; Lc. 9:22-27)*

<sup>21</sup> Ta janda mé quivi já ñacasáhá Jesús cáxi tuhun a xihín na xica tuun xihín á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutu xihín ndahá na jánaha ley Moisés. Ta caja xíxi ri na cán va xihín á ta cahní ñahá na. Joo tá ná xinu uní quivi nditacu tucu a.

<sup>22</sup> Anda já ñatavá xóo Pedro Jesús já ñacasáhá da jánani ñahá da já ñacachi da já xihín á:

—Ama ná yaha ña yóho xihín ndó, xitoho i. Ná a quiáhva toho Ndióxi ñamani ndoho ndó já — ñacachi Pedro xihín Jesús.

<sup>23</sup> Joo ñacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúu tiñáhá sacuahá. Tá quiáhva ín na sáji nuu nu ná quiáhva já ín nuú i. Jáchi co cáhvi inún tá quiáhva cáhvi ini Ndióxi joo cáhvi inún tá quiáhva cáhvi ini ñayivi cuéntá ñuyívi yóho — ñacachi Jesús xihín dá.

<sup>24</sup> Anda já ñacachi Jesús já xihín na xica tuun xihín a cán:

—Ndá na cúní candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i. <sup>25</sup> Jáchi ndá na catóo coo chága ñuyívi yóho ndihi saha ná. Joo ndá na sahan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quivi. <sup>26</sup> Vatí ná quee vaha in na ñuyívi yóho ta cómi na tóco ndihi ñaha ñuyívi yóho joo ndá chuun quea tá nu ndihí ndihi saha ná indayá. Jáchi ni

in ñaha a cuú chahvi in na saha ínima ná ña ná a cùhun na índayá. <sup>27</sup> Jáchi yehe, da nachindahá Ndióxi nduu ñayivi quixi tucu u xihín ndée Ndióxi, tátá i ta xihín ndée tátó Ndióxi. Mé tiempo cán náha ndaja cáhnu cúu yehe. Anda já chahvi i nuú in in ñayivi sahá ñaha nacaja na nani nasanduu na ñuyívi yóho. <sup>28</sup> Mé a ndaa ná cahan i xihín ndo ña java na ndúu yóho a quíví toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

## 17

*Tá nandijama nuu Jesús quiahva cáa  
(Mr. 9:2-13; Lc. 9:28-36)*

<sup>1</sup> Tá nayaha inu quivi já nandaa Jesús in yucú jícó ta ndáca táhan Pedro xihín Jacobo xihín ñani da Juan cuahan na xihín á. <sup>2</sup> Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yéhe ña. <sup>3</sup> Ta ndaja coo nandaca náha Moisés xihín Elías ta nacasáhá ndítuhún da xihín Jesús. <sup>4</sup> Anda já nandicahan Pedro xihín Jesús já nacachi da já xihín á:

—Vaha cúu ndúu nde yóho, xitoho nde. Tá cúni ndó cavaha nde uni vehe tiyahvá válí. In a coo mé ndó ta inga coo Moisés ta inga coo Elías —cáchi Pedro.

<sup>5</sup> Ta nani cahan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johó na ña cahan in a ta já cáchi a já:

—Da yóho cúu jahyi maní i ta cájii ini i xihin dá. Cuni johó ndó nu cáhan da —nācachi mé a cán.

<sup>6</sup> Tá naxini johó nā xíca tuun xihín Jesús cán ña cáhan yóho já nācaxítí nā janda quiahva naxinu nuu ná nu ñúhu. Ta a juú quiahva ná yihví nā.

<sup>7</sup> Anda já nācayati Jesús nu ná ta nācani ndaa ndáha nā já nācachi a já xihín ná:

—Cuándacoó ndó. A cáyihví toho ndó —nācachi Jesús xihín ná.

<sup>8</sup> Ta tá nandiñehe nā cán nuu ná já naxini na ña ín in túhún jiní mé va Jesús.

<sup>9</sup> Ta tá nanuu na jiní yúcu cán já nasahnda Jesús chuun nu ná já nācachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yehe, da nāchindahá Ndióxi nduu ñayivi —nācachi Jesús.

<sup>10</sup> Já nācachi nā cán já xihín á:

—Ndávaha cáchí nā jánaha ley Moisés ña ndítahan quixi jihna ñúhú profeta Elías —nācachi na.

<sup>11</sup> Já nācachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. <sup>12</sup> Joo mé a ndaa ná cahan i xihín ndó ña sa nāquixi va Elías joo coó nāxeen na ndicuni na da. Ta nācaja na tá quiahva cúní mé ná xihín dá. Ta quiahva já jándoho ri na ini yehe, da nāchindahá Ndióxi nduu ñayivi —nācachi Jesús.

<sup>13</sup> Anda jáví nācandaa ini nā xíca tuun xihín Jesús cán ña cáhan Jesús saha Juan, da najácandúta ñayivi tá nācachi a ña sa nāquixi va Elías.

*Tá nandaja vaha Jesús in da loho ndácaan ínima quini ini*

*(Mr. 9:14-29; Lc. 9:37-43)*



14 Ta tá sa nanuu na ta naxinu coo na nu ndúu cuahá ñayivi cán já naxinu coo in dataa ta já nacaxítí da nu Jesús. Já nacachi da já xihin á:

15 —Candáhví loho ini ndó jahyi i, xitoho i jáchi xíhi yihí da ta ndóho ndivaha ini da. Ta cuahá tañu ndícava da nu ñúhu ita á ini ticuí. 16 Ta ñéhe e da nacasaá i nuú na xíca tuun xihin ndó yóho joo coo nacuu ndaja vaha na da —nacachi da xihin Jesús.

17 Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi ín i xihin ndo ta a ñáha candeé ini ndó yehe. Cúu ndó ñayivi quini ndivaha chí co ndeé ga ini i xihin ña cája ndó. Taxi ndó taa loho jan chóho —nacachi Jesús.

18 Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

19 Tá nandihí já nacahan jehé na xíca tuun xihin Jesús cán xihin á já nacachi na já:

—Ndávaha coo nacuu caja nde tavá nde ínima quini nasandacaan ini da loho jan —nacachi na xihin Jesús.

20 Já nacachi Jesús já xihin ná:

—Coo nacuu caja ndó jáchi co candeé cáhnu ini ndó yehe. Mé a ndaa cáhí i xihin ndó, loho tীন ndivaha cáa in ndíqui mostaza joo ndúu dó in yító cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihin in yúcu ña ná caxoo a ta chí caxoo ndusa ña. Tóco ndihí ñaha cuu caja ndó tá ná candeé ini ndó yehe. 21 Joo tá cúni ndó tavá ndó ínima

quini tátuhun rí yóho xíní ñúhú cajuhun ndó ta caca tahví ndó nu Ndióxi —cáchi Jesús xihín ná.

*Tá cáxi tūhun tucu Jesús ña quivi a  
(Mr. 9:30-32; Lc. 9:43-45)*

<sup>22</sup> Ta ndaja coo xíca tútú ndihi na xíca tuun xihín Jesús cán cuahan na xihín á chí estado Galilea. Ta já nandicani Jesús nuú na cán ña tandaa quivi ndiquiahva ñayivi mé á ndáha na cahní ñahá, mé a nachindahá Ndióxi nduu ñayivi. <sup>23</sup> Ta nacachi a xihín ná ña tá sa ná yaha uní quivi já nditacu tucu a. Tá nacachi Jesús ña yóho xihín na xíca tuun xihín á cán já nacacuéha ndivaha ini na.

*Tá nachahvi Jesús jjuhún impuesto cuénta veñuhu cánu ñuu Jerusalén*

<sup>24</sup> Tá naxinu coo Jesús ñuu Capernaum xihín na xíca tuun xihín á já naxinu coo na játaca jjuhún impuesto cuénta veñuhu nu Pedro. Já nacachi na já xihín dá:

—Á co cháhvi toho Jesús, da jánaha ndohó jan jjuhún impuesto cuénta veñuhu ñuu Jerusalén — nacachi na xihín Pedro.

<sup>25</sup> Anda já nacachi Pedro já:

—Cháhvi a ña — nacachi da.

Anda já nandihvi Pedro ini vehe nu ndácaan Jesús joo jihna ñúhú nandicahan Jesús xihín dá já nacachi a já:

—Ndía cáhvi inún, Simón. Yo já ndítahan nuu chahvi jjuhún cuénta impuesto nuú na sáhdá chuun ñuyívi yóho. Á na ñuu mé ná á na ñuu tóho —nacachi Jesús.

<sup>26</sup> Já nacachi Pedro já:

—Ná tóhō va sá cháhvi jiuhún cája na —nācachi Pedro.

Já nācachi tucu Jesús já:

—Sahá ña cán quéa mé na ñuu cō cháhvi toho na. <sup>27</sup>Joo mí cō cūni yo ña ná ndicuita na xohō sahá ña cán quéa cūhún tañuhú. Ta mé cán tavún tiyacá. Ta rí nū cuítí ná tavún jan candehún yúhu rí jáchi jan nditáhún in jiuhún ça. Ta cañehe a cūhún chahvún saha mún ta saha mí i jáchi queta va —nācachi Jesús xihin Pedro.

## 18

*Ndicani Jesús ndá na cúu na in chága saha  
(Mr. 9:33-37; Lc. 9:46-48)*

<sup>1</sup>Mé tañu já nācayati na xíca tuun xihin Jesús nu á já nācasáhá ndáca tuhún ñahá na já nācachi na já xihin á:

—Yo já cacuu da cáhnu chága tá ná tandaa quivi cacomí Ndióxi cuéntá sahá ñayivi —nācachi na xihin Jesús.

<sup>2</sup>Anda já nācana Jesús in da loho já nāacandichi a da mañhú java na cán. <sup>3</sup>Já nācachi a já:

—Mé a ndaa ná cahan i xihin ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuéntá saha ndo. <sup>4</sup>Ná cūni cacuu na cáhnu chága tá cacomí Ndióxi cuéntá sahá ñayivi ndítahan nduu na tátuhun in na cōó saha ta já nduu na tátuhun taa loho yóho. <sup>5</sup>Ta ndá na ná ndiquehe in aloho tátuhun da yóho sahá ña cūni na yehe, na cán cúu na ndíquehe ri na yehe viti.

*Tá jándacava ñayivi inga na nuú cuachi*  
(Mr. 9:42-48; Lc. 17:1-2)

<sup>6</sup> Ta ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú. <sup>7</sup> Ndáhví nahá nacuu ñayivi ñuyíví yóho jáchi mé a ndaa ín cuahá ndivaha ña núu ñuyíví yóho. Ña cán quéa ndácava cuahá ñayivi nuú cuachi joo ndáhví nahá nacuu na jándacava inga na nuú cuachi.

<sup>8</sup> Sahá ña cán quéa tá ndaha ndo á saha ndo jándacava ndohó nuú cuachi, chituhun ndó a ta jácana xicá ndó ña ná cuhun a. Jáchi vaha chága ná cuhun réncó ndó á lundu ndó indiví a juú ga ña ná cuhun níi yiquí cuñu ndó indayá nu cáyi ñúhu ita anda ama cáa quivi. <sup>9</sup> Ta tá nduchú nuú ndo jándacava ndohó nuú cuachi, tavá ndó ña ta jácana xicá ndó ña ná cuhun a. Jáchi vaha chága ná cuhun ndó indiví xihín in túhún nduchú nuú ndo a juú ga ña ná cuhun ndó xihin ndíví nduchú nuú ndo indayá nu cáyi ñúhu ita.

*Tá sácú Jesús quiahva sahá in ndicachi, rí nandiñuhú*  
(Lc. 15:3-7)

<sup>10</sup> Coto a quéhe núu ndó ni in na cúu cuéntá mí i jáchi cáhí i xihin ndó ña tátó Ndióxi, mé na ndáa na cán níi tiempo ndíta na nu Ndióxi, tátá i indiví. <sup>11</sup> Jáchi yehe, da nachindahá Ndióxi nduu ñayivi naquixi i jácacu u ñayivi, na cája cuachi.

<sup>12</sup> Cuni johó ndó ná cahan i xihin ndo: Tá cómí in dataa in ciento ndicachi ta tá ndiñuhú in rí já quéa ña cája da quéa jándacoo da comi jico sahun

comi rí cán yúcu ta já quee da cūhun da ndinducú da mé rí nandiñúhú cán. <sup>13</sup> Ta tá ndiñehe dá ri cajii chága ini da saha rí nandiñúhú cán a juú ga sahá comi jíco sahun comi rí sa ndúu nu dá cán. <sup>14</sup> Ta quiahva já ndoho ri Ndióxi, tátá i jáchi co cūni mé á ña ná ndihi sahá ni in na cāndeé ini mé á.

*Ndítahan caja cáhnu iní sahá ñani táhan í  
(Lc. 17:3)*

<sup>15</sup> Tá caja quini ñani táhan ndó xihin ndo já quea tavá xoo ndó da ta cahan ndó xihin dá ña ná ndicuni da ña a váha toho caja da. Ta tá ná tahvi ini da sahá cuachi caja da já quea sa nandiquehe táhan manj tucu ndó xihin dá. <sup>16</sup> Joo tá co cūni da cuni johoh da nu cáhan ndo já quea ndítahan nu ndó cana ndó in á ivi chága ñani táhan ndó já ná cacuu na testigo sahá ña cáhan ndo. <sup>17</sup> Ta tá co cūni da cuni johoh da nu cáhan na cán xihin dá já quea ndítahan cūhun ndó nu tóco ndihi na cúu cuéntá Jesús táca veñuhu. Ta tá co cūni da cuni johoh da nu cáhan ndihi na cán xihin dá já quea ndítahan caja ndó xihin dá tá quiahva caja ndó xihin in da toho, da co cándúsa Ndióxi á in da jātaca jihún cuéntá impuesto.

<sup>18</sup> Mé a ndaa ná cahan i xihin ndo ña tóco ndihi ñaha ná cató ndo ñuyiví yóho candico a janda indiví. Ta tóco ndihi ña ná ndaxí ndo ñuyiví yóho janda indiví ndaxi ña.

<sup>19</sup> Ta jári cáhan i ña yóho xihin ndó. Tá jándique táhan tuhun ivi ndó ñuyiví yóho ta tá mé a ndaa in cúu ndó sahá ña xica tahvi ndó nu Ndióxi, mé á in indiví já quea quiahva tátá i ña nu ndo. <sup>20</sup> Jáchi nu

ndúu i vi á un i na ta táca na cuénta mí i já quea tañu na cán ndacaan i —nacachi Jesús.

*Tá sácú Jesús quiahva sahá in da co cuni caja cáhnu ini da sahá inga da*

<sup>21</sup> Ta ndaja coo nacayati Pedro ndáca tuhún da Jesús já nacachi da já:

—Xitoho i, ndaja tañu xíní ñúhú caja cáhnu ini i sahá ñani táhan i tá cája núu da xihín i. Á ndítahan nuú i caja cáhnu ini i saha dá janda usa tañu —nacachi da xihín Jesús.

<sup>22</sup> Já nacachi Jesús já xihín dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jíco uxu tañu ndítahan nuun caja cáhnu inún sahá ñani táhún.

<sup>23</sup> 'Cáchi i ña yóho xihín ndó jáchi tá cómi Ndióxi cuénta sahá ñayivi cúú á tátuhun ña nayaha xihín in rey tá nacasáhá da játaca da cuénta nuú na yíca nu dá. <sup>24</sup> Mé tañu já ñéhe na in da yíca cuahá millón nu dá nacasaa na. <sup>25</sup> Ta sahá ña coo nacuu चाहvi da ña yíca da sahá ña cán quea nasahnda rey chuun ña ná jíco na mé dá xihín ñájíhí da xihín jahyi válí da ta janda ñaha da viti ña ná cuu ndiquehe rey cán cuénta da. <sup>26</sup> Anda já nacaxítí da yíca cán nu mé rey já nacasáhá xíca tahví da já cáchi da já: “Caja ndó ñamaní, xitoho i candati too chága ndó yehe, ndáhví i, já चाहvi ndihi i ña yíca i nu ndo”, nacachi da xíca tahví da nu rey cán. <sup>27</sup> Anda já nacandáhví ini rey cán da ta nacaja cáhnu ini a saha tóco ndihi ña yíca da já najaní a da cuahan da.

28 "Ta tá naqueta da yíca cán cuahan da já nandique táhan da xihín inga da cúu mozo. Ta mé mozo cán yíca da loho va nuú da cán. Ta já nacasáhá da ndáca yihí da cuéntá nuú da cúu mozo jácuahnú ñahá da. Já cáchí da já: "Chahvún ña yícún nuú i", cáchí da cán. 29 Anda já nandacava xítí mé da cúu mozo cán nu dá já nacasáhá xíca tahví da nu dá já cáchí da já xihín dá: "Cajún ñamaní candati tóo chágun yehe, ndáhvi i, já chahvi ndihi i ña yíca i nuun", nacachi da cúu mozo cán. 30 Joo coo naxeen da ta ña nacaja da quéa nasahan da nachicaan da da cúu mozo cán vecaa janda quiahva ná cuu chahvi ndihi da ña yíca da nu dá. 31 Ta tá naxini java ga na cúu mozo cán ña yóho já nandihivi ndivaha ini na ta chí ndáva na nasahan na nacaxi tuhun na nu mé rey cán ndaja cáa ña nacuu. 32 Anda já xójo ndivaha ini mé rey cán chí nacana da da nasayicá cán já nacachi da já xihín dá: "Mozo quini ndivaha cúu yóhó. Cuahá ndivaha jiuhún nasayicún nuú i joo nacaja cáhnu ini i saha tóco ndihi a jáchi naxica tahvún nuú i. 33 Quiahva já ndítahan ri nu yóhó va caja cáhnu inún sahá ña yíca ñani táhún nuun jáchi já nacaja i xuhun", nacachi rey cán. 34 Ta sahá ña xójo ndivaha ini mé rey cán xihín dá sahá ña cán quéa nandiquiahva da da yíca cán ndáha na jácaxáhan ñahá cán janda quiahva ná chahvi da saha tóco ndihi ña yíca da —cáchí Jesús.

35 Já nacachi tucu Jesús já:

—Quiahva já caja ri Ndióxi, tátá i, mé a íin indivi xihín ndóhó va tá co cája cáhnu ini ndó sahá ñani táhan ndó xihín ndinuhu ini ndó —cáchí Jesús.

# 19

*Jánaḥa Jesús nuú na sa natandaha ña co ndítahan jándacoo táhan na*

*(Mr. 10:1-12; Lc. 16:18)*

<sup>1</sup> Tá nandihí naçachi Jesús ña yóho já naçuee a estado Galilea já naxinu coo a estado Judea, ña ín inga xoo yuta Jordán cán. <sup>2</sup> Ta a juú quiahva cuahá ñayivi nandico jatá ta nandaja vaha mé á na quíhvi.

<sup>3</sup> Joo ndaja coo java na fariseo naçayati na nu Jesús sahá ña coto ndojó ñahá na cúní na. Já naçachi na já xihín á:

—Á núná nuú in dataa jándacoo da ñájíhí da saha ndá ña naçuu —naçachi na fariseo cán.

<sup>4</sup> Anda já naçachi Jesús já:

—Á a ñaha cahvi ndó tuhun Ndióxi nu cáhí a ña janda mé saha tá naçavaha Ndióxi ñayivi nu cuítí já naçavaha dataa ta naçavaha ñañaḥa. <sup>5</sup> Ta naçachi tucu a ña ndítahan nuú dataa jándacoo da tátá da xihín náná da já ndique táhan da xihín ñájíhí da. Já xinú ndíví na cán cacuu na tátuhun in víxí yiquí cuñu na. <sup>6</sup> Sahá ña cán quéa co cúu ga na ivi yiquí cuñu sahá ña nanduu na tátuhun in túhún yiquí cuñu na. Sahá ña cán quéa co ndítahan nuú da cán janí táhan da ña najacátahan Ndióxi tá natandaha ná —naçachi Jesús.

<sup>7</sup> Anda já nandaca tuhún tucu na cán Jesús já naçachi na já:

—Joo já cachi ndó xihín nde: ndá cuéntá quéa nasahnda ri Moisés chuun ña cuu cavaha in dataa in tutu quiahva da nu ñájíhí da ta xihín ña cán cuu jándacoo da ña —naçachi na cán xihín Jesús.



**8** Já nacachi Jesús ja:

—Sahá ña táhyí ndivaha ínima ndo sahá ña cán quéa sáhan Moisés ñamani nu ndó ña cuu cavaha ndó tutu quiahva ndó nu ñajíhí ndo ña ná jandacoo ndó ña. Joo tá nacavaha Ndióxi ñayivi nu cutít coo nacacúni toho a coo ña yóho. **9** Cuni joho ndó ná cahan i xihin ndo. Tá ná jandacoo in dataa ñajíhí da ta co cuú á sahá ña nacaja ña cuachi xihin inga taa ta tá tándaha dá xihin inga ña ja quéa cája da cuachi nu Ndióxi. Ta quiahva ja in ri cuachi da ná tándaha xihin ña nacandoo cán —cáchí Jesús.

**10** Tá naxini joho na xíca tuun xihin Jesús cán ña yóho ja nacachi na ja:

—Tá ta quiahva ja cáa janda vaha chága ná a tándahá ñayivi, dá ja —nacachi na cán.

**11** Já nacachi Jesús ja:

—A juú ndihi ñayivi candaa ini ña cáhan i yóho. Ndinuhu na ndinuna xíní túni cája Ndióxi, na cán cuú na cándaa ini ña yóho. **12** Nduu java dataa ta a cuú tándaha da jachi ja nacacu da ta ja taa cuú mé va da. Ta java da a cuú tándaha da jachi ja nacaja ñayivi xihin ná ta ja taa cuú mé va na. Ta java da a tándaha da jachi cúni da ndiquiahva ní da mé dá nu Ndióxi ña ná cacomi a cuénta saha dá. Ta ndá ndó, na ndinuna xíní túni, candaa ini ndó ña yóho —nacachi Jesús.

*Cá*ja *yí* *Jesús* *na* *valí*

(*Mr. 10:13-16; Lc. 18:15-17*)

**13** Tá nandihi ja ñéhe na java na valí nacasaa na nu Jesús ña ná chinú a ndahá a jini ná ta ja caca tahvi a nu Ndióxi saha ná. Joo ndaja coo na xíca tuun xihin á cán nacasahá na cája cuehe na xihin

na ndáca na valí cán. <sup>14</sup> Já naçachi Jesús xihín na xíca tuun xihín á cán já:

—Quiahva ndó ñamani ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho — naçachi Jesús.

<sup>15</sup> Tá nandihi já naçhinúu Jesús ndáha á jiní na valí cán. Anda já naquee a cuahan.

*Ndítuhún in da cuicá xihín Jesús*  
(Mr. 10:17-31; Lc. 18:18-30)

<sup>16</sup> Ta ndaja coo naixinu in dataa nu ín Jesús ta nandaça tuhún ñahá da já naçachi da já:

—Maestro, mé ndó cúú ndó ta vaha ña cán quéa ndáca tuhún i ndohó ndía ndítahan caja i já ná ñehé táhvi i cuhun i indiví coo i anda ama cáa quivi — naçachi da xihín Jesús.

<sup>17</sup> Já naçachi Jesús já xihín dá:

—Ndá cuéntá quéa cáchún xihín i ña cúú u da vaha. Ni in túhún toho ñayivi coo cúú ná na vaha ñuyiví yóho. In túhún Ndióxi cuití va quéa vaha. Tá cúnun catacún nu ín mé á já quéa xíní ñúhú cajún ña sáhdá tuhún Ndióxi — naçachi Jesús xihín dá.

<sup>18</sup> Já naçachi da cán já:

—Ndá cúú mé ña ndítahan caja i — naçachi da.

Já naçachi Jesús já xihín dá:

—Coto a cáhnún ndii. Coto a cóun xihín ñájíhí á yí ñani táhún. Coto a cája cuíhnún. Coto a cáhun ña tuhún sahá ñayivi. <sup>19</sup> Ndítahan caja cáhnún tátún xihín nánún. Ta ndítahan quihvi inún ñani táhún tá quiahva quihvi inún mún — naçachi Jesús.

<sup>20</sup> Já naçachi da yúta cán já xihín á:

—Janda taa loho nasacuu u nacasáhá i cája i tóco ndihi ña sáhdá Ndióxi caja i. Ndiá cúu ga ndítahan caja i —nacachi da.

<sup>21</sup> Já nacachi Jesús já xihín dá:

—Tá ta cúnun cacuún in taa ndacú nu Ndióxi cuáhán jicún tóco ndihi ñahún jan ta ndacahndún jjuhún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —nacachi Jesús.

<sup>22</sup> Tá naxini johó da yúta cán ña yóho já naquee cuéha ndivaha da cuahan da jáchi da cuicá ndivaha cúu dá.

<sup>23</sup> Anda já nacachi Jesús xihín na xíca tuun xihín á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuénta saha ná. <sup>24</sup> Jáchi janda cama chága cuu yaha in camello ini in yávi sahá yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuénta saha dá —nacachi a.

<sup>25</sup> Tá naxini johó na xíca tuun xihín Jesús cán ña yóho já nacatontó ndivaha na ta nandaca tuhún táhan na já cáchi na já:

—Ndá na cúu na cuu cacu ndaa ínima, dá já —cáchi na.

<sup>26</sup> Nandicoto nihni Jesús nu ná já nacachi a já xihín ná:

—Ni in na a cúu caja ña yóho joo Ndióxi quea cuu caja ña jáchi ni in ñaha co íhvi toho nu Ndióxi —nacachi Jesús.

<sup>27</sup> Anda já nacachi Pedro já:

—Joo ndehe, najándacoo ndihi nde ñaha nasacomí nde ta ndíco nde ndohó. Ndía ñehe táhvi nde caja ndó —ñacachi Pedro xihín Jesús.

<sup>28</sup> Anda já ñacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da ñachindahá Ndióxi nduu ñayivi nuú ndicánu ndivaha i. Ta cán cacoo ri ndóhó, na ñaxica tuun xihín i nuú uxu ivi táyi vaha. Ta cán caja ví ndó sahá ndíhuxu ivi táhnda na ñaquixi chichi Israel. <sup>29</sup> Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúu na ñehe ná cuaha chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi. <sup>30</sup> Ta ndúu cuahá na ín saha ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na ín saha nu Ndióxi —ñacachi Jesús.

## 20

*Sácú Jesús quiahva sahá java da sáhnda uva*

<sup>1</sup> Já ñacachi Jesús já sácú a quiahva:

—Nuú cacomí Ndióxi cuéntá sahá ñayivi cúu á tátuhun ña yóho: Ín in dataa naha chá ñaquee da cuahan da nducú da mozo caja chúun da cahnda da uva nu ñúhu dá. <sup>2</sup> Ta ñacandoo da chahvi da in jihún caa naní denario in quivi. Ta já ñachindahá da mé mozo cán cuahan da caja chúun da nu ñúhu dá. <sup>3</sup> Tá ñandihí já ñaquee tucu da xihín ñaha ñúhu cán tátuhun caa in naha já ñanditahan da java da ndúu núná uun nuú yahvi.

<sup>4</sup> Já naçachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já चाहवि i ndohó tá quiahva ndítahan nu ndó quehe ndó”, naçachi da. Já naquee mozo cán cuahan da jáquee da nu ñúhu dá. <sup>5</sup> Ta tá naçuu çaxivi já naqueta tucu da xihín ñaha ñúhu cán cuahan da ta ñatiin da java ga da caja chúun xihín dá. Ta tá naçuu çaa uni ñatiin chága da da jáquee nu ñúhu dá. <sup>6</sup> Ta tá naçuu tátuhun çaa uhun sahini naqueta tucu da ta nuú yahvi cán naçini chága da da ndúu núná uun. Já naçachi da já xihín da ndúu cán: “Ndá cuéntá quea sa naçuu ndivi yaa ndúu ndó yóho”, naçachi da xihín da ndúu cán. <sup>7</sup> Ta nanducú ñehe da cán tuhun já cáchi da já: “Cò cája chúun nde jáchi cóo na quíxi ndúcú nde caja chúun nde”, naçachi da cán. Anda já naçachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já चाहवि i ndohó tá quiahva ndítahan nu ndó quehe ndó”, naçachi da.

<sup>8</sup> Ta tá sa naçuaá já naçachi da xihín ñaha ñúhu cán xihín da cómi chuun nu mozo cán ña ná cana da da cúu mozo cán já ná quehe yahvi da sahá chuun naçaja da. Ta da naquihvi naçaja chúun nu ndihí cán, da cán cúu da jihna ñúhú ná quehe yahvi. Tá nandihí cán ná quehe yahvi da naquihvi nu cuítí. <sup>9</sup> Anda já naçasaá da naquihvi caja chúun çaa uhun sahini já naquehe in in da cán in denario. <sup>10</sup> Ta ndaja coo tá naçani a nuú da naquihvi caja chúun janda naha cán quehe yahvi da já quea naçahán da ña cuaha chága jjuhún ndiquehe da nuú da naquihvi çaa uhun sahini cán. Joo quiahva já in denario naquehe ri in in da cán. <sup>11</sup> Sahá ña cán quea naçasáhá da çahan cuachi

da xihín da xihín ñaha ñúhu cán. <sup>12</sup> Já ñacachi da já: “Da ñandai cuu caja chúun nu ndíhí cuí yóho in hora cuití ñacaja chúun da. Ta tá quiahva ñachahvi ndó ndehé, da ñacaja chúun ndiví yaa nu ndítahyí quiahva já ñachahvi ri ndó nuú da cáa va”, ñacachi da cáhan cuachí da cán. <sup>13</sup> Anda já ñacachi da xihín ñaha ñúhu cán xihín in táhan mozo cán já: “Candehé, amigo. Co cája quini toho i xuhun. Á a juú in denario ñacandoo i chahvi i nuun. <sup>14</sup> Júhun ña ndítahan quehún ta cuanúhun. Jáchi cúni chahvi i nuú da ñacaja chúun in hora cuití va tá quiahva ñacandoo i chahvi i nu yóhó. <sup>15</sup> Jáchi núná nuú i caja i ña cúni mí i xihín jjuhún i. Ta co ndítahan cahihvi inún sahá ña vaha ini i”, ñacachi da xihín ñaha ñúhu cán xihín da cáhan cuachí cán —ñacachi Jesús sácú a quiahva.

<sup>16</sup> Ta ñacachi tucu a já:

—Sahá ña cán quéa ndúu cuahá na íin saha ñuyiví yóho viti joo vaxi quivi cacuu na ña coó saha nu Ndióxi. Ta ndúu cuahá na coó saha ñuyiví yóho viti joo vaxi quivi cacuu na ña íin saha nu Ndióxi — ñacachi a.

*Cáxi tuhun tucu Jesús ña quivi a*

*(Mr. 10:32-34; Lc. 18:31-34)*

<sup>17</sup> Ta tá sa ñaquee tucu Jesús cuahan chí Jerusalén já íchi cán ñatavá xóo a ndíhuxu ivi na xíca tuun xihín á cán já ñacachi a já xihín ná:

<sup>18</sup> —Candehé ndo. Yóho ndáa í cuahan yó chí Jerusalén nuú ndiquiahva na yehe, da ñachindahá Ndióxi nduu ñayivi ndahá ña sacuahá nuú jutú xihín nuú ña jánahá ley Moisés. Ta ña cán cúu ña cacu ini sahá ndaja quivi i. <sup>19</sup> Anda já

ndiquiahva na yehe ndahá na tóho ña ná cuacu ndaa na yehe. Ta cani na yehe ta já cata caa na yehe ndica crúxu joo tá ná yaha uní quivi já nditacu tucu u —ñacachi Jesús.

*Tá naxica náná Jacobo xihin Juan ñamaní nuú Jesús*

*(Mr. 10:35-45)*

<sup>20</sup> Andá já ñacayati ñájíhí Zebedeo, ña cúu náná Jacobo xihin Juan nuú Jesús. Ta ndáca ña ndívi jahyi ña ñacasaa ña ñacaxítí ña nu á jáchi cúni ña cacá ña in ñamaní nuú Jesús. <sup>21</sup> Andá já ñacachi Jesús já xihin ña:

—Ndá quéa cúni ndó —ñacachi a.

Já ñacachi ña cán já:

—Ña cúni quéa ná caja ndó ñamaní cahnda ndó chuun ña ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —ñacachi ña cán.

<sup>22</sup> Andá já ñacachi Jesús já xihin ña:

—Co cándaqa ini ndó ña xíca ndó nuú i —ñacachi a.

Andá já ñacachi a já xihin Jacobo xihin Juan cán:

—Á cuu ndoho ini ndó tá quiahva nditahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á íin tiahva ndó ndoho ini ndó tá quiahva ndítahan nuú i ndoho ini i andá quiahva ná quivi i —ñacachi Jesús xihin ndívi da cán.

—Cuu caja nde ña —ñacachi ndívi da cán xihin Jesús.

<sup>23</sup> Andá já ñacachi tucu a já xihin dá:

—Mé a ndaa tandaa quivi coho ndó ña ova ñuhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo íti i a juú yehe cúú dá cuu quiahva i ña nu ndo. Jáchi sa nandicaxi Ndióxi na ñehe táhvi cacoo cán —nacachi a.

<sup>24</sup> Joo ndaja coo tá naxini joho ndíhuxu chága na xíca tuun xihín Jesús cán ña yóho já nacasáhá na xójo ini na xihin ndívi da cúú ñani cán. <sup>25</sup> Anda já nacana Jesús tóco ndihi na xíca tuun xihín a cán já nacachi a já xihin ná:

—Sa xini ndó ndaja cája na sáhdá chuun nuú ñayivi ndúu ñuyívi yóho. Ña cája na quéa jácandíhi na ñayivi ta cája na tá quiahva cuni mé ná. <sup>26</sup> Joo co ndítahan coo ña cán tañu mé ndó jáchi ndá da cuni cacuu da cáhnu chága tañu ndó xini ñúhú cacuu da in da cája chúun cuéntá ndihi ndó. <sup>27</sup> Ta ndá da cuni cacuu da nu cuítí tañu ndóhó ndítahan cacuu da da cája ndívi nuú ndihi ndó. <sup>28</sup> Jáchi ni yehe, da nachindahá Ndióxi nduu ñayivi coo naquixi i ñuyívi yóho ña ná caja ndívi ñayivi nuú i. Ña naquixi i caja i quéa caja ndívi i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cùhun na indayá —nacachi a.

*Tá nandaja vaha Jesús ivi da cuaá  
(Mr. 10:46-52; Lc. 18:35-43)*

<sup>29</sup> Ta tá naqueta Jesús ñuu Jericó xihin na xíca tuun xihin á cán já ndíco cuahá ndivaha ñayivi jatá cásahan na. <sup>30</sup> Ta ndaja coo yati jín íchi cán nasanduu coo ivi da cuaá ta tá naxini joho da ña



yáha Jesús cuahān já načasáhá ndíví da cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —cáchí da.

<sup>31</sup> Anda já načasáhá cája cuehe ñayivi xihin ndíví da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —nacachi da.

<sup>32</sup> Anda já nandaca ndichi Jesús já nacana ndíví da cuaá cán. Ta já nandaca tuhún a da já nacachi a já xihin dá:

—Ndía cúní ndó ña ná caja i xihin ndo —nacachi a.

<sup>33</sup> Já nacachi ndíví da cuaá cán já:

—Candehé nde cúní nde, xitoho.

<sup>34</sup> Anda já nacandáhví ini Jesús da ta nacani ndaa ndáha á nuu dá. Chí ivi laá nanuna nuú da cuaá cán ta načasáhá da ndíco da jatá Jesús cuahān da.

## 21

### *Ndihvi Jesús ñuu Jerusalén*

*(Mr. 11:1-11; Lc. 19:28-40; Jn. 12:12-19)*

<sup>1</sup> Ta tá sa ja chá xinu ɔo na ñuu Jerusalén já naxinu na in ñuu loho naní Betfagé yati jín yucu naní olivo. Ta cán nasahnda Jesús chuun nuú ivi táhan da xica tuun xihin á cán. <sup>2</sup> Já nacachi a já xihin dá:

—Cuáhán ndó ñuu loho jan ta tá ná xinu ɔo ndó jan ndiñehe ndo in búrrɔ jíhí ndíco ndaa rí ta xihin mé rí jan cándichi inga búrrɔ loho. Ndaxí ndó rí ta cañehe ndó ndíví rí quixi ndó. <sup>3</sup> Ta ndá na ná cahan

xih̄in ndo já quéa cachi ndó xih̄in ná ña xíní ñúhú xitoho ndó r̄i joo tá ná ndihi chuun r̄i já nducú ñehe tucu da r̄i, já cachi ndó xih̄in ná —ñacachi Jesús xih̄in ndíví da cán.

<sup>4</sup> Tóco ndihi ña yóho ñayaha já ná xinu cōo nuú ña ñacahyí in da profeta já:

<sup>5</sup> Joho cachi ndó xih̄in na ñuu Jerusalén:

“Candehé ndo. Ndáhví uun cáa da cómí cuéntá saha ndó.

Vaxi da nu ndo ta canúu da jata búrrō jíhí, jahyi in rí ndiójo, canúu da vaxi da nu ndo”, cáchí tuhun Ndióxi.

<sup>6</sup> Ta ndíví da xíca tuun xih̄in Jesús cán ñasahan da ñacaja da tá ín ñasahnda Jesús chuun nu dá.

<sup>7</sup> Já ñehe da búrrō jíhí cán xih̄in búrrō loho, jahyi rí ñaxinu na nuú Jesús. Anda já ñachojó na cotó ndéé na jata r̄i ta ñandaa Jesús jata r̄i. <sup>8</sup> Ta mé cuahá ñayivi ndúu cán ñacasáhá na chinduu na cotó ndéé na íchi mé nuú yaha Jesús cán. Ta java na ñacasáhá na sáhdá na ndahá yito ta chinduu na do íchi mé nuú yaha Jesús cuhun a. <sup>9</sup> Ta ñayivi cuahan chí nuu ta jári na vaxi chí jata ñacasáhá na cáyuhú na já cáchí na já:

—Cája cáhnu í da ñaquixi chichi David yóho. Ndicáhnu ñahá ná cacuu da cómí cuéntá saha yo jáchi cúu dá da vaxi yuhú nuu Ndióxi. Cáhnu ná cacuu Ndióxi —cáchí ñayivi cuaha cán cáyuhú na cásahan na xih̄in á.

<sup>10</sup> Ta tá ñandihvi Jesús ñuu Jerusalén cán tóco ndihi ñayivi ñacasáhá cátóntó ndivaha na. Já cáchí xih̄in táhan na já:

—Ndá da cúu da yóho —cáchí xih̄in táhan na.

<sup>11</sup> Java táhan na cán cáchí na:

—Da yóho cúu in profeta, da ñuu Nazaret cuéntá estado Galilea —cáchi xihín táhan na.

*Tá nataxí Jesús na ndúu jíco ñaha yéhe veñuhu  
(Mr. 11:15-19; Lc. 19:45-48; Jn. 2:13-22)*

<sup>12</sup> Anda já nandihvi Jesús veñuhu cáhnu cán já naçasáhá táxi ndihi a na ndúu jíco xihín na ndúu xéen cán. Ta naxícó ñehe a mesa na ndúu ndíjama jiuhún cán ta naxícó ñehe a táyi sácoo na ndúu jíco ndijata. <sup>13</sup> Já naçasáhá cáchi a já xihín ndihi na cán já:

—Já cáchi tuhun Ndióxi já: “Vehe mí i cacuu a vehe nuú quixi na caça tahví na nu Ndióxi”, cáchi tuhun Ndióxi. Joo ndóhó nandai cuu ndó yóho caja cuíhná ndo nuú ñayivi —nacachi Jesús xihín ná.

<sup>14</sup> Tá nandihvi já nacayati java na cuaá xihín java na réncō nu á ini mé veñuhu cáhnu cán ta nandaja vaha mé á na. <sup>15</sup> Joo xójo ndivaha ini na sacuaḥa nuú jutū xihín na jánaha ley Moisés tá naxini na ña xitúhún nacaja mé á ta tá naxini johō na ña cāja cáhnu na valí cán mé á tá cáchi na já: “Cāja cáhnu í da naquixi chichi David.” Sahá ña cán quēa xójo ini na <sup>16</sup> ta já nacachi na já xihín Jesús:

—Á xini johún ña cáhan na valí yóho —nacachi na xihín Jesús.

Já nacachi Jesús já:

—Ajan, xini johō i ña cāja cáhnu na Ndióxi. Á coó nacahvi ndó tuhun Ndióxi nu cáchi a já:

Janda na valí ta janda na chichí nacaja Ndióxi xihín ná,

ñā ná cuu caja cáhnu na mé á, cáchi tuhun Ndióxi  
—nacachi Jesús xihín na cán.

17 Anda já najándacoo a na já naqueta jatá ñuu cán cuahan chí ñuu Betania ta cán nasahiin a.

*Tá natchicaan Jesús cháhan jatá titó ñuhú  
(Mr. 11:12-14, 20-26)*

18 Ta inga quiví itaan tá nandicó coo a cuahan chí Jerusalén já nacasáhá cuíco a cuahan. 19 Ta yuhú íchi cán naxini a cándichi in titó ñuhú. Ta chí nasahan sándehe a á íin cuihi nu do caxí a. Joo coó ñaha ná ndiñehé a. Ndáha uun dó cán cuití va íin. Anda já nacachi a já xihin do:

—Ni in túhún ga tañu a cána cuihi nu yóho — nacachi a xihin do.

Chí ivi laá nahichi titó ñuhú cán. 20 Tá naxini na xica tuun xihin Jesús cán ña yóho já nacatontó na já cáchi na já:

—Ndá cuéntá quéa nahichi titó ñuhú cán ivi tuhun —nacachi na xihin Jesús.

21 Ta nanducú ñehé Jesús tuhun nu ná já nacachi a já:

—Mé a ndaa ná cahan i xihin ndo ña tá ná candeé ini ndó yehe ta ni loho co cáhvi ivi joho ini ndó já quéa cuu caja ndó ña náhnu chága nuú ña nacaja i yóho. Ta janda cuu cachi ndó xihin in yucu: “Caxoo ta cuahán jáquetún mún ini tañuhú”, ta chí já ndusa coo. 22 Ta tá ná candeé ini ndó yehe nani xica tahvi ndo nu Ndióxi ta co cáhvi ivi joho ini ndó já quéa ñehé ndó ña xica ndo nu á —nacachi Jesús.

*Tá ndaca tuhún na Jesús yo sahan ndéé nu á ña jánaha mé á nuú ñayivi  
(Mr. 11:27-33; Lc. 20:1-8)*

23 Tá nandihi já nandihvi Jesús ini veñuhu cáhnu cán ta nani jánaha tuhun Ndióxi nuú na ndúu cán

naxinu na sacuahā nuú jutū xihín na sacuahā nuú na Israel cán nu á. Já nacachi na já xihín á:

—Yo já sáhan ñamanī nuun cajún ña cájún yóho —nacachi na.

<sup>24</sup> Anda já nanducú ñehe Jesús tuhun nu ná já nacachi a já:

—Ta ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamanī nuú i caja i ña cája i yóho. <sup>25</sup> Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá —nacachi Jesús ndáca tuhun a na.

Já nacasáhá ndítuhún xihín táhan na já cáchí na já:

—Tá ná cachí ña Ndióxi quéa nachindahá Juan ta já nducú ñehe Jesús tuhun nu yo já cachi da xoho: “Ndá cuénta quéa cōó naxeen ndó candúsa ndó da, dá já”, cachi Jesús xoho. <sup>26</sup> Ta tá ná cachí ña ñayivi cúu na nachindahá Juan já yihví yo ña ndicuíta ñayivi xihín yo. Jáchi tóco ndihi na cándúsa na ña naquixi Juan jáyaha da ña naçahan Ndióxi nuú ñayivi —cáchí na ndítuhún xihín táhan na.

<sup>27</sup> Sahá ña cán quéa nacachi na já xihín Jesús:

—Cō xini toho nde yo já nachindahá Juan.

Anda já nacachi Jesús já xihín ná:

—Ta ni yehe a cáxi tuhun i nu ndo yo já nasahan ñamanī nuú i caja i ña yóho —nacachi Jesús xihín na cán.

*Sácu Jesús quiahva sahá ivi da cúu jahyi in dataa*

<sup>28</sup> Anda já nacachi tucu Jesús xihín na cán já:

—Cuni joho ndó ña nayaha in tañu. Íin in dataa ta nasahin ivi jahyi ta da. Ta nasahan da nuú in táhan da cán já nacachi da já xihin dá: “Jahyi a, cuáhán caja chúun lohún nu ñuhú i nu cáa tó uva”, nacachi da xihin jahyi da. <sup>29</sup> Já nacachi jahyi da já xihin dá: “A cühun toho i jáchi co xíca ini i cühun i”, nacachi da. Joo tá nandihí nacahvi ini da ña a váha ná cuu ini da chí já naquee da cuahan da caja chúun da nu ñuhú tátá da. <sup>30</sup> Ta jári nasahan tátá da cahan da xihin inga jahyi da ta quiahva já nasahnda ri da chuun nuú da cán. Ta da cán nacachi da já xihin tátá da: “Ajan. Cühun i”, cáchi da. Joo tá nandihí coó nasahan toho da. <sup>31</sup> Ta viti cachi ndó xihin i ndá da cúú da nacaja ña cúní tátá da —nacachi Jesús.

Já nacachi na cán:

—Da nu cuítí.

Anda já nacachi tucu Jesús já:

—Mé a ndaa ná cahan i xihin ndo ña íin chága sahá na jataca jjuhún cuéntá impuesto xihin najihí xíca jii ña ná cacomí Ndióxi cuéntá saha ná a juú ga ndohó. <sup>32</sup> Jáchi naquixi Juan, da jácandúta ñayivi najána ha da ndohó ndaja ndítahan caja ndó ta coó naxeen ndó candúsa ndó da. Joo na jataca jjuhún cuéntá impuesto xihin najihí xíca jii nacandúsa na ña nacahan da. Ta vatí naxini ndó ña yóho joo coó naxeen ndó ndijama ndó ña cája ndó jáchi coó naxeen ndó candúsa ndó mé Juan.

*Sácú Jesús quiahva sahá java mozo, da nacaja quini xihin xitoho da*

*(Mr. 12:1-12; Lc. 20:9-19)*

<sup>33</sup> Cuni j<sub>o</sub>ho ndó ná cacu u inga quiahva nu ndo. N<sub>a</sub>sah<sub>i</sub>in in dataa ta najándee cuaha dá tó uva nu ñúhu dá. Ta n<sub>a</sub>sacu da in corra yíto nu do. Ta n<sub>a</sub>cavaha da in nuú cuhni mé uva cán ña cavaha vino. Ta n<sub>a</sub>cavaha da in nu jíco canúu da já cuu candaa da tóco ndihi dó cán.

Anda já n<sub>a</sub>sahan ndojó da ñúhu dá nuú java na caja chúun na ña. Ta já naquee da cuahan xíca da. <sup>34</sup> Ta tá n<sub>a</sub>xinu tiempo jáquee na já n<sub>a</sub>chindahá da java mozo da ña ná cuhun na nuú na ndúu cája chúun ñúhu da cán ña ná ndiquiahva na nu dá ña cáni nu dá ndiquehe da saha ñúhu dá ña n<sub>a</sub>sahan ndojó da nuú na cán. <sup>35</sup> Joo ndaja coo na cája chúun nu ñúhu cán n<sub>a</sub>tiin na in táhan da cúu mozo da cán ta n<sub>a</sub>cani na da. Ta inga táhan da cán n<sub>a</sub>sahní na. Ta inga táhan da cán n<sub>a</sub>ndicuita ñee na xihín yuu. <sup>36</sup> Joo mé da xihín ñaha ñúhu cán n<sub>a</sub>chindahá cuaha chága da mozo da n<sub>a</sub>sahan da nu ñúhu dá. Ta tá quiahva n<sub>a</sub>caja na xihín mé java mozo n<sub>a</sub>sahan nu cuítí cán quiahva já n<sub>a</sub>caja ri na xihín tóco ndihi mozo cán.

<sup>37</sup> Tá n<sub>a</sub>ndihi já n<sub>a</sub>sacu ini da xihín ñaha ñúhu cán chindahá da jahyi da jáchi n<sub>a</sub>cahán da: “Cája i cuéntá coo toní ñúhú na xihín jahyi i”, n<sub>a</sub>cahán da xihín ñaha ñúhu cán. <sup>38</sup> Joo tá n<sub>a</sub>xini na cája chúun ndojó ñúhu cán ña vaxi da cúu jahyi da xihín ñaha ñúhu cán já n<sub>a</sub>cachi xihín táhan na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, n<sub>a</sub>cachi xihín táhan na cán. <sup>39</sup> Ña cán quéa n<sub>a</sub>tiin na da ta n<sub>a</sub>tavá na

da janda yuhú cútū ta cán nasahní na da —nācachi Jesús sácú a quiahva.

40 Anda já nandaca tuhún Jesús na ndúu cán já nācachi a já:

—Ndía cáhan ndo caja da xihín ñaha ñúhu yóho xihín na cája chúun nu ñúhu dá —nācachi a.

41 Anda já nācachi na cán já xihín Jesús:

—Ña caja da quéa cahní da na quini, mé na nācāja chúun tóo nu ñúhu da cán. Ta já ndiquiahva ndojó da ñúhu da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saha ñúhu dá —nācachi na cán xihín Jesús.

42 Já nācachi Jesús já xihín na cán:

—Á a ñaha cahvi ndó tuhun Ndióxi nu cáchi a:  
Mé yuu ña najácana da cávaha vehe,  
ña cán cúu ña nanduu yuu ndúhu sahá vehe ña ín  
chága saha.

Ña yóho quéa nācāja Ndióxi,  
ta cúu á in ñaha cáhnu ndivaha nu yo, cáchi tuhun  
Ndióxi.

43 Ña cán quéa cáhan i xihín ndó ña cacu xoo Ndióxi ndohó ña ná a cácomí ga mé á cuéntá saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuéntá saha ná, mé na ndiquiahva na nu á ña cáni nu á ndiquehe a. 44 Ta cáchi i xihín ndó ña yehe cúu u tátuhun mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá cō cūni na candúsa na yehe. Ta tá mé yuu cán ná yaha ndicava jatá in na já caji ndihí ñahá.



Quiahva já ndihi sahá ñayivi ini indayá tá cō cūni na candúsa na yehe —ñacachi Jesús.

<sup>45</sup> Tá naxini johō na cúu sacuaḥa nuú jutū xihín na fariseo cán ña yóho, ñacandaḥ táhyí ini na ña saḥa mé ná cáḥan Jesús. <sup>46</sup> Sahá ña cán quéa nanducú na tiin na mé á joo cōo ñacuu caja na sahá ña ñayihví na ñayivi jáchī cándúsa ñayivi cán ña cáḥan Jesús cuéntá Ndióxi.

## 22

### *Sácú Jesús quiahva sahá vicó tándaha (Lc. 14:15-24)*

<sup>1</sup> Tá nandihī já ñacasáhá tucu Jesús jánaḥa ñayivi xihín ndinuhu quiahva. Já cáchī a já xihín ná:

<sup>2</sup> —Nuú cacomí Ndióxi cuéntá sahá ñayivi cúu á tátuhun ña ñayaha xihín in rey tá ñacavaḥa da in vicó ña tándaha jāhyi ṭaa da. <sup>3</sup> Nāchindahá da mozo da ña ná cūhun da cana da na ndítahan quixi. Joo cōo ñaxeen na quixi na mé vicó. <sup>4</sup> Anda já ñachindahá chága da mozo da ña ná caxi tūhun da nuú na ndítahan quixi cán ña sa ñacaja ndívī da ña cuxu na. Sa ñaxihī tīndiqui xihín java ga quítī, rí ñandaha. Sa ñacandívī ndihī ñaha cuéntá vicó tándaha sahá ña cán quéa ná quixi na. Ña yóho cúu chuun ñatahnda nu mozo cán cachi da xihín na ndítahan quixi cán. <sup>5</sup> Joo cō ndaa na cán cūhun na. In táhan da cán ñaquee da cuḥan da candehé da nu ñúhu dá. Ta inga da ñaquee da cuḥan da caja ndahví da. <sup>6</sup> Ta java ga na cán ñatiin na mozo mé rey cán ta ñacaja xíxi na xihín dá janda quiahva ñasahní ñahá na. <sup>7</sup> Anda já ñaxojo ndivaḥa ini rey cán sahá ña cán quéa ñachindahá da soldado da ña

ná cuhun na cahní na na nasahní ndií cán ta ná chicaan ñúhu dá ñuu na. <sup>8</sup> Anda já nacachi tucu rey cán já xihín java ga mozo da: “Sa nacandívi tócó ndihi ñaha ña coo víco joo na nacana i cán coó saha toho na quixi na víco. <sup>9</sup> Ña cán quéa cuáhán ndó ndijáá cáyé náhnu ta ndá ñayivi nacuu cana ndó na ná quixi na víco tándaha yóho”, nacachi rey cán nasahnda da chuun nu mozo da. <sup>10</sup> Anda já naquee mozo da nasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti nataca nacaja na. Ta já najacutú na vehe nuú coo víco tándaha cán xihín ñayivi.

<sup>11</sup> Anda já nandihvi rey nu ñúhu na cán já naxini da ndácaan in dataa, da co ndíxi jáhma ña ndíxi na ndúu víco tándaha. <sup>12</sup> Ta nacayati mé rey nu dá já nacachi da já xihín dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándaha”, nacachi rey xihín da cán. Joo coó nanducú ñehe da tuhun nu rey. <sup>13</sup> Anda já nasahnda rey chuun nu mozo da. Já nacachi da já xihín ná: “Cató ndó ndáha dá xihín saha dá. Ta jácana ndó da chí jata nuú naá yávi. Cán cuacu ndivaha da anda quiahva cahña nuhu da”, cáchí da. <sup>14</sup> Jáchi cuahá ndivaha cúu ná nacana Ndióxi ña ná cacomí a cuéntá saha joo chá cúu ná ndiquiahva na ndáha mé á ña ná cuu caxi a na — nacachi Jesús.

*Ndáca* tuhún na *Jesús* á nditahan nu ná *chahvi* na *jiuhún* cuéntá *impuesto*

(*Mr. 12:13-17; Lc. 20:20-26*)

<sup>15</sup> Tá nandihí já naquee na fariseo nasahan na jándique táhan na tuhun na ndaja caja na coto

ndojó na Jesús xihín tuhun cáhan mé á já ná cuu jácojo na cuachi jatá. <sup>16</sup> Ña cán quéa nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaá ini nde ña jánaha ndó ña ndaa saha íchi cuéntá Ndióxi. Ta cō quéhe ndó cuéntá tá cáhan núu ñayivi saha ndo. Ta cándaá ini nde ña tá cáhan ndó sahá in ñaha cája ñayivi cúú á sahá ña sándehe ndó janda ínimá ná. <sup>17</sup> Sahá ña cán quéa cúni nde candaá ini nde ndía cachi ndó sahá ña yóho: Á ndítahan nuú nde chahvi nde jiuhún cuéntá impuesto nuú dá cómi cuéntá sahá ñuu Roma. Á chahvi nde ña á a chahvi toho nde ña —nacachi na cán xihín Jesús.

<sup>18</sup> Joo sa nacandaá ini Jesús ña chahvi núu ini na sahá ña cán quéa nacachi a já xihín ná:

—Cō cúú ndó tá quiahva ndáa ndó jáchi cúni ndó coto ndojó cuití ndó yehe. <sup>19</sup> Jánaaha ndó in táhan jiuhún ña chahvi ndó impuesto jan nuú i —nacachi Jesús.

Anda já nasahan na in jiuhún caa naní denario nu á. <sup>20</sup> Tá naxini Jesús ña yóho já nacachi a já xihín ná:

—Yo nahná ta yo quivi quéa ndáa nu á —nacachi a.

<sup>21</sup> Já nacachi na cán já xihín á:

—Néhe a nahná xihín quivi dá cómi cuéntá sahá ñuu Roma —nacachi na.

Anda já nacachi tucu Jesús já:

—Ndiquiahva ndó ña cúú ñaha dá cómi cuéntá sahá ñuu Roma jan nu dá. Ta ndiquiahva ndó ña cúú ñaha Ndióxi nu á —nacachi a.

22 Tá naxini jōho na cán ña yóho já naçatóntó na ta najándacoo na a naquee na cuahan na.

*Tá ndáca tuhun na Saduceo Jesús á mé a ndaa nditacu ndii*

*(Mr. 12:18-27; Lc. 20:27-40)*

23 Ta sa mé quivi já nasahan java na saduceo cahan na xihín Jesús. Ta mé na saduceo yóho co cándusa na ña nditacu tucu na sa naxihí. Sahá ña cán quea nandaca tuhún na Jesús já cáchí na já xihín á:

24 —Maestro, nu ley naçahyí Moisés sanahá natahnda chuun ta cáchí a já: “Tá tandaha in dataa xihín ñájíhí da ta tá xihí da ta coó jahyi da cacu já quea ndítahan nuú ñani da tandaha dá xihín ña cuaan naçandoo cán. Ta já ná coo jahyi da cán xihín yuhú nuú ñani da”, cáchí ley Moisés. 25 Ta viti cuni jōho ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuítí cán natandaha dá xihín in ñañáha. Tá nandihí já naxihí da. Joó sahá ña coó jahyi da naçacu xihín ñájíhí da sahá ña cán quea nandiquehe ñani da, da chí ivi jata dá ña cuaan cán. 26 Ta quiahva já nandoho ri da chí ivi cán jáchí naxihí da ta coó jahyi da naçacu xihín ña. Ta janda ndíhusa ñani cán natandaha xihín ña ta ndíhusa da naxihí ta ni in da coó naçacu jahyi xihín ña. 27 Ta tá nu ndíhí naxihí ri ñañáha cán va. 28 Ta viti cachi ndó xihín nde tá ná xinu quiví nditacu tucu ndii, ndá da cacuu ndusa yí ña cán jáchí ndíhusa ñani cán natandaha xihín ña ñuyíví yóho —naçachi na saduceo cán xihín Jesús.

29 Anda já naçachi Jesús já:

—A váha toho cáhán ndo jáchi co xini ndó ndaja cáhan tũhun Ndióxi ta ni co xini ndó ndá quiahva cáhnu cúú ndée Ndióxi. <sup>30</sup> Jáchi mé quivi tá ná nditacu tucu ndji a tándaḥa ga ná ta ni a quiahva na jahyi jíhí na tandaha ná. Cacuu na tátũhun táto Ndióxi ndúu indivi ta co tándaḥa na cán. <sup>31</sup> Joo sa xini yo ña nditacu tucu ndji. Á a ñaha cahvi ndó tũhun Ndióxi nu cáchi a já: <sup>32</sup> “Yehe cúú Ndióxi ña cája cáhnu Abraham ta yehe cúú Ndióxi ña cája cáhnu Isaac ta yehe cúú Ndióxi ña cája cáhnu Jacob viti”, naçachi a. Ta ña yóho cúní cachi a ña tácu yii va Abraham xihín Isaac xihín Jacob vatí sa naxihí yiquí cuñu na —naçachi Jesús.

<sup>33</sup> Tá naxini johó ñayivi ndúu cán ña yóho já naçatontó na xihín ña jánaḥa Jesús nu ná.

*Tá cáhan Jesús ndá ley quéa cáhnu chága  
(Mr. 12:28-34)*

<sup>34</sup> Tá nañehé na fariseo tũhun ña naquee vaha Jesús nasahnu a nuú na saduceo já nanditútú ndihi na. <sup>35</sup> Ta in táhan mé da cán, da jánaḥa ley Moisés nandaça tũhún da Jesús jáchi cúní da coto ndojó da mé á. Já naçachi da já:

<sup>36</sup> —Maestro, ndía cúú ña cáhnu chága sáhdá ley Moisés caja í —naçachi da cán xihín Jesús.

<sup>37</sup> Já naçachi Jesús já xihín dá:

—Ña cáhnu chága nu ley Moisés cúú ña yóho: “Ndítahan quihvi ini ndó Ndióxi, xitoho ndó xihín tóco ndihi ínima ndó ta xihín ndinuhu ini ndó ta xihín tóco ndihi xíní túní ndo.” <sup>38</sup> Ña yóho cúú ley nu cuítí ta cúú á ña cáhnu chága nu tóco ndihi ley. <sup>39</sup> Ta tá quiahva íin ña nu cuítí yóho quiahva já íin ri ña chí ivi va ta cáchi a já: “Xíní ñúhú quihvi

ini ndó ñani táhan ndó tá quiahva quíhvi ini ndó mé ndó.” <sup>40</sup> Ta jata ndívi ña yóho tín tóco ndihi ley Moisés xihín ña najánaḥa na profeta sanahá — naçachi Jesús xihín na fariseo cán.

*Ndáca tuhún na Jesús ndáchí naquixi a  
(Mr. 12:35-37; Lc. 20:41-44)*

<sup>41</sup> Ta nani nanditútú ndihi na fariseo ndúu na nu Jesús cán já nandaca tuhún a na. <sup>42</sup> Já naçachi a já xihín ná:

—Ndía cáhvi ini ndó saḥa Cristo. Ndá chichi cáhán ndo vaxi a —naçachi Jesús xihín ná.

Já naçachi na cán já:

—Vaxi a chichi David, da naçacuu rey sanahá — naçachi na cán xihín Jesús.

<sup>43</sup> Anda já naçachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quéa naçachi da ña cúu á xitoho da. Jáchi nachutú ndaa ínimá David xihín ínimá yii Ndióxi tá naçahyí da já:

<sup>44</sup> Já naçachi Ndióxi xihín xitoho i:

“Cacoo xoo cuáha i yóho

janda quiahva ná caja i ña ná cacomún cuéntá saḥá na co cúní yohó”, naçachi Ndióxi, naçachi David.

<sup>45</sup> Ndávaḥa cáhí na ña vaxi Cristo chichi David tá ta sa mé David naçachi da ña cúu á xitoho da — naçachi Jesús.

<sup>46</sup> Ta chí ni in na coo naçacuu caja nducú ñehe na tuhun nu á. Ta jandá mé quivi já ni in ga na coo naḥaḥan ndeé ini ndaca tuhún chága na mé á.

## 23

*Chícaan Jesús cuachi jatá na fariseo xihín jatá na jánaḥa ley Moisés*

(Mr. 12:38-40; Lc. 11:37-54; 20:45-47)

<sup>1</sup> Anda já naçachi Jesús já xihín tóco ndihi ñayivi ta xihín na xíca tuun xihín á cán já:

<sup>2</sup> —Na jánaḥa ley xihín na fariseo cúu ná na ndítahan nuu ndicani na ña cúní cachi ley Moisés.

<sup>3</sup> Ña cán quéa xíní ñúhú caja ndó tóco ndihi ña jánaḥa na nu ndo. Joo a cája toho ndó tá quiahva cája mé ná jáchi co cája na ña jánaḥa mé va na.

<sup>4</sup> Jáchi cája na ña ná coo ihvi ndivaha ley janda quiahva co ndeé ini ñayivi cája na ña. Joo mé ná ni loho tীন co chíndeé ñahá na. <sup>5</sup> Ta cája na tóco ndihi ñaha ña ná cuni ñayivi na jáchi cátóo na candico listoni náhnu jiní ná xihín jico ndáha ná nu ndáa tuhun Ndióxi. Ta cátóo na coo lándá chága yuhú jáhma ná a juú ga java ga ñayivi. <sup>6</sup> Ta tá cuahan na víco cátóo na coo na nuú vaha cuití va. Ta tá quihvi na veñuhu cátóo na cacoo na nu sácco na íin chága saha. <sup>7</sup> Ta cátóo na ña ná cahan toní ñúhú ndivaha ñayivi xihín ná tá xíca nuu na nuú yahvi. Ta chí a juú quiahva cátóo na ña ná cachi ñayivi 'maestro' xihín ná.

<sup>8</sup> Joo ndóhó co ndítahan nu ndó nducú ndó ña ná cahan ñayivi 'maestro' xihín ndo. Jáchi in ñani cúu ndihi ndó ta in túhún cúu maestro ndo, mé á cúu Cristo. <sup>9</sup> Ta a cáhan ndo tátá cáhnu xihín ni in ñayivi ñuyiví yóho jáchi in túhún Ndióxi cúu á tátá ndo ta mé á íin a indiví. <sup>10</sup> Ta a ndúcú ndo ña ná cahan ñayivi 'jefe' xihín ndó jáchi in túhún laá va cúu jefe ndo, mé a cúu Cristo. <sup>11</sup> Ndá da cúu da cáhnu chága

tañu ndó xíní ñúhú da cája chúun da sahá ndihi ndó. <sup>12</sup> Jáchi ndá na ndíñehe jícó mé, jánuu ndáha Ndióxi na. Joo ndá na jánuu ndáha mé nu Ndióxi, jándíñehe jícó mé á na.

<sup>13</sup> Ndáhví naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi sáji nuu ndó nuú ñayivi já ná a cuú cacomí Ndióxi cuéntá saḥa ná. Ta ni ndóhó co ndiquiahva ndó mé ndó ndáha Ndióxi ná cacomí a cuéntá saḥa ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi.

<sup>14</sup> Ndáhví naḥá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi cánda ndó vehe najihí cuáan ta tá nandihí cuaḥá ndivaha xíca taḥví ndo nu Ndióxi jáchi cúni ndó jájahví ndó nuú ña núu cája ndó. Sahá ña cán quea cáchí i xihín ndó ña ndóhó cacuu ndó na ndoho chága ini, caja Ndióxi.

<sup>15</sup> Ndáhví naḥá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi a juú quiahva xíca nuu ndó ndúcú ndo in tálaá ñayivi ña ná candico na ña jánaḥa ndo. Ta tá sa nandaja ndó na cuéntá mé ndó já cája chága na cuaḥi janda cáni a nu ná ndoho chága ini na indayá a juú ga mé ndó.

<sup>16</sup> Ndáhví naḥá naçuu ndó jáchi cúu ndó tátuhun na cuaá ndáca inga na cuaá. Jáchi jánaḥa ndó ñayivi ña tá sahan na tuhun na nuú inga ñayivi nani tává na quivi veñuhu cáhnu já quea co ndúsa jáxinu coo na tuhun na. Joo cáchí ndo ña tá tává na quivi jiyuhun cuáan ndácaan veñuhu cáhnu já quea ndúsa jáxinu coo na tuhun na, já cáchí ndo. <sup>17</sup> Joo tóntó ndivaha ndó ta cúu ndó tátuhun na cuaá viti.



Jáchì cò cándaā ini ndó ña íin chága sahá veñuhu cáhnu a juú ga sahá jiuñun cuáán jáchì mé jiuñun cuáán cúú á cuéntá Ndióxi sahá ña ndácaan ini veñuhu cáhnu ña cúú cuéntá mé á. <sup>18</sup> Ta inga tucu ña jánaḥa ndó nuú ñayivi cúú ña yóho: Tá sahan in na tuñun na nuú ñayivi nani tává na quivi nu náa Ndióxi já quea cò ndúsa jáxinu còo na tuñun na. Joo cáchì ndo ña tá tává ñayivi quivi ña sájo cò na cánúu nu náa cán já quea ndúsa jáxinu còo na tuñun na, já cáchì ndo. <sup>19</sup> Joo tóntó ndivaḥa ndó ta cúú ndó tátuhun na cuaá. Jáchì íin chága sahá nu náa cán a juú ga sahá ña sájo cò na cánúu nu náa jáchì ña sájo cò na cán cúú á cuéntá Ndióxi sahá ña cánúu a nu náa cuéntá mé á. <sup>20</sup> Sahá ña cán quea ndá na tává quivi nu náa já quea tává ndihi ri na quivi tóco ndihi ña sájo cò na cánúu nu náa cán. <sup>21</sup> Ta ndá na tává quivi veñuhu cáhnu já quea tává ri na quivi Ndióxi jáchì cán íin mé á. <sup>22</sup> Ta ndá na tává quivi indivi já quea tává ri na quivi Ndióxi xihín quivi nu sá còo a sáhdá a chuun.

<sup>23</sup> Ndáhví nahá nacuu ndó, na jánaḥa ley Moisés xihín na fariseo jáchì cò cúú ndó tá quiaḥva ndáa ndó. Mé ndó cávaḥa ndó uxu táhdá ña jáquee ndó ñundáhyi ndo ta sahan ndó in táhdá ña nu Ndióxi. Já cája ndó anda yucu válí ña támi sahan tátuhun menta xihín anís xihín comino. Joo cò cája ndó ña íin chága saḥa ña sáhdá ley Moisés. Jáchì cò cája ndó ña ndaa ta cò cándáhví ini ndó ñayivi ta cò cándeé ini ndó Ndióxi tá quiaḥva sáhdá ley caja ndó. Mé a ndaa xíní ñúhú cája ndó tóco ndihi ña yóho joo a jándacoo ndó ña jó cò ndó nu Ndióxi in táhdá nuú uxu táhdá ña ñéhe ndó. <sup>24</sup> Mé ndó cúú ndó tátuhun na cuaá ndáca inga na cuaá. Jáchì

ndinuhu ini ndó cája ndó ña coó cuahá saha cuéntá ley Moisés joo sácú xoo ndó ña ín chága saha nu Ndióxi caja ndó. Cúú ndó tátuhun in da ndíhi ini da tavá da in ndicama loho ndácaan tásá da ná a cócó da ri. Joo co íhvi toho nu dá cócó da in camello.

<sup>25</sup> Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Jáchi ndíhi ini ndó caja ndó costumbre ña ndícata ndó jata vaso xihín jata cohó joo ña ñúhu ini a cán najátaca cuíhná ndo sahá ña ndiáva ndivaha ini ndó ña núu. <sup>26</sup> Ndáhví nahá nacuu ndó, na fariseo jáchi cúú ndó tátuhun na cuaá. Ña ndítahan caja ndó nu cuítí quéa ndaja víi ndó ínima ndó já cacuu ndó tátuhun in vaso á in cohó sa nandicata vaha na jáchi nandivií ini a xihín jata víti.

<sup>27</sup> Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Cúú ndó tátuhun vehe válí ndíta camasanto nu táan na ndii. Ndató jándicuchu na jata joo chí ini a a juú quiahva quini sáhan jáchi ndinuhu lásá ndii ñúhu ini a. <sup>28</sup> Quiahva já cúú mé ndó jáchi ndáa ndó tátuhun ñayivi vaha ndivaha. Joo mé a ndaa co cúú ndó tá quiahva ndáa ndó jáchi ndinuhu ña núu ndácaan ínima ndo.

<sup>29</sup> Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Cávaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa. <sup>30</sup> Ta cáchi ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahni profeta, na nasanduu sanahá”, cáchi ndo. <sup>31</sup> Ta xihín ña yóho náha táhyí a ña naquixi ndó chichi

na nasahní profeta sanahá. <sup>32</sup> Cuáhán ndo jáxinu coo ndó mé cuachi nacasahá cája tásánu jíco ndo sanahá.

<sup>33</sup> Mé ndó cúú ndó tátuhun coo jáchi cája ndó tá quiahva cája coo. A cuú cacu ndaa ínima ndó ta chí tandaa quivi cuhun ndó indayá nu ndoho ndivaha ini ndó. <sup>34</sup> Sahá ña cán quéa yehe chindahá i java profeta nu ndo xihín java na ndichí xihín java na jánahá tuhun Ndióxi nu ndo. Joo java na cahní ndó na ta java na cata caa ndó na ndica crúxu ta java na cani ndó na ini veñuhu ta java na taxí ndó na tá ñuu tá ñuu. <sup>35</sup> Ña cán quéa caça Ndióxi cuéntá nu ndó saha tóco ndihi ñayivi ndaa, na nasahní ndo sanahá. Caça mé á cuéntá saha Abel, da nasacuu da ndaa janda quiahva naxinu coo a nuú caça mé á cuéntá saha Zacarías, da nasacuu jahyi Berequías. Mé da yóho nasahní ndó ini veñuhu tañu nu náa xihín nuú yí ndivaha. <sup>36</sup> Mé a ndaa ná cahan i xihín ndo ña caça Ndióxi cuéntá saha tóco ndihi ndii jan nuú ñayivi ndúu tiempo viti.

*Tá sácu Jesús sahá ñayivi ndúu ñuu Jerusalén  
(Lc. 13:34-35)*

<sup>37</sup> 'Ndáhvi nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cáni ndó na xihín yuu na nachindahá Ndióxi nu ndó. Cuahá ndivaha tañu cuni jándataca ndihi i ndohó joo coo naxeen ndó cuni johó ndó. Cúú á tá quiahva cája nduxú tá játaca rí jahyi válí rí tíxi ndixí rí. <sup>38</sup> Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a. <sup>39</sup> Ta mé a ndaa ná cahan i xihín ndó ña a cúní ga ndó yehe janda quiahva ná xinu coo quivi cachi

ndó: “Cáhn̄u nahá ná cacuu da vaxi cuéntá Ndióxi, xitoho í”, cachi ndó —n̄acachi Jesús xihín n̄a cán.

## 24

*Cáxi tuhun Jesús ña vaxi quiví ndihi sahá veñuhu cáhn̄u ndácaan ñuu Jerusalén*

*(Mr. 13:1-2; Lc. 21:5-6)*

<sup>1</sup> Ta tá sa ñaquee Jesús veñuhu cáhn̄u Jerusalén cán cuah̄an já n̄acativi n̄a xíca tuun xihín á n̄u á ta ñacasáhá n̄a cáhan n̄a xihín á ndá quiahva cáa veñuhu cán. <sup>2</sup> Joo n̄anducú ñehe Jesús tuhun n̄u ná já n̄acachi a já:

—Mé a ndaa ná cahan i xihín ndo ña janda ni in yuu yóho a cándo jatá inga yuu jáchi vaxi quiví tá nditan̄i ndihi ña yóho —n̄acachi Jesús xihín n̄a xíca tuun xihín á cán.

*Ña coo tá sa ñacayati quiví ndihi saha ñuyíví*

*(Mr. 13:3-23; Lc. 21:7-24; 17:22-24)*

<sup>3</sup> Anda já ñaquee Jesús cuah̄an chí yúcu n̄u cáa yitó olivo xihín n̄a xíca tuun xihín á. Ta nani ndúu n̄a cán n̄acativi n̄a xíca tuun xihín á n̄u ín coo a cán já ñacasáhá ndáca tuhún xóo na a já n̄acachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quiví quixi tucu ndó ñuyíví yóho. Ta ndaja coo tá ná ndihi saha ñuyíví —n̄acachi na xihín Jesús.

<sup>4</sup> Já n̄acachi Jesús já:

—Cuéntá coo ndó ná a jándahvi ni in na ndohó.

<sup>5</sup> Jáchi cuahá ndivaha na quixi na cuéntá mí i ta cahan n̄a ña tuhún tá cachi na já xihín ndo: “Yehe

cúú Cristo, da nāchindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na. <sup>6</sup> Ta jándá johó ñehe ndó tuhun ña ndicuíta ñayivi caní táhan na yóho á cáa. Joo a cáyihví toho ndó jáchi já ndítahan coo. Joo ña yóho cō cūni cachi a ña naxinu cōo quiví nu ndíhí. <sup>7</sup> Jáchi ñayivi ndúu in nación ndicuíta na caní táhan na xihín na ndúu inga nación. Ta quixi tamā ta quixi cuehe ta ndaja táhan quixi a táan. <sup>8</sup> Ta ña yóho cacuu a tondóhó ña casáhá jihna ñúhú vaxi nuú ñayivi jáchi cámani xinu cōo nuú ndoho chága ini na.

<sup>9</sup> Anda já tiin na ndohó ta ndiquiahva na ndohó ndahá na cō cūni ndohó já ná caja xíxi na xihín ndo. Ta cahní na ndohó ta tóco ndihi ñayivi ndúu ñuyiví candají na ndohó sahá yehe. <sup>10</sup> Ta mé tañu já cuahá ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó túhún táhan na. <sup>11</sup> Ta quixi cuahá ndivaha na tuhún ta cachi na cúú ná profeta cuéntá Ndióxi joo jándahvi na cuahá ndivaha ñayivi. <sup>12</sup> Ta sahá ña ndicuahá ndivaha ña núu ñuyiví yóho sahá ña cán queá jándacoo cuahá ñayivi ña quíhvi ini táhan na. <sup>13</sup> Joo ndá na ná candico tuun íchi mí i janda ná xinu quiví quivi na, na cán cacuu na cacu ndaa ínima. <sup>14</sup> Ta níi cúú ñuyiví ndicuíta nuu tuhun vaha cáhan sahá yehe já ná candaa ini ñayivi ndá quiahva cacomí Ndióxi cuéntá saha ná. Anda jávi ndihi saha ñuyiví.

<sup>15</sup> Na cáhvi tutu ná candaa ini na ña cáhan. Sanahá nacahyí profeta Daniel sahá in ña quini ña jativí ñahá. Tá ná cuni ndó ña xinu cōo ña yóho nuú yíi cuéntá Ndióxi <sup>16</sup> já queá ndá na ndúu estado

Judea xíní ñúhú cunu na cūhūn nā chí yúcu. <sup>17</sup> Ta ndá nā cándójó jīnī véhe, cō ndítahan nuu na tavá nā ndá ñaha vehe na. <sup>18</sup> Ta ndá nā ndúu yúcu, ná a ndícó cōo na vehe na ndiquehe na jáhma ná. <sup>19</sup> Ndáhvī nācuu najihí, nā ñúhu jahyi mé quiví já. Ta ndáhvī nācuu najihí nā néhe ndaa nā valí táhan ña chíchí yīi. <sup>20</sup> Cācā tahví ndo nū Ndióxi ña ná a cácuu a tiempo vixi tá ná cunu ndó cūhūn ndo. Ta cācā tahví ndo nū á ña ná a cácuu a quiví ndiquehe ndée ná. <sup>21</sup> Jáchī quiví ndoho ndivaha ini ñayivi cacuu a cán. Jáchī jandá tá nācava sáhá saha ñuyívī cōó nandoho ini na tá quiahva ndoho ini na mé quiví já. Ta tá ná yaha ña jan, a ndícó cōo ga ña ndoho ini na quiahva já. <sup>22</sup> Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá nā sa nācaxi mé á sahá nā cán ndaja cuítí mé á tiempo cán.

<sup>23</sup> Ta tá ná cachi in na xihīn ndó: “Candehé ndo. Yóho ín Cristo, da nāchindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Cáa ín da”, cachi na, já queá a cándúsa toho ndó nā. <sup>24</sup> Jáchī quixi cuahá nā jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan nā cuéntá Ndióxi ta jari caja na cuahá ndivaha ña náhnu xihín ña xitúhún ña ná jándahvi na ñayivi. Ta jandá nā sa nācaxi Ndióxi jándahvi na tá ná cuu caja na ña. <sup>25</sup> Candehé ndo jáchī sa nācaxi tuhun yachī ndihi i ña yóho xihīn ndo. <sup>26</sup> Ña cán queá tá ná cachi na xihīn ndo: “Candehé ndo. Yucú íchí cáa ín Cristo.” Já queá a cūhūn ndó jan. Á tá ná cachi na xihīn ndo: “Candehé ndo. Ini vehe yóho ndácaan

da cúu Cristo.” A cándúsa ndó na. <sup>27</sup> Jáchi tá quiahva yehe tása quéta xoo nu cána candii ta xójo cava indivi quiahva já queta yehe, da nachindahá Ndióxi nduu ñayivi. <sup>28</sup> Mé nu candúhu yiquí cuñu ndii cán cacuu nuú ndicutú tiyocó canduu rí.

*Ndá quiahva coo tá ná quixi tucu Jesucristo  
(Mr. 13:24-37; Lc. 21:25-33; 17:26-30, 34-36)*

<sup>29</sup> Ta ivi laá tá jacá nayaha quivi ndoho nahá ini na cán já canaá nuú candii ta ni a ndíyehe ga yoo ta janda indivi quee quimi cuyu rí nu ñuhu ta janda indivi ña nacavaha Ndióxi ndiquiji nuu. <sup>30</sup> Anda já ndaca náha ña xitúhún indivi já candaá ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu ní cúu sahá ñuyívi ndahyi cóhó na ta já cuni na yehe quixi i tañu vico indivi xihin tóco ndihi ndeé e ta cuni na ndá quiahva cáhnu cúu yehe. <sup>31</sup> Ta já chindahá i tátó mí i ña ná tiví cóhó na trompeta já ná nditaca tóco ndihi na naxaxi i tañu tóco ndihi ñuu janda ní cúu saha ñuyívi ta janda ní cúu sahá indivi.

<sup>32</sup> Jacuaha ndó ña cuni cachi mé quiahva sácú u nu ndó sahá yító tító ñuhú. Jáchi tá yúta ndáha dó cán ta já vaxi núma válí do já candaá ini ndó ña sa nacayati tiempo ihní. <sup>33</sup> Quiahva já cuu candaá ini ndó ña tá ná cuni ndó ña sa cúu tóco ndihi ña nacachi i xihin ndo yóho já cuu candaá cáxi ini ndó ña sa nacayati tiempo quixi tucu yehe ñuyívi yóho. <sup>34</sup> Mé a ndaa ná cahan i xihin ndo ña yaha tóco ndihi ña yóho ta anda jávi quivi na ndúu tiempo viti. <sup>35</sup> Ta ndihi saha indivi xihin ñuyívi joo a ndihi toho sahá tuhun nahan i xihin ndo yóho jáchi coo tá coo tá quiahva nacachi i yóho.

<sup>36</sup> Joo ni in túhún toho ñayivi co xíni na ndá quivi á ndá hora yaha ña yóho. Ni mé tátō Ndióxi ndúu indivi co xíni na ndá quivi coo ña yóho. Ta ni yehe, da cúu in túhún jini já jahyi Ndióxi co xíni ndá quivi coo ña yóho. In túhún Ndióxi, tátá i quea xíni a. <sup>37</sup> Tá quiahva nayaha tiempo tá nasahiin Noé sanahá quiahva já yaha ri tá ná tandaa quivi quixi tucu yehe, da nachindahá Ndióxi nduu ñayivi. <sup>38</sup> Jáchi mé tiempo cán tá cámaní cuun javi quini cán já cáxixi ñayivi ta cáxihi na ta tándaha ná ndúu na janda quiahva naquihvi Noé ini barco cáhnu cán. <sup>39</sup> Ta coo naquehe na cuénta janda quiahva naxinu coo javi quini cán ta najánaa dó sahá ndihi na. Quiahva já a quehe na cuénta saha ndá quivi quixi yehe, da nachindahá Ndióxi nduu ñayivi. <sup>40</sup> Mé tiempo já canduu ivi dataa xútu da ta in da ndindita cūhun xihín i ta inga da candoo va. <sup>41</sup> Ta canduu ivi najihí ndíco na ta in ña ndindita cūhun xihín i ta inga ña candoo va.

<sup>42</sup> 'Xíni ñúhú coo tiahva vaha ndó jáchi co xíni ndó ndá quivi quixi tucu xitoho ndó. <sup>43</sup> Xíni ñúhú candaā vaha ini ndó ña tá xíni in dataa ndá hora cúni quihvi ta cuihná vehe da já quea a cúju toho da jáchi candaā vaha da vehe da já ná a quihvi da cuihná vehe da. <sup>44</sup> Sahá ña cán quea ndítahan canduu tiahva ri ndóhó va. Jáchi xinu coo yehe, da nachindahá Ndióxi nduu ñayivi mé hora tá co cáhán ndo xinu coo i nu ndo.

*Da cája chúun vaha ta da co cája chúun vaha  
(Lc. 12:41-48)*

<sup>45</sup> 'Mé ndó ndítahan nu ndó cacuu ndó tátuhun in da ndíchí jini, da cája chúun vaha nuú xitoho



da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já naquee xitoho da cuahan da. <sup>46</sup> Tahví nacuu mé mozo cán tá xinu coo xitoho da ta ndítahan da cája chuun yji va da ña nacandoo nu dá caja da. <sup>47</sup> Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuénta saha tóco ndihi ñaha cómí xitoho da. <sup>48</sup> Joo tá cásahá da cája núu da ta cáhán da ña cayáncá ndivaha xitoho da ndicó coo da. <sup>49</sup> Ta sahá ña cán queá cásahá da cája xíxi da xihín java ga na cúu mozo xihin dá. Ta já cáa ga da cásahá xíxi da ta xíhi da ta já xíni da. <sup>50</sup> Ta ndaja coo xinu coo xitoho mozo cán mé quivi co cáhán da ña xinu coo da. <sup>51</sup> Anda jáví jándoho quini xitoho da cán ini da jáchi co cúu dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhña nuhu ná —nacachi Jesús.

## 25

*Sácú Jesús quiahva sahá ña nacaja uxu najihí, na tacú*

<sup>1</sup> Já cáchi tucu Jesús já:

—Tá ná xinu coo quivi cacomí Ndióxi cuénta sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naqueehe na candil ña ñúhu sítí ini já cuahan na ndique táhan na xihín da tándaha cán. <sup>2</sup> Uhun táhan na tacú cán cúu ná na tácu ini ta uhun na cán cúu ná na co tácu toho ini. <sup>3</sup> Ndíhuhun na co tácu ini cán natiin na candil ñaha na cuahan na joo coo naqueehe chága na sítí ña jácutú tucu

na candil tá sa cúni ndahva ña. <sup>4</sup> Joo na tácu ini cán ñehe na candil ñaha na ta ñehe ri na yúyú sítí cuahan na ña jácutú na candil tá sa cúni ndahva ña. <sup>5</sup> Ta ndaja coo ñacasáhá cáyancá mé da tándaḥa cán sahá ña cán quéa nanaá ini ndihi na ta naquiji va na. <sup>6</sup> Joo tá nacuu yati java ñuu já tácu cáyuhú java na já cáchí na já: “Candehé ndo. Sa vaxi da tándaḥa. Cuáhán queta ndó ndiquehe ndó da”, cáchí na cáyuhú na cán. <sup>7</sup> Já nandaco tóco ndihi na tacú cán ta ñacasáhá na cája ndíví na candil ñaha na. <sup>8</sup> Anda já ñacasáhá ndíhuhun na co tácu ini cán cáhan na xihín ndíhuhun na tácu ini cán já cáchí na já xihín ná: “Caja ndó ñamaní quiahva loho ndó sítí ndo nuú nde jáchí sa nandíhi sítí nde ta jalóho cúni ndahva candil ñaha nde”, cáchí na co tácu ini cán. <sup>9</sup> Já nanducú ñehe ndíhuhun na tácu ini cán tuhun nu ná já cáchí na já: “A cúu toho caja nde quiahva nde sítí nu ndó jáchí tiaḥva náá ndimaní dó nu mé nde. Vaha chága cuáhán mé ndó nu cáyahvi dó cueen ndó do”, ñacachi na tácu ini cán xihín ná. Já ñaquee na co tácu toho ini cán cuahan na. <sup>10</sup> Joo nani ñaquee ndíhuhun na co tácu ini cán cuahan na cueen na sítí na já naxinu da tándaḥa cán ta nandíhvi ndíhuhun najihí tácu ini cán ini vehe nu ín vicó tándaḥa cán ta nandaji yéhe. <sup>11</sup> Tá nandíhi já nandai cuu ndíhuhun na ñasahan ñaxeen sítí cán já catí ndáḥa ná yéhe ta cáyuhú na já cáchí na já: “Cuná loho ndó yéhe nuú nde, xitoho”, cáchí na cáyuhú na ndíta na jata véhe. <sup>12</sup> Anda já nanducú ñehe da tándaḥa cán tuhun nu ná já cáchí da já xihín ná: “Co xini toho i yo cúu ndóhó”, ñacachi da cán xihín ná —ñacachi Jesús.

13 Já nacachi tucu Jesús já:

—Sahá ña cán quéa xini ñúhú cuéntá vaha coo ri ndóhó va jáchi co xini ndó ndá hora xinu coo quíví cacomí Ndióxi cuéntá saha ndo —cáchi Jesús.

*Ña nacaja in taa xihín jiuhún da*  
(Lc. 19:11-27)

14 Ta já cáchi tucu Jesús já:

—Tá ná xinu coo quíví cacomí Ndióxi cuéntá sahá ñayivi já cacuu a tátuhun ña nayaha xihín in dataa. Tá naxinu coo quíví quee da cuhun xíca da já nacana da java da cája chúun xihín dá. Ta já nandiquiahva da jiuhún da ndahá da cán ña ná candaa da ña. 15 Ta tá quiahva tiahva in in da cañehe da jiuhún quiahva já nasahan xitoho da nu dá. In táhan da cán nasahan xitoho da uhun mil nu dá ña ná candaa da ña. Ta inga da cán nañehe ivi mil. Ta inga da cán nañehe in mil. Anda já naquee xitoho da cuahan xíca da. 16 Ta ndaja coo da nandiquiahva xitoho uhun mil ndaha cán nacaja da ndahvi xihín jiuhún xitoho da ta já nañehe dá inga uhun mil chága jatá. 17 Ta jári da nasahan xitoho ivi mil nu cán nacaja da ndahvi xihín jiuhún cán ta nañehe dá inga ivi mil jatá. 18 Joo da nasahan xitoho in mil nu cán natiin da jiuhún xitoho da ta já nasahan da nacaan da in yávi ta já najánduxu da ña.

19 Ta tá sa nayaha cuaha tiempo já nandicó coo xitoho mozo cán. Ta já nacasáha cája vií da cuéntá xihín da cán. 20 Ta já naxinu da nañehe uhun mil cán nuú xitoho da ta já nandiquiahva da inga uhun mil ña nañehe dá jatá jiuhún cán nuú xitoho da. Ta já cáchi da já xihín xitoho da: “Candehé

ndo uhun mil nasahan ndó nuú i. Joo yóho ín inga uhun mil nañehé e jatá”, nacachi da xihín xitoho da. <sup>21</sup> Anda já nacachi xitoho da já xihín dá: “Vaha ndivaha nacajún. Mozo vaha ndivaha cúu yóhó jáchi chá va nasahan i nuun ta vaha nacaja chúun ña. Sahá ña cán quéa caja i ña ná cacomún cuéntá sahá cuaha chága ñaha. Ta viti cuu coún xihín i ta já ná cajii chága inún”, nacachi xitoho da. <sup>22</sup> Tá nandihí já naxinu coo ri da nandiquehe ivi mil cán nuú xitoho da. Já nacachi da já xihín xitoho da: “Ivi mil nasahan ndó nuú i joo yóho ín inga ivi mil nañehé e jatá”, nacachi da xihín xitoho da. <sup>23</sup> Anda já nacachi xitoho da já xihín dá: “Vaha ndivaha nacajún. Mozo vaha cúu yóhó jáchi chá va nasahan i nuun ta nacaja chúun vahún ña. Sahá ña cán quéa caja i ña ná cacomún cuéntá sahá cuaha chága ñaha. Ta viti cuu coún xihín i ta já ná cajii chága inún”, nacachi xitoho da. <sup>24</sup> Joo tá naxinu coo ri da nañehé in mil ndahá xitoho cán já nacasáhá cáchí da já xihín xitoho da: “Candehé ndo, xitoho i. Sa cándaá vaha ini i ña cúu ndó in ta ndacú ndivaha tuhun. Ta vatí co xútu ndó nuú in ñuhu joo jáquee tá jáquee ndó nu á. Ta jataca ndó ña nuú coó naxutu ndó ña. <sup>25</sup> Sahá ña cán quéa nayihví vi ta nasahan i najánduxu u jjuhún nasahan ndó nuú i tixi ñuhu. Joo yóho ín jjuhún ndo ndiquehe ndó ña”, nacachi da cán xihín xitoho da. <sup>26</sup> Anda já nacachi xitoho da já xihín dá: “Coo cúun in mozo vaha nuú i. Cúun da júsa ndivaha. Sa cándaá vaha inún ña jáquee e nu ñuhu ña co xútu u, <sup>27</sup> ña cán quéa ndá cuéntá quéa coó nasahan tóun jjuhún i banco já ná ndiquehe e jiqui á nuú na cán tá ná ndicó coo i, nduu”, nacachi xitoho da

cán xihín dá. <sup>28</sup> Anda já nacachi da xihín java na ndúu cán: “Candaa ndó in mil jan ndahá da jan ta quiahva ndó ña nuú da sa cómi uxu mil jan. <sup>29</sup> Jáchi da cája chúun vaha ñehe chága ví da ñaha já queá ná coo cuahá chága nu dá. Joo da co cája chúun vaha janda ña chá cómi da ndindaa ndáha dá. <sup>30</sup> Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaa ñayivi janda quiahva cáhña nuhu ná sahá ña ndóho ndivaha ini na”, nacachi xitoho da, — nacachi Jesús.

*Tá ná cavií sahá ñayivi nu Ndióxi*

<sup>31</sup> Já nacachi tucu Jesús já:

—Tá ná xinu quiví quixi yehe, da nachindahá Ndióxi nduu ñayivi ta quixi i xihín tóco ndihi na cúu tát Ndióxi. Anda já cacoo i nu sácoo na sáhndá chuun ta já ndicáhnu ndivaha i. <sup>32</sup> Ta nditaca ñayivi ndúu ndíjáá ñuyíví nuú i. Ta já casahá i ndicahnda java táhan i na tá quiahva cája in da ndáá ndicachi tá sáhndá java da ndicachi xihín tijúhu ña ná a cáva táhan rí. <sup>33</sup> Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuéntá mí i, na cúu tátuhun tijúhu cán. <sup>34</sup> Ta sahá ña cúu u da cómi cuéntá sahá ñayivi sahá ña cán queá cachi i já xihín na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na nacaja cuahá mé á ñamaní xihín. Jáchi janda tá cámaní cava sahá saha ñuyíví sa nasacu tiahva mé á nuú canduu ndó ña cacomí a cuéntá saha ndo. <sup>35</sup> Jáchi nasahan ndó naxixi i tá nacuico i. Ta nasahan ndó ticuí nuú i tá nahichi

ini i. Ta nandiquehe vaha ndó yehe tá nasacuu u da tóho naxinu i nu ndo. <sup>36</sup> Ta najasá ndo jáhma nuú i tá co ñéhé e ña cándixi i. Ta tá nasaquíhvi já nachindeé ndó yehe. Ta tá nasandacaan i vecaa já naxito nihni ndó yehe.” <sup>37</sup> Anda já ndaca tuhún java na nacaja vaha ta já cachi na já xihín i: “Ndá tañu quéa naxini nde ña cuíco ndó, xitoho nde ta já nasahan nde ña xíxi ndó. Ta ndá tañu naxini nde ña íchi ndó ticuúí ta já nasahan nde ticuúí nu ndo. <sup>38</sup> Ta ndá tañu nasacuu ndó da tóho ta nandiquehe vaha nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo. <sup>39</sup> Ta ndá tañu quéa naxini nde ña quíhvi ndo ta nachindeé nde ndohó. Ta ndá tañu nasandacaan ndó vecaa ta naxito nihni nde ndohó.” <sup>40</sup> Anda já cachi yehe, da cómi cuéntá sahá ñayivi já xihín ná: “Mé a ndaa ná cahan i xihín ndó ña tá nacaja ndó a xihín na cúu cuéntá mí i, na coó saha nuú ñayivi ñuyívi já cúu á tátuhun nacaja ndó a xihín mí i”, cachi i xihín na ndúu xoo cuáha i.

<sup>41</sup> Anda já casahá cachi i já xihín na ndúu xoo íti i cán já: “Caxoo ndó nuú i jáchi cúu ndó na nacatavi cháhan ta cuhun ndó indayá cañuhu ndó anda ama cáa quívi. Jáchi ña jan cúu ña nasacu tiahva Ndióxi ndacaan tiñáhá sacuaaha xihín tátó mé rí. <sup>42</sup> Jáchi coó nasahan ndó ña xíxi i tá nacuico i ta ni coó nasahan ndó ticuúí nuú i coho i tá nahíchi ini i. <sup>43</sup> Da tóho cúu u naxinu coo i tañu ndó ta coó nandiquehe vaha ndó yehe. Ta nandimaní i ña candixi i ta coó nasahan ndó in jáhma loho nuú i. Nasaquíhvi ta nasandacaan i vecaa ta coó naxito nihni ndó yehe”, cachi i xihín na ndúu xoo íti i cán. <sup>44</sup> Anda já nducú ñehe ri na cán tuhun nuú i já cachi

na já xihín i: “Ndá tañu quéa naxini nde ña cuíco ndó ta ndá tañu quéa naxini nde ña íchi ini ndó ticuú ta ndá tañu nasacuu ndó da tóho ta ndá tañu nandimaní jáhma ndo ta ndá tañu nasahin quíhvi ndo ta ndá tañu nasandacaan ndó vecaa ta coó nachindeé nde ndohó”, cachi na ndúu xoo íti i cán xihín i. <sup>45</sup> Anda já cachi i já xihín na co cúu cuénta mí i já: “Mé a ndaa ná cahan i xihin ndo ña tá ta coó nacaja ndó xihín ñani táhan ndó, na coó saha nuú ñayivi ñuyívi já quéa coó nacaja ndó ña xihín yehe”, cachi i xihín na co cúu cuénta mí i. <sup>46</sup> Ta já yaha ndihi na cán cuhun ná indayá anda ama cáa quívi. Ta na nacaja vaha cán yaha na nu Ndióxi catacu na anda ama cáa quívi —cáchi Jesús.

## 26

### *Ndítúhún jehé na tiin na Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Tá nandihí nacahan Jesús tóco ndihí ña yóho xihín ñayivi cán já nacachi a xihín na xíca tuun xihin á cán já:

<sup>2</sup> —Sa cándaq ini ndó ña tixi ivi quívi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xihín na xíca tuun xihin á cán.

<sup>3</sup> Anda já na sacuahá nuú jutú xihín na jánaha ley Moisés xihín na sacuahá veñuhu nandique táhan na yéhe Caifás, da cúu sacuahá chága nu ndíhi jutú cán. <sup>4</sup> Ta najándique táhan tuhun na ndá quiahva caja na tiin jehé na Jesús ña ná cahní ñahá na. <sup>5</sup> Já cáchi xihin táhan na já:

—Joo a t́in toho í da tañu mé víco jáchi tia\_hva náá ndiva\_a ñayivi —nacachi na.

*Tá nachojo in ñáñáha perfume jini Jesús  
(Mr. 14:3-9; Jn. 12:1-8)*

<sup>6</sup> Ta ndaja coo íin Jesús ñuu Betania vehe Simón, da cáhan na xihín: taa nandoho cuehe táhyi. <sup>7</sup> Já naxinu in ñáñáha nu á ta cánee in yúyú ña alabastro ndáha ña. Ta ini mé yúyú cán ñuhu perfume, dó yahvi ndiva\_ha. Ta já naxinu ña najacyu ña do jini Jesús nani íin coo a nu mesa cán. <sup>8</sup> Tá naxini na xica tuun xihín Jesús cán ña yóho já nacasáha na xójo ini na já cáchi na já:

—Ndá cuénta quéa tíví uun perfume yahvi ndiva\_ha yóho. <sup>9</sup> Jáchi cuu jicó yó do ta já quehé cuahá jjuhún saha do, nduu ta já cuu jasa yo jjuhún cán nuú na ndahví —nacachi na cán.

<sup>10</sup> Ta nacanda\_a ini Jesús ña cáhvi ini na cán ña cán quéa nacasáha cáchi a já xihín ná:

—Ndá cuénta quéa cája cuehe ndó xihín ñáñáha jan jáchi ña va\_ha quéa nacaja ña yóho xihín í.

<sup>11</sup> Jáchi na ndahví ní tiempo canduu na tañu ndó joo yehe a cóo tuun toho í xihín ndo. <sup>12</sup> Jáchi tá najacyu ña perfume yiquí cñu í já nacaja tia\_hva ña yehe ná coo tia\_hva ví tá ná casa\_a quiví nduxu.

<sup>13</sup> Mé a ndaa ná ca\_han í xihín ndo ña ní cúu ñuyiví nuú caca nuu ñayivi ca\_han na tuhun va\_ha sahá í ndicani na ña nacaja ña yóho xihín í já ndicuhun ini na saha ña —nacachi a.

*Jicó túhún Judas Jesús  
(Mr. 14:10-11; Lc. 22:3-6)*

<sup>14</sup> Ta ndaja coo in táhan da uxu iví xica tuun xihín Jesús, da naní Judas Iscariote nasahan da ca\_han da



xihín na sacuahá nuú jutú. <sup>15</sup> Ta já cáchí da já xihín ná:

—Ndaja quiahva ndó nuú i tá ná ndiquiahva i Jesús nu ndo —nācachi Judas xihín na sacuahá nuú jutú cán.

Anda já nasahan na oco uxu jjuhun cúxú nu dá sahá Jesús. <sup>16</sup> Ta sa mé nani já nācasáhá Judas ndúcú da ndaja cuu caja da ndiquiahva da Jesús ndáha ná.

*Tá naxijini ndayí Jesús xihín na xíca tuun xihín á (Mr. 14:12-25; Lc. 22:7-23; Jn. 13:21-30; 1 Co. 11:23-26)*

<sup>17</sup> Mé quiví nuú vicó xíxi na pan, ña co quée yusá naxaa xihín cán já naxinu na xíca tuun xihín Jesús cán nu á. Já nācachi na já xihín á:

—Ndáchí cúní ndó cūhun nde caja ndíví nde cajíni ndó vicó pascua —nācachi na xihín á.

<sup>18</sup> Anda já nācachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jánaha ndehe cáchí xuhun: Cūhun i vehe ndó cajíni i vicó pascua xihín na xíca tuun xihín i jáchi sa nāndindaa tiempo cūhun i viti” —nācachi Jesús.

<sup>19</sup> Já naquee na cán nasahan na nācāja na tá ín nasahnda Jesús nu ná ta cán nācāja ndíví na ña cajíni na vicó pascua.

<sup>20</sup> Ta ndaja coo tá nācuaá já nasacoo Jesús nu mesa xihín ndíhuxu ivi na xíca tuun xihín a cán.

<sup>21</sup> Ta nani xíjini na já nācasáhá cáchí a já:

—Mé a ndaa ná cahan i xihín ndó ña in táhan ndó, na xíca tuun xihín i cacuu da jicó túhún yehe —nācachi Jesús xihín ná.

<sup>22</sup> Anda já naçasáhá na cán cacuéha ndivaha ini na já naçasáhá tá in tá in na ndáca tuhún na Jesús já cáchí na já xihín á:

—Á yehe cacuu da jicó tuhún ndo, xitoho i —cáchí na ndáca tuhún ñahá na.

<sup>23</sup> Anda já nanducú ñehe Jesús tuhun nu ná já naçachi a já xihín ná:

—Da naquihvi ndáha ini coho xíxi i, da cán cúú da jicó tuhún yehe. <sup>24</sup> Yehe cúú da nachindahá Ndióxi nduu ñayivi ta ndítahan nuú i quivi i tá ín cáchí tuhun Ndióxi. Joo ndáhvi nahá naçuu da jicó tuhún yehe. Janda vaha chága ná a cacu da, nduu —naçachi Jesús.

<sup>25</sup> Anda já nandicahan Judas, mé da jicó tuhún ñahá cán já naçachi da já xihín Jesús:

—Xitoho i, á yehe cúú da jicó tuhún ndo —naçachi da xihín á.

—Jivi mún cúú dá —naçachi Jesús xihín dá.

<sup>26</sup> Ta nani xíxi na ndúu na nañiin Jesús pan já nandiquiahva ndixahvi nu Ndióxi. Tá nandihi já nasahnda java ña ta nandicahnda ña nuú na xíca tuun xihín á cán. Ta já naçachi a já xihín ná:

—Júhun ndó jáchí ña yóho cúú tátuhun yiquí cuñu i —naçachi a.

<sup>27</sup> Tá nandihi já nañiin a in vaso nu ñúhu tó uva já nandiquiahva ndixahvi nu Ndióxi já naçachi a já xihín na xíca tuun xihín á cán já:

—Coho ndihi ndó dó ñúhu ini vaso yóho. <sup>28</sup> Jáchí dó yóho cúú dó tátuhun ñí i, dó cuíta sahá cuahá ñayivi já ná ndoo cuachi na. Tá ná cuíta ñí i já candaa ini ndó ña najáxinu coo Ndióxi tuhun a nasahan sanahá. <sup>29</sup> Mé a ndaa ná çahan i xihín ndo ña a cóho ga i tó uva janda quiahva ná xinu

coo quiví coho tucu u inga dó vaha chága xih̄in ndo tá ná xinu quiví cacomí Ndióxi, tátá i cuéntá sahá ñayivi —ñacachi a.

*Cáxi tuhun Jesús ña chijehé tuhún Pedro ña xini da mé á*

*(Mr. 14:26-31; Lc. 22:31-34; Jn. 13:36-38)*

<sup>30</sup> Ta tá nandihí ñaxita na in canto já ñaquee na cuahan ña yúcu yitó olivo. <sup>31</sup> Ta já ñacachi Jesús já xih̄in ná:

—Mé ñuú viti jándacoo ndihí ndó yehe cuhun ndó sahá ña ndoho i. Já cáchí tuhun Ndióxi já: “Cahní i da ndáá ndicachi ta xih̄in ña yóho ndicuita nuu ndicachi jana dá cuhun ri”, cáchí tuhun Ndióxi.

<sup>32</sup> Joo tá sa ná nditacu tucu u já cuhun jihna ñúhú yehe estado Galilea anda já cuhun mé ndó —ñacachi Jesús.

<sup>33</sup> Anda já nanducú ñehe Pedro tuhun nu á já ñacachi da já xih̄in á:

—Vatí ná jándacoo tóco ndihí na mé ndó sahá ña ndoho ndó joo a jándacoo toho i ndohó —ñacachi da xih̄in á.

<sup>34</sup> Anda já ñacachi Jesús já xih̄in dá:

—Mé a ndaa ná cuhan i xuhun ña mé ñuú viti tá cámani cana chéle já chijehé tuhún ña xinun yehe uní táhnda —ñacachi Jesús xih̄in dá.

<sup>35</sup> Anda já ñacachi tucu da já:

—Vatí ná quivi i xih̄in ndo joo a chíjehé tuhun toho i sahá ña xini i mé ndó —ñacachi da xih̄in Jesús.

Ta quiahva já ñacachi tóco ndihí java ga ña xíca tuun xih̄in á cán.

*Tá xíca tahví Jesús nu Ndióxi in nuú naní a Getsemani*

(Mr. 14:32-42; Lc. 22:39-46)

<sup>36</sup> Anda já naxinu coo Jesús xihín na xíca tuun xihín á cán in nuú naní a Getsemani. Já nacachi a já xihín ná:

—Yóho cacoo ndó nani ná cuhun i cáa caça tahví i nu Ndióxi —cáchi a.

<sup>37</sup> Ta ndáca Pedro xihín ndívi da cúu jahyi Zebedeo cuahan xihín á. Ta já nacasáhá cácuéha ndivaha ini a ta a juú quiahva táhvi ini a. <sup>38</sup> Anda já nacachi a já:

—A juú quiahva cácuéha ini i chí quivi i cúu ini i. Yóho candati too ndó yehe ta coto a cúju ndo —nacachi Jesús.

<sup>39</sup> Ta já naquee mé á nasahan loho chága chí nuu já nacaxítí a janda quiahva naxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamani ña ná a ndóho i ña ihvi ndivaha vaxi nuu i ndoho i. Joo ná coo tá ín cúní mé ndó ta ná a cóo toho ña cúní yehe —cáchi Jesús.

<sup>40</sup> Tá nandíhi já nandicó coo a nuú najándacoo a na xíca tuun xihín á cán ta já nandíñehe á na quíji na ndúu na. Anda já nacachi a já xihín Pedro:

—Á coo nacuu candita ndó ni in hora. <sup>41</sup> Xíní ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Jáchi ínimá ñayivi cúní a ndinducú a Ndióxi joo yiquí cuñu na co ín tiahva caja ña cúní Ndióxi —nacachi Jesús.

<sup>42</sup> Anda já naquee tucu Jesús táhnda ivi cuahan tucu a caça tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamaní ná a ndóho ini i ña jan já ná coo tá íin cúní mé ndó coo —cáchi a.

<sup>43</sup> Tá nandihí já nandicó coo tucu a nu ndúu na xíca tuun xihín á cán ta nandiñehe á na quíji tucu na ndúu na jáchi naquehe a mahnú na. <sup>44</sup> Já naquee tucu a nasahan xíca tahví a nu Ndióxi táhndá uní ta sa mé tuhun cán naçahan tucu a. <sup>45</sup> Anda já naquixi tucu a nu ndúu na xíca tuun xihín á cán já naçachi a já xihín ná:

—Vatí cúní ndó cuju ndó ta vatí cúní ndó ndiquehe ndée ndó joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. <sup>46</sup> Cuahán ndacoo ndó ná cohó. Jáchi sa vaxi da jicó túhún yehe —cáchi a.

### *Tá natiin na Jesús*

*(Mr. 14:43-50; Lc. 22:47-53; Jn. 18:2-11)*

<sup>47</sup> Ta nani cahan yíi va Jesús já naxinu Judas, da cúu in táhan uxu ivi na xíca tuun xihín á cán. Ta ndáca da cuahá ñayivi, ñéhe na machítí xihín yító viti. Ta na cán cúu ná na naquixi cuéntá na sacuaça nuú jutú xihín cuéntá na sacuaça veñuhu. <sup>48</sup> Ta mé Judas, da ndiquiahva ñahá cán sa naçandoo da xihín na cán ña tatí yúhu dá sajóho Jesús jáchi naçachi da já xihín ná:

—Ndá da ná tatí yuhú u sajóho, da cán cúu dá tiin ndó —naçachi da.

<sup>49</sup> Chí ivi laá naçativi da nu Jesús já naçahan Ndióxi dá xihín á ta já natatí yúhu dá sajóho mé á.

<sup>50</sup> Anda já naçachi Jesús já xihín dá:

—Cama chá cajún ña, amigo.

Anda já nacayati na nu Jesús ta natiin tuun na a.

<sup>51</sup> Joo in táhan da xíca tuun xihín Jesús cán, natavá da machítí da ta já năchitúhun da in johó da cúú mozo nuú da sacuahă chăga nu ndíhi jutú cán. <sup>52</sup> Anda já nacachi Jesús já xihín dá:

—Chicaan vaha machítí jan jáchi ndá na sáhní xihín machítí, xihín machítí quivi ri na cán va. <sup>53</sup> Á cō cándađ inún ña cuu cača tahví i nu Ndióxi, tátá i ña ná chindahá mé á cuahă ndivaha tátó mé á ña ná chindeé na yehe. <sup>54</sup> Cuu cajú i ña joo xíní ñúhú yaha tá yaha ña năcahyi nuú tuhun Ndióxi ndoho i —cáchi Jesús.

<sup>55</sup> Ta já nacachi Jesús já xihín na năxinu tiin ñahá cán:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machítí ta xihín yító viti. Ta ndijáá ní quivi năsahiin i xihín ndo ini veñuhu cáhnu jánahă i tuhun Ndióxi nu ndo ta ni in tañu cōó natiin ndó yehe. <sup>56</sup> Joo tóco ndihi ña yóho yáha ña já ná xinu cōo ña năcahyí na profeta sahá i ini tuhun Ndióxi sanahá —cáchi a.

Tá năndihi já năxinu ndihi na xíca tuun xihín Jesús cán cuahan na ta najándacoo na mé á.

*Tá ñéhe na Jesús cuahan na nuú nataca ndihi na sacuahă*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Tá natiin na cán Jesús já ñéhe na a cuahan na nuú Caifás, da cúú sacuahă chăga nu ndíhi jutú. Ta cán sa nănditútú na jánahă ley Moisés ndúu na xihín na sacuahă veñuhu. <sup>58</sup> Joo ndaja coo

na<sub>s</sub>andico xicá Pedro Jesús anda quiahva naxinu da yéhe vehe da cúu sacuahá chága nu ndíhi jutú cán. Ta já nandihvi da nasacoo da nu ndúu soldado cán sándehe da ndá quéa caja na xihín Jesús.

<sup>59</sup> Ta na sacuahá nuú jutú xihín tóco ndihi na cómi cuénta sahá na Israel nataca na cán ndúcú na cuachi jácojo na jatá Jesús já ná cuu cahni ñahá na. <sup>60</sup> Joo cóo ñañehe ná cuachi jíquí ña cuu chinúu na jata mé á vatí naxinu cóo cuahá na nacahan ña tuhún sahá. Anda jáví naxinu cóo ivi ga da cahan ña tuhún sahá. <sup>61</sup> Já nacachi da já:

—Naxini johó nde nacachi da jan já: “Jánditani i veñuhu cáhnu cán ta jácandichi tucu u ña tixi uni quivi”, cáchí da —nacachi na cán chícaan na cuachi jatá Jesús.

<sup>62</sup> Anda já nandaca ndichi da cúu sacuahá chága nu ndíhi jutú cán já cáchí da já xihín Jesús:

—Á chí a ndúcú ñehún tuhun nuú nde sahá cuachi jácojo na jatun —nacachi da.

<sup>63</sup> Joo ni in tuhun cóo nanducú ñehe Jesús nu dá. Anda já nacachi da cúu sacuahá chága nu ndíhi jutú cán já xihín á:

—Tavún quivi Ndióxi, ña tácu in indivi ta cachún xihín nde á jivi ndusa yóhó cúun Cristo, da cúu in tuhún jiní já jahyi Ndióxi, da nachindahá mé á cacomé cuénta sahá ñayivi —nacachi da xihín Jesús.

<sup>64</sup> Já nanducú ñehe Jesús tuhun nu dá já nacachi a já:

—Ajan, jivi yehe cúu u da cáchí ndó jan. Ta viti ná cahan i xihín ndo ña vaxi quivi tá cuni ndó yehe, da nachindahá Ndióxi nduu ñayivi cacoo i

xoo cuáha Ndióxi, mé á íin cuaha ndée. Ta já cuni ndó yehe ndicó coo i ñuyívi yóho tañu vicó tá ná quixi i chí indiví —ñacachi a.

<sup>65</sup> Tá naxini johó da sacuaḥa chága nu ndíhi jutú cán ña yóho já nandatá da jáhma dá ña ná candaa ini ñayivi ña xójó ini da. Ta já ñacachi da já:

—Ndája núu da yóho Ndióxi. Coó chicuu chága yó ñayivi ná cahan na xihín yo jáchi sa naxini johó ndihí ña ñacanahá da yóho xihín Ndióxi. <sup>66</sup> Ta ndaja xíní ndó caja í xihín dá viti —ñacachi da.

Anda já ñacachi ndihi na cán já:

—Íin cuachi da jan ta ndítahan cuhun da quivi da —ñacachi na cán.

<sup>67</sup> Ta já ñacasáhá na xihnu ndaa na tójíi na nu á. Ta ñacasáhá túxú na yiquí a. Ta java na cáni jahnda nuu á. <sup>68</sup> Ta já cáchi na já xihín á:

—Cahan xihín nde yo ñacani yohó tá ta mé a ndaa cúun Cristo, da ñachindahá Ndióxi cacomí cuéntá sahá ñayivi —cáchi na xihín á.

*Tá nachijehé tuhun Pedro ña xíní da Jesús*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Ta ndaja coo íin coo Pedro yuhú yéhe da cúu sacuaḥa chága nu ndíhi jutú cán. Já ñacativi in ñáñáha, ña caja chúun mé vehe cán. Já ñacasáhá cáchi ña já xihín dá:

—Yohó cúun in táhan da xíca tuun xihín Jesús, da estado Galilea —ñacachi ña cán xihín dá.

<sup>70</sup> Joo ndaja coo nachijehé tuhun Pedro nu ndíhi na cán ña xíní da Jesús. Já cáchi da já:

—Co xíní toho i ndá saha cahun —ñacachi da xihín ña cán.



<sup>71</sup> Ta tá sa ñaqueta da yéhe cán já ñaxini inga ñáñáha da já ñacasáhá cáchí ña já xihín tóco ndihi na ndúu cán:

—Ñaxini i ñaxica tuun da yóho xihín Jesús, da ñuu Nazaret cán —ñacachi ñá cán.

<sup>72</sup> Ta já ñacasáhá tucu Pedro chíjehé tuhun da ña xini da Jesús ta ñatavá da quivi Ndióxi já cáchí da já:

—Co xini toho i ndá da cúu da ñan —ñacachi Pedro xihín na cán.

<sup>73</sup> Chá va ñayaha ña yóho ta ñacayati java na ndúu cán nu Pedro. Já ñacachi na já xihín dá:

—Mé a ndaa táhyí jivi táhan na xica tuun xihín Jesús cúu ri yóhó va jáchi cáhun tátuhun cáhan na cán —ñacachi na xihín dá.

<sup>74</sup> Anda já ñacasáhá Pedro cánahá da ta ñatavá da quivi Ndióxi ña co xini da Jesús. Já cáchí da já:

—Co xini toho i ndá da cúu da ñan —ñacachi da.

Tá ñacachi da já chíivi laá ñacana chéle. <sup>75</sup> Anda já ñandicuhun ini Pedro ña ñacahan Jesús xihín dá tá ñacachi a xihín dá: “Tá cámaní cana chéle sa chíjehé tuhún ña xinun yehé uní tañu.” Anda já ñaqueta da ñata véhe ta a juú quiahva sácu da jáchi cácuéha ndivaha ini da.

## 27

*Tá ñandiquiahva na Jesús ndáha Pilato  
(Mr. 15:1; Lc. 23:1-2; Jn. 18:28-32)*

<sup>1</sup> Tá ñativi inga quivi itaan já ñandique táhan ndihi na sacuaha nuú jutú xihín na sacuaha veñuhu ña ndituhún na ndá quiahva jácojo na cuachi ñatá Jesús já ná cuu cahní ñahá na. <sup>2</sup> Sahá ña cán quea ñacató na mé á ta ñéhe na a cuahan na

ndiquiahva na mé á nu Pilato, da cúu gobernador ñuu cán.

### *Tá naxihí Judas*

<sup>3</sup> Ta ndaja coo naxini Judas, da najicó túhún Jesús ña nasacu ini na cán cahní na Jesús. Já nacañvi ini da sahá ña núu naja da chí ndáva da cuahan da nducú ñehe da ndíhocō uxu jiuñun cúxú nuú na sacuañá nuú jutú xihín nuú na sacuañá veñuhu. <sup>4</sup>Já nacachi da já xihín na cán:

—Cuachi cáhnu ndivaha quéa naja i jáchi najicó túhún i in da coó cuachi.

Já nacachi na cán já xihín dá:

—Cō sahní toho nde mé nde sahá ña yóho. Mún xini ndá quéa najún —nacachi na cán xihín dá.

<sup>5</sup> Andá já nacuihna Judas jiuñun cán ini veñuhu cáhnu. Ta já naqueta da nasahan da nacata caa da mé dá já nasahní da mé dá.

<sup>6</sup> Ta já najátaca na sacuañá nuú jutú jiuñun cán já nacachi xihín táhan na já:

—A váha toho ña ná chican yó jiuñun yóho ini satō nu táan na jiuñun jócō na nu Ndióxi jáchi ndii naxihí sahá ña yóho —nacachi na.

<sup>7</sup> Ta tá sa nanditúhún vaha xihín táhan na já naxeen na in ñúhu xihín jiuñun cán. Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nu jánduxu na na tóho. <sup>8</sup>Sahá ña cán quéa nasacu na quivi ñúhu cán ña cananí a yójo nuú naxita nii. Ta já naní a janda viti. <sup>9</sup>Ta xihín ña yóho naxinu coo nuú ña nacañvi profeta Jeremías sanahá tá nacachi da já sahá Jesús: “Natiin na ndíhocō uxu jiuñun cúxú jáchi ña jan nasacuu yahvi nasacu na Israel chahvi na saha dá. <sup>10</sup> Ta

xihin mé jjuhún cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchi tuhun Ndióxi.

*Tá cándichi Jesús nu Pilato*

*(Mr. 15:2-5; Lc. 23:3-5; Jn. 18:33-38)*

<sup>11</sup> Ta ndaja coo cándichi Jesús nu Pilato, da cúu gobernador. Ta já nacasáhá da cán ndáca tuhún ñahá da já cáchi da já xihín á:

—Á mé a ndaa cúun in rey, da cómi cuéntá sahá na Israel.

—Ajan. Jivi ndusa cúu u tá quiahva cáchi ndó jan —nacachi Jesús xihín dá.

<sup>12</sup> Ta na sacuahá nuú jutú xihín na sacuahá veñuhu nachicaan na cuachi jatá Jesús joo ni in tuhun coo nanducú ñehe a nu ná. <sup>13</sup> Anda já nacachi Pilato já xihín Jesús:

—Á co xini johó tohún ndaja cuahá nuú cuachi jácojo na jatun —nacachi da.

<sup>14</sup> Joo ni in túhún tuhun coo nanducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

*Sácu ini na ndaja caja na ña ná quivi Jesús*

*(Mr. 15:6-20; Lc. 23:13-25; Jn. 18:38-19:16)*

<sup>15</sup> Tañu mé víco pascua nasahiin costumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da janí da. <sup>16</sup> Mé tañu já nasandacaan in da naní Barrabás vecaa. Níi cúu naxita nuu tuhun sahá da yóho. <sup>17</sup> Ta tá nataca ndihi ñayivi já nandaca tuhún Pilato na já nacachi da já xihín ná:

—Yo cúni ndo ña ná janí i. Á Barrabás janí i á Jesús, da cáchí na cúu Cristo, da ñachindahá Ndióxi cacomí cuéntá sahá ñayivi. Yo janí i cúni ndo — ñacachi da.

<sup>18</sup> Ñacachi Pilato ña yóho xihín ná jáchi sa cánda vaaha ini da ña sahá ña cáhiví ini na xihín Jesús sahá ña cán quéa ñandiquiahva na mé á nu dá.

<sup>19</sup> Ta nani íin coo da nu sácoo da sáhndá da chuun vechúun cán já ñachindahá ñájíhí da tuhun nu dá já ñacachi ñá já: “A quíhvi ndáhun Jesús jáchi cúu dá in ta ndaa. Ñuú anda véhe ñasaní i ñacaja Jesús ta ndícani ndivaha ini i sahá”, ñacachi ñá.

<sup>20</sup> Joo ndaja coo na sacuahá nuú jutú xihín na sacuahá veñuhu cán najácahan na ñayivi ña ná caça na nu Pilato ña ná janí da Barrabás ta ná cahní da Jesús. <sup>21</sup> Anda já ñacachi da cúu gobernador cán já xihín ná:

—Yo cúni ndó ña ná janí i.

Anda já ñacachi na cán já:

—Barrabás jan va janí ndó — ñacachi na xihín dá.

<sup>22</sup> Anda já ñacachi tucu Pilato já xihín ná:

—Ndía cúni ndó caja i xihín Jesús, da cáchí ndo cúu Cristo.

Anda já ñacachi tóco ndihi na cán já:

—Cata caa ndó da ndica crúxu.

<sup>23</sup> Anda já ñacachi tucu Pilato já xihín ná:

—Ndá cuachi ñacaja da, vaaha — ñacachi da xihín ná.

Joo xihín ña yóho ví ga ví ñacasáhá cáyuhú na já cáchí na já:

—Cata caa ndó da ndica crúxu.

24 Ta tá naxini Pilato ña co yáa na cán ta ví ga ví ndívaā nā já natiin da ticuúí ta nandahá da nu ndíhi ñayivi cán ta já nacachi da já xihín ná:

—Xihín ña yóho jánaḥa i nu ndo ña coó cuachi toho ndójo i saḥa ndá ña ná caja ndó xihín da yóho jáchi coó cuachi toho da yóho. Jata mé ndó ná cuḥun ndihi va —nacachi da xihín ná.

25 Anda já nacachi tóco ndihi na cán já:

—Vaḥa ná candojo nde cuachi ta janda jahyi nde viti ná candojo na cuachi saḥá ña ná quivi da —nacachi na cán xihín dá.

26 Anda já najaní Pilato Barrabás. Ta tá nandihí najácaxáhan na Jesús já nandiquiahva da a ndáḥa ná ña ná cata caa na a ndica crúxu.

27 Anda já ñéhe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da. 28 Tá nandihí já natavá na jáhma á. Anda já nachinúu na in jahmá cuáhá túun jatá. 29 Ta já nachinúu na in tiyivi íñu jini á. Ta nachíñee na in ndoo ndahá cuáha. Ta já nacasáhá na cáxítí na nu á já sácū ndaa ichi ñahá na já cáchí na já xihín á:

—Cáhnū nahá ná cacuu yóhó, da cúú rey nuú na Israel —nacachi na.

30 Ta nacasáhá xihnu ndaa na tójií na nuu á. Ta já cándaa na ndoo cán ndáḥa á ta cáni na yiquí jini a xihín do. 31 Ta tá sa nandihí na sacū ndaa ñahá na já nacandaa na jáhma nachinúu na jatá cán ta najácandixi tucu na a xihín jáhma mé á. Anda já ñéhe na a cuḥan na cata caa na a ndica crúxu.

*Tá nacata caa na Jesús ndica crúxu  
(Mr. 15:21-32; Lc. 23:26-43; Jn. 19:17-27)*

32 Ta tá ñéhe na Jesús cuahān nā cata caa na a já nānditahan na in da naní Simón, da ñuu Cirene. Ta nācaja ndúsa nā xihín dá ña ná ndicojo da crúxu nuú cata caa na Jesús. 33 Ta naxinu coo na xiqui naní Gólgota. Tuhun yóho cūni cachi a: nu ndúu lásá yiquí jíní ndii. 34 Mé cán nasahan nā vino nu á, dó nacava táhan xihín ña ova ña ná coho a do. Joo tá naxito ndojó a do coo naxeen toho a coho a do.

35 Ta tá sa nandihí nacata caa na a ndica crúxu já naquehe na jáhma á nandicahnda nu táhan na. Joo jihna ñuhú nasajiquí nā sahá ta da naquee vaha cán, da cán nandiquehe jáhma á. Xihín ña yóho naxinu coo nuú ña nācahyí profeta sanahá tá nācahyí da já: “Nandicahnda nu táhan mé ná cotó níhnu i ta já nasajiquí nā sahá cotó maá i ta da naquee vaha cán nandiquehe da ña”, cáchí tuhun Ndióxi. 36 Ta já nasacoo soldado cán ndúu na ndáá ñahá nā. 37 Ta jini ndica crúxu cán nācahyí nā ndá saha nacata caa na a já cáchí a já: “Da yóho cúu Jesús, da cúu rey nuú nā Israel.”

38 Ta sa mé já nacata caa ri na ivi taa cuihná xihín Jesús: in da xoo cuáha ta inga da xoo íti. 39 Chí cáva jini mé ñayivi yáha cán cánahá nā xihín á. 40 Ta já cáchí nā já:

—Yóhó cáchún jánditani veñuhu cáhnu cán ta tixi uní víxí quivi cáchún jácandichi tucún ña. Tá ta mé a ndaa cúu jāhyi Ndióxi jácacu mún ta cuáhān nuu ndica crúxu jan —nacachi na xihín Jesús.

41 Ta quiahva já nacaja ri nā sacuaḥa nuú jutū xihín nā jānahā ley Moisés xihín nā sacuaḥa veñuhu. Sácu ndaa nā a já cáchí nā já:

42 —Najácacu da java ga ñayivi ta viti chí a cuú caja da jácacu da mé dá. Tá ta mé a ndaa cúú dá rey nuú na Israel, ná nuu da ndica crúxu viti ñuhú já ná candúsa nde da. 43 Cándéé ini da Ndióxi ta cáchi da cúú da jahyi Ndióxi já quéa ná quixi Ndióxi chindeé a da tá ta mé a ndaa quihvi ini a da — nacachi na cán canahá na xihín Jesús.

44 Quiahva já canahá ri ndívi ta cuíhná tácaa in in xoo jín á cán xihín á.

### *Tá naxihi Jesús*

*(Mr. 15:33-41; Lc. 23:44-49; Jn. 19:28-30)*

45 Tá naxinu coo caxivi ndaa nacanaá ní cúú ñuyívi ta janda caa uní sahini já nacasahá nandiyehé tucu. 46 Ta sa mé hora já nacayuhú cóhó Jesús já nacachi a já:

—Elí, Elí, lama sabactani —ña yóho cúni cachi a: Ndióxi mí i, Ndióxi mí i, ndávaha najándacoo ndáha ndó yehé.

47 Ta java na ndíta cán tá naxini johu na tuhun cáchi a já nacachi na já:

—Cána da profeta Elías —nacachi na cán.

48 Ivi laá xínu in da nasahan da naxindaxi da in ticoto ini vino iyá. Ta nacató da ña nuú in yitó ndoó já naxiñee da do yati yúhu Jesús ña ná coho a do. 49 Joo na java ndíta cán nacachi na já xihín dá:

—Cóho candehé yo á quixi Elías jácacu a da — nacachi na cán.

50 Anda já nacayuhú cóhó tucu Jesús já naxihi a. 51 Ta ndaja coo nandatá java ndaa jahmá ndeé ña sáji nuu nuú yii ndivaha veñuhu cáhnu ñuu Jerusalén cán. Janda jini á ta janda sahá nandata.

Ta mé hora já n̄aṭaan ta ndijáá yuu tóto ndúu cán n̄andata. <sup>52</sup> Ta n̄anuna cáva nu n̄asañuhu na n̄axih̄i ta cuahá ñayivi, n̄a n̄asaṭuu cuéntá Ndióxi n̄anditacu tucu na. <sup>53</sup> Ta tá sa n̄anditacu tucu Jesús já n̄axinu na naqueta cáva cán ñuu Jerusalén ta cuahá ndivaha ñayivi n̄axini ñahá.

<sup>54</sup> Ta da cúu sacuaḥa nuú soldado cuéntá Roma xih̄in da ndáá Jesús xih̄in da cán tá n̄axini da ña n̄aṭaan ta n̄axini da java ga ña n̄ayaha cán já n̄acasahá yíhv̄i ndivaha da. Já n̄acachi da já:

—Mé a ndaa táhyí cúu da yóho in túhún jin̄i já jahyi Ndióxi —n̄acachi da.

<sup>55</sup> Ta mé cán n̄asandita cuahá najih̄i sándehe xicá na Jesús. Mé na cán cúu na n̄acaja ndív̄i ñahá nu Jesús tá n̄andico na mé á n̄aquixi na janda estado Galilea. <sup>56</sup> Tañu najih̄i cán n̄asandacaan María, ñá ñuu Magdala xih̄in María, ñá cúu náná Jacobo xih̄in José. Ta cán n̄asandacaan ri ñá cúu náná ndív̄i da cúu jahyi Zebedeo.

*Tá n̄achicaan na yiquí cuñu Jesús ini cáva  
(Mr. 15:42-47; Lc. 23:50-56; Jn. 19:38-42)*

<sup>57</sup> Ta ndaja coo n̄asah̄iin in da cuicá naní José, da ñuu Arimatea. Mé da yóho n̄asaṭuu da in táhan da n̄asaxica tuun xih̄in Jesús. Ta tá sa n̄acuaá já n̄axinu da <sup>58</sup> n̄asahan da cahan ndahví da xih̄in Pilato ña ná ndiquiahva da yiquí cuñu Jesús nu dá. Anda já n̄asahnda Pilato chuun ña ná ndiquiahva na ña nu dá. <sup>59</sup> Ta já n̄achitiví José cán yiquí cuñu Jesús xih̄in in jáhma vaha ña vií. <sup>60</sup> Ta já n̄achicaan da yiquí cuñu Jesús ini in yávi ña saá ndácaan ndica cáva ña jacá n̄acaán da cuéntá mé dá. Ta tá n̄andihi já n̄achijahví da yuhú cáva cán xih̄in in yuu jáhnda



cáhn̄u ta já naq̄uee da cuaḥan̄ da. <sup>61</sup> Ta nu yéhé mé cáva cán naṣandu u coo María, ñá ñuu Magdala xihín inga ñá naní María cán.

*Tá ndáá java soldado nu ndácaan Jesús*

<sup>62</sup> Ta ndaja coo sa nandih̄i naḥaja ndív̄i na ñaha cuéntá quiv̄i ndíquehe ndé̄e na. Ta inga quiv̄i itaḥan najátaca táhan na saḥuaḥa nuú jut̄u xihín na fariseo já naṣaḥan na nu Pilato. <sup>63</sup> Já naḥachi na já xihín dá:

—Vaxi nde nu ndo caḥa loho nde ñamañi nu ndó. Jáchi ndícuhun̄ ini nde ña tá naṣatacu Jesús, da naḥica jándahvi ñayivi cán naḥachi da ña tá sa ná yaha un̄i quiv̄i já nditacu tucu da. <sup>64</sup> Ña cún̄i nde queá ná chindahá loho ndó na cuhun̄ candaa nuú naḥicaḥan na yiquí cuñu da cán janda quiahva ná yaha un̄i quiv̄i. Jáchi tiaḥva náá xinū coo na naḥica tuun xihín dá ñuu ta caja cuihná na yiquí cuñu da. Ta já casáhá cachi na xihín ñayivi ñuu ña nanditacu tucu Jesús tañu na naḥih̄i. Ta xihín ña yóho jándahvi chága na ñayivi a juú ga jihna —naḥachi na.

<sup>65</sup> Anda já naḥachi Pilato já:

—Cañehe ndó in̄ táhndá soldado. Cuáhán ndó candaa ndó nu ndácaan da tá quiahva xini mé ndó caja ndó —cáchi Pilato xihín ná.

<sup>66</sup> Anda já naq̄uee na cán naṣaḥan na já naḥicají vaḥa chága na nu ndácaan yiquí cuñu Jesús cán. Ta naṣacu na sello yuu jáhndá cán ta já naṣacu na soldado ña ná candaa da ña.

## 28

*Tá nanditacu tucu Jesús*

(Mr. 16:1-8; Lc. 24:1-12; Jn. 20:1-10)

1 Tá sa nayaha quivi ndíquehe ndée ná ta nativi inga quivi itaan já naxinu María, ña ñuu Magdala xihín inga María cán sándehe ná nuú nachicaan ná yiquí cuñu Jesús cán. 2 In naá cuití nataan ndée ndivaha. Nayaha ña yóho jáchi nanuu in tátō Ndióxi indiví. Ta najátivi a yuu jáhndá nasajahvi nuú nasandacaan yiquí cuñu Jesús cán. Ta já nasacoo a jatá. 3 Ta yéhe mé tátō Ndióxi cán tá quiahva yéhe tasa. Ta jáhma ndíxi a cúú á jahmá yaa cachi. 4 Ta a juú quiahva ná yihví soldado ndúu cán nacaja tátō Ndióxi chí nacasáhá quíji ninu da. Ta já nacuyu da nu ñuhu tátuhun ndii naxihi. 5 Joo ndaja coo tátō Ndióxi cán nandicaahan xihín najihí cán já nacachi a já xihín ná:

—A cáyihví toho ndó. Sa xini vaha i ña ndínducú ndo Jesús, ña nacata caa na ndíca crúxu. 6 Coó toho a cán ín yóho jáchi sa nanditacu tucu a tá quiahva nacachi mé á xihín ndo. Naha ndó candehé ndo nuú nasahin a já cuni ndó ña coó ga ín nuú nasacu na ña. 7 Ta cama ndó cuhun ndó caxi tuhun ndó xihín dá naxica tuun xihín á ña sa nanditacu tucu Jesús tañu ná sa naxihi. Ta viti cánúú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña nacachi i xihín ndo —nacachi tátō Ndióxi cán.

8 Anda já naquee mé najihí cán mé nuú nasandacaan yiquí cuñu Jesús. Ta vatí yihví ná joo cávatá ndivaha na ta sahá ña cán queá xínu na cuahan ná caxi tuhun na ña yóho nuú ná naxica tuun xihín Jesús cán. 9 Ta nani cuahan ná ivi laá sa ín va Jesús xihín ná. Já nacachi a já xihín ná:

—Ndióxi ná coo xihín ndo.

Anda já nacayati na cán nu á já nanumi na sahá ta nacaja cáhnu na a. <sup>10</sup> Anda já nacachi tucu Jesús já xihín ná:

—A cáyhví toho ndó. Cuáhán ndo caxi tuhun ndó xihín na cúu cuéntá mí i ña ná cuhun na estado Galilea jáchi cán cuni na yehe —nacachi Jesús xihín najihí cán.

<sup>11</sup> Ta nani xínu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já nacaxi tuhun da ña nacuu nuú na sacuahá nuú jutú. <sup>12</sup> Anda já najátaca táhan na sacuahá cán xihín na sacuahá veñuhu já najándique táhan na tuhun na ta já nasahan cuahá ndivaha na jjuhún nuú na soldado cán. <sup>13</sup> Já nacachi na já xihín soldado cán:

—Coto a cáhan ndó ña nanditacu Jesús. Ña cachi ndó cúu ña yóho: “Na naxica tuun xihín á cán, na cán cúu na naquixi ñuu ta nacaja cuíhná na yiquí cuñu a nani naquiji nde”, já cachi ndó xihín ndá na ná ndaca tuhún ndohó. <sup>14</sup> Ta a cáyhví toho ndó tá ná candaa ini da cúu gobernador sahá ña yóho jáchi cahan mé nde xihín dá ta chindeé nde ndohó ña ná a cája da ni in ñaha xihín ndo —nacachi na sacuahá cán xihín soldado.

<sup>15</sup> Anda já naquehe da cúu soldado cán jjuhún ta nacaja da tá quiahva nasahnda na sacuahá cán chuun nu dá. Ta xihín ña yóho nandicuíta nuu tuhun sahá ña nayaha cán. Ta cáhan na Israel cán sahá ña yóho janda quivi víti.

*Tá sáhdá Jesús chuun nuú na naxica tuun xihín á*  
(Mr. 16:14-18; Lc. 24:36-49; Jn. 20:19-23)

16 Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yúcu tá quiahva nasahnda mé Jesús chuun nu ná. 17 Ta tá naxini na mé á já nacija cáhnu na a. Joo java na cáhvi ivi joho ini na jáchi co cándúsa na ña nanditacu tucu a. 18 Anda já nacayati Jesús nu ná já nacachi a já xihin ná:

—Nasahan Ndióxi ndée nuú i caja i ña náhnu ndivaha indivi xihín ñuyivi yóho. 19 Sahá ña cán quea cuáhán ndo jánaha ndo nuú ñayivi ndúu ndi-jáá ñuyivi ndaja caja na caca vaha na íchi cuénta mí i. Ta caja ndúta ndó na xihín quivi Ndióxi, tátá i ta xihín quivi yehe, da cúu in túhún jini já jahyi mé á ta xihín quivi ínimá yii Ndióxi. 20 Ta jánaha ndó na ña ná caja na tóco ndihi ña nasahnda i nu ndó caja ndó. Ta mé a ndaa coo i xihin ndo ndijáá ní quivi janda quiahva ná xinu coo quivi ndihi saha ñuyivi. Já ná coo —nacachi Jesús.

**Tuhun saá ña najá<sup>ndacoo</sup> Jesucristo nu yo: El  
Nuevo Testamento en el mixteco de  
Silacayoapan  
New Testament in Mixtec, Silacayoapan  
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Silacayoapan

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files dated 29 Jan 2022

7f2d3ecf-6d15-55a5-9081-6e970474df2f